

مسرحية
تأشيرة هجرة
إلى الوطن

بقلم
خالد أبو الذهب



بطاقة فهرسة

حقوق الطبع محفوظة

مكتبة جزيرة الورد
اسم الكتاب : مسرحية تأشيرة هجرة إلى
الوطن
المؤلف : خالد أبو الذهب
رقم الإيداع :
الترقيم الدولي:

الطبعة الأولى ٢٠١٦



كلمة المسرحية

إنّها

ليست

نذيرَ شؤمٍ

إنّما

هي

«إنذار بالخطر»

خالد

الشخصيات (حسب الظهور على خشبة المسرح)

- ١- امرأة (١) (العقد الثالث)
- ٢- رجل (١) (العقد الثالث)
- ٣- رضا (عامل القهوخانة – العقد الثالث)
- ٤- علي (زبون القهوخانة وصديق حمدي وحازم – طاعن في السن)
- ٥- أيمن (زبون القهوخانة)
- ٦- الدكتور حازم (صديق حمدي وخطيب شقيقته منال - العقد الثالث أو الرابع)
- ٧- حمدي (صديق حازم وزوج ابنة عمه هند - نفس سن حازم)
- ٨- منال (شقيقة حمدي وخطيبة حازم – العقد الثالث)
- ٩- عزمي (والد هند وعم حازم – العقد الخامس أو السادس)
- ١٠- هند (زوجة حمدي وأبنة عم حازم – العقد الثالث)
- ١١- أمينة (أم هند – العقد الخامس)
- ١٢- المأذون
- ١٣- فؤاد (والد حمدي – العقد الخامس أو السادس)
- ١٤- النوباتشي

- ١٥ - عطية (تاجر بروتين حيوانى – العقد الخامس أو السادس)
- ١٦ - الراقصة
- ١٧ - أعضاء الفرقة الموسيقية
- ١٨ - الضابط
- ١٩ - مجموعة مخبرين
- ٢٠ - بهجت أبو العنين (رجل أعمال فاسد – العقد الرابع أو الخامس)
- ٢١ - مجموعة متظاهرين

الفصل الأول

المشهد الأول: شقة رجل (١)

المسرحُ مظلمٌ بينما نسمعُ صوتَ بكاءِ طفلٍ رضيعٍ ..
يتدخلُ معه صوتُ بكاءِ امرأةٍ (١) وهي تقولُ:

صوتُ المرأةِ : اسكت بقي .. يا واد أهدد..

(يردفُ بنبرةٍ هادئةٍ تُشجّعُ على النوم)

صوت المرأةِ : نام يا حبيبي نام .. وادبح لك قرنين فلفل

(يتدخلُ مع صوتي بكاءِ الطفل والمرأة صوتُ
بكاءِ رجل (١) .. ثم نسمعه يقولُ صارخاً)

صوت رجل (١): فلفل .. فلفل يا ولية يا مهفوفة يا بنت
الكلب .. فلفل مرة واحدة .. أنتي مش عارفه سحر
جرام الفلفل بقي بكام النهاردة (بنبرة حائقة)
هتفتحي لي عنين الواد ع الفلفل من دلوقت ..

(يستمرُّ صوتُ بكاءِ الطفل والمرأة والرجل .. بينما نرى
ضوءاً خافتاً من مصباح كيروسين يضيءُ الجانبَ الأيمنَ
من المسرح و يتحركُ مع حركةٍ من يحملهُ، فيكشفُ لنا
محتويات المكان المتواضعة، التي نشعرنا بأننا في غرفةٍ
ريفيٍ فقيرٍ يحيا في القرن الثامن عشر، يضع الرجلُ
المصباحَ على مائدة خشبيةٍ بالغة التواضع .. ثم يجلسُ
على حصيرٍ من الخوص بجوار زوجته التي تحملُ طفلها
الرضيع - نلاحظُ أن المرأة والرجل يبكيان بكاءً متواصلاً
(-

- رجل (١): بقى ده كلام تقوليه لعيلى صغير
- امراة (١): أعمل أيه .. أهو كلام وخلص عشان يسكت
- رجل (١): طيب ما ترضعيه
- امراة (١): (بنبرة متحسرة) وهو يعنى لو فيه لبن كنت استنيت
- رجل (١): بلى ريقه بقطنة
- امراة (١): اخر تلاتة سنتى عندنا .. عملت لك بيهم حقنة الشاى
الى خدتها بعد ما اتعشيت
- رجل (١): (محدثاً عليها) مهو لو انتى ست عاقلة ومديرة ..
كنتى رشدتى فى استخدام الكوز .. اشمعنى كوزك انتى
الى مش بيكمل يوم .. أنا اعرف ستات كتير بتحافظ
على كوزها وبتخليه يفضل عمران .. لحد معاد صرف
الكوز الجديد
- امراة (١): (بعصبية) الى يسمعك يقول انه كوزى لوحدى ..
طب مهو كوزك زى ماهو كوزى .. وكمان انت ناسى ان
حتة العيلده من ساعة ما جه وهو حاطط بقه معانا فيه
- رجل (١): عندك حق .. المفروض الحكومة تراعى ربنا فينا ..
وتصرف لكل زوجين معاهم طفل نص كوز زيادة فى
الصيف ..
- امراة (١): (بنبرة متفائلة) متقهرش فى نفسك .. الأيام بتعدى
بسرعة .. كلها كام سنة والواد يوصل سن الكنكة ..
وبعدها بكام سنة تانى هتفرح بيه وهو فى سن المغرفة ..

رجل (١): لا .. لا كنزكة ولا مغرفة .. أنا ضميرى مش هيرتاح
ومش هبقى مطمئن عليه وعليكى غير لما يوصل سن الكوز
والقاه داخل عليا بنص كوزه .. ساعتها بس ممكن أحس
انى أديت رسالتى فى الحياة وأموت وأنا مطمئن

امراة (١): ربنا يدبك طولة العمر .. وتفرح بيه وانت شايفه مكمل
نص كوزه ومتهنى مع مراته (يرفع صوت بكاء الطفل
فتردف وهيتربت على صدره في محاولة لاسكاته بس لو
انت هاودتني و مشينا من الحطة المقطوعة دى .. مش كنا
لقينا حد نستلف منه قطنة مية نبل بيها ريق الواد

رجل (١): يا ولية يا مجنونة .. بقى في حد عاقل يبقى ساكن فى
الزمالك وبسببها امراة (١): عارفه .. بس ده كان زمان ..
قبل ما النيل ينشف

رجل (١): (يزفر بضيق) منها لله حكومة جنوب السودان .. السد
اللى بنته شفت آخر شوية ميه كانوا بيوصلوا لنا .. لولاه
كان النيل فضل نيل .. والزمالك فضلت زمالك

امراة (١): (بعصبية) سيبك دلوقت من الزمالك وحرس الحدود ..
وقوم شوف لنا قطنة ميه عشان الواد

رجل (١): (وهو ينهض متفكرا) ارواح لمين بس يارب فى وقت
زى ده

امراة (١): الغفير بتاع ساقية الصاوى محيلتوش عيال .. روح له
يمكن يكون لسه مخلصش كوزه ويرضى بيلها لك

(ينظر نحوها بضيق .. وعندما يرى تعبيرات حسن النية
على وجهها .. ينتزع قطعة قطن من كيس على المائدة)

رجل (١): طيب لو لقيته هو كمان مخلص كوزه .. أعمل أيه

امراة (١): خليه بيلها لك فكراً وثقافة

المشهد الثاني: القهوخانة

راديو المقهى يذيع طوال المشهد عدداً من أغاني النثر ذات الإيقاع الصاخب والمعاني بالغة السطحية، معظم رواد المقهى الجالسون فرادى والمشاركون في لعب (الدومينو والطاولة) يبيكون بكاءً متواصلاً بنبرات وإيقاعات مختلفة، الجميع دون استثناء يشتركون في نوبات من الهرش، وعلى اختلاف هيئاتهم تبدو عليهم سمات المعاناة والقهر والفقر الشديد.

رضا.. (عامل المقهى، العقد الثالث، يرتدي فوق ملايسه المتسخة بالطوطي أبيض) يسير ممسكاً بصينية عليها عدد من المحاقن الطبية الممتلئة باللون متعددة من السائل، نلاحظ كذلك على الصينية وجود عدد من قطع القطن المبلل بالماء في حجم ثمرات صغيرة من الليمون، يتحرك رضا بالصينية ويحقق أوردة زبائن المقهى بالمشروبات بينما يتعالى صوت البكاء

رضا : حقنة شاي سكر خفيف لعم جلال

جلال : خف إيدك شوية يا رضا

رضا : حقنة قرفة للأسطى وليم

وليم : (يتوجع من غرس الإبرة) اااااااااه

رضا : شمر دراعك بقى يا عم علي عشان تاخذ حقنة القهوة

(عم علي رجل طاعن في السن، يفرّد ذراعاً ويتنيها بعد تناول القهوة ثم يقول بنبرة شك)

علي : القهوة دى مش مضبوطة يا رضا

رضا : مش مضبوطة ازاي .. بعدين ايش عرفك .. كنت شوفتني يعنى وأنا بحط السكر

علي : قلت لك مش مضبوطة يا رضا

رضا : يا عم علي مضبوطة والله .. حتى استطعها كويس

علي : (وهو يفرّد ذراعَه ويثنيها مرات عدة) أدبني استطعمت ثاني أهوه .. ومش مضبوطة زي ما قولت لك .. دي كبيرها تبقى على الريحه

رضا : يعنى أنا هغشك

رضا : أبوه بتغشني .. لأنى مش عبيط ولا صغير .. أنا بتعاطي القهوة من قبل أنتا ما تتولد .. من أيام ما كانت بتتاخذ فى العضل .

رضا : طيب هضبط لك حقنة تانية .. بس قول لي الأول بمناسبة شيخوختك دي .. توعى على أيام ما كان المعسل بيتشرب على حاجة قزاز مدورة بيقولوا عليها خيشة

علي : خيشة آيه يا حمار .. أسمها شيشة

رضا : (بسعادة وهو يجلس على مقعد بمواجهته) وحياة شيخوختك بتتكلم جد .. توعى ع الشيشة يا عم علي

علي : يا ابني أوعى آيه .. دا أنا ياما كركرت

رضا : م الضحك

علي : م الأنفاس يا عبيط .. يا رضا يا ابني هو الواحد عايش غير على حس الأيام دي

رضا : وصحيح يا عم علي أن الشيشة دي كانت بتبقى مليانة ميه

علي : امال أيه .. وميه كتيبيبيير .. تحمى أتخن راجل من
القاعدين على قهوتك الزبالة دى

(أيمن : شباب في مُقتبل العمر، يقطع نوبة البكاءِ ويُطبق
الجريدة في يده ويقول لعلي بحدة)

أيمن : عشان كده النيل نشف .. جيلكم قعد يكركر فى الشيشة
و يستحمي بالمرتين والثلاثة فى الشهر .. لحد ما جيتم
أجله .. والله انتوا المفروض تتحاكموا .. المفروض
تتحرقوا بجاز وسخ

علي : يا ابني احنا كنا على نيأتنا .. محدش فينا كان فاكِر إن
النيل ممكن ينشف

أيمن : كان لازم ينشف لانكم ماصنتوش النعمة .. ومعملتوش
حساب لكركرة الأجيال الجاية من بعدكم

علي : يا ابني هو أنا كنت رئيس جمهورية عشان تحاسبنى ..
دا أنا حيا لله كنت موظف درجة تالته فى السكة الحديد

أيمن : (صارخاً) تنكر إنك كنت بتغسل وشك وبتنشطف كل يوم
الصبح

علي : لا

أيمن : تنكر إنك كنت بتغسل رجليك كل يوم قبل ما تنام

علي : لا

أيمن : تنكر إنك كنت بتغسل إيديك قبل الأكل و بعده

علي : لا

أيمن : تبقى مجرم وتستحق الشنق

علي : بدشتمنى .. يا ابنى دا أنا أصغر عيل فى عيالى من دور أبوك

أيمن : (وهو ينهض مُحْتَدًّا) لو أبويا ذات نفسه اتشطف قد ما أنت اتشطفت كنت خنفته و بأيدى دول

(ينصرف أيمن ،فيلتفت على نحو رضا ويصرخ فيه)

علي : أهو انت سبب قلة الأدب دى .. بعدين تعالى هنا .. مش كفاية اخد حقنة القهوة سادة بدل مضبوط .. كمان متنزليش معها ميه

رضا : انت هتفش غلك فىا ولا أيه .. حد قال لك تتباهى بالكركرة .. عموما القطنة بتاعتك أهه

(يلتقط على قطنة مُبلَّلة من على الصينية ويرفعُ يدهُ ليعصرها في قمه بينما يرفعُ لاعب طاولة (١) صوتهُ)

لاعب طاولة (١) : فىن حقنة اللمون الساقع اللى طلبتها يا رضا

رضا : أصبر شوية على مالسرنية تسقع فى الفريزر يا برنس

(يدخل دكتور حازم ممسكاً بجريدة، بدايات العقد الرابع ، يتأمل رواد المقهى بنظرات مُشفقة ثم يجلسُ فوق مقعدٍ مجاورٍ لعلّي ويلتفت ليخاطبَ رضا)

حازم : حقنة حلبة بحليب يا رضا .. بس ماتكترش السكر .. وهات معها قطنة ميه ساعة

رضا : من عينيا يا دكتور

حازم : (لعلّي) ازيك يا عم على

على : الحمد لله يا حازم يا أبنى

حازم : فيه أيه (وهو يتأمله) .. انت شكلك زعلان .. أول مرة أشوفك بتبكي وأنتا متضايق بالشكل ده

على : أصل دى مش دموع مرض بس

حازم : امال دموع ايه تانى ..

على : ندم

حازم : ندم ؟ هو فيه بعد اللي انتوا فيه ؟!! وندمان على أيه ان شاء الله

على : (وهو يبكي بشدة) على كل مرة كركرت فيها

(يدخل حمدي ، في عمر مقارب لحازم ،يجلس وهو يقول معتذرا)

حمدي : معلىش اتاخرت عليك شوية

حازم : ولا يهملك .. انا جيت من شوية صغيرين .. تحب نطلع دلوقت

حمدي : اصطبح الأول (يلتفت نحو رضا) حجر معسل وحقنة غناب ساقع يا رضا

صوت رضا : حاضر يا استاذ حمدي

حازم : خد اقرا الخبر ده

(يمسك بالجريدة من يد حازم ويطلعها فتحتد تعبيرات وجهه)

حمدي : يا نهار أسود .. هيخصصوا شركة الهوا

حازم : من أول ألفين ميه وحداشر .. يعنى كلها كام شهر وإيصال الهوا هيجي الطاق خمسة

حمدي : يا وقعة سودة يا جدعان

(يقترّب رضا ممسكاً بحجر معسل مرصوص في يد وفي الأخرى يحمل صبيّة عليها حقنة تحتوي على سائل أحمر بجوار قطعة قطن.. يمسك حمدي بحجر المعسل.. ويترك يده الأخرى لرضا الذي غرس فيها سن المحقن)

حمدي : ااااه .. يا اخي حرام عليك .. انت لو دقيت مسمار عشرة سنتي في ايدي كان أرحم .. كام مرة أقول لك غير سن الابرة اللي اتبرى ده

رضا : (وهو يستدير منصرفاً) انت اللي مشاعرك مهفهفة عشان داخل على جواز.. والنعمة ما كملت شهر مغيره يا نجم

(ينظر حمدي بغضب ناحية رضا ثم يقرب أنفه من الحجر ويسحب شهيقاً طويلاً)

حازم : النفس اللي سحبتّه ده .. تمنه بعد الخصخصة مش هيقول عن عشرة جنيه

حمدي : انشالله يبقى بحداشر .. انا ناوى ابطل تدخين بعد الجواز

حازم : هي جت عليك .. طيب وبقية الناس اللي قربت تعمى من العياط .. يبطلوا يتنفسوا .. قاتورة الهوا جت لأم وجيه جارتنا بميتين واربعين جنيه الشهر اللي فات .. مع أنها ست وحدانية .. وعلى طول تلاقيها مطلعة رأسها م الشباك عشان تنفّس برة العداد

حمدي : تلاقي حد بيكرها بلغ عنها وعشان كده ابتدوا يحاسبوها على الشهوز اللي فانتت بآثر رجعي .. بس قول لي .. كلامك ده بيقول ان شكك طلع في محله .. يعني بجد يا حازم عياط الناس له دخل بالظروف السوددة اللي بنعيشها.

حازم : دخل مباشر يا حمدي .. اللي شافه الشعب ده على مدار
البيت سنة اللي فاتت خلا كل رصيده من التحمل والصبر
نفذ .. التخطيط والجهل والعشوائية والفقر والقهر والفساد
وخراب الذمم اللي استشرى .. قضى على كل رصيد
للأمل جواه و خلا كل طموحاته فى الإصلاح ومستقبل
أفضل .. تنهار و تقتل

حمدي : بس الحكومة بتقول غير كده .. بتقول ان الناس بتبكي
استعباط .. دلع يعنى عشان الحكومة ترخص الاسعار
تانى

حازم : ومن امتى الحكومة كانت بتقول الحقيقة

حمدي : بس لو كلامك صح .. فيه حلقة مفقودة لازم بدتك
يكشفها

حازم : اللي هي ؟

حمدي : ليه فيه فقرا و مظلومين ماعيطوش لغاية دلوقت .. زى
أنا وانت مثلا

حازم : لان أنا وانت واللى زينا .. عندنا أكثر من باعث على
التحمل حلم .. هدف أمنية .. أنا مثلا طموح العلمى
و حلم الجواز من منال أختك .. وانت تعيينك فى
التلفزيون وجوازك من هند بنت عمى .. لكن طبعا مش
معنى ده اننا بعيد عن السقوط

حمدي : (مرتبكاً) يعنى أيه

حازم : يعنى كل واحد فينا جواه قنبلة موقوتة ومش ناقصها
غير نزع الفتيل

حمدي : وايه اللي ينزع الفتيل لا قدر الله

حازم : أى صدمة .. أى اخفاق مهما كان نوعه أو حجمه

حمدى : يعنى احنا بقينا عاملين زى المباني المشرخة .. خوخنا و بوظنا من جوانا لدرجة ان أى هزة ممكن توقعنا

حازم : للأسف دى الحقيقة .. جيلنا والأجيال اللي سبقته اتعرضوا لعمليات اقضاء ومسح وتشويه وقهر تهد جبال مش بشر .. قضاوا على كل حاجة حلوة جوانا .. شو هوا كل قيم الجمال والاخلاق اللي ربنا خلقها فينا .. قضاوا حتي على ادميتنا .. عندك اللي بيحصل لجيلنا على سبيل المثال .. بنفتح عيننا ع الدنيا عشان نلاقى نفسنا زى التيران الدائرة فى دوامة معاناة لا بتقف ولا بترحم ولا ليها اخر .. اتطحنا فى طاحونة الفقر .. اتهمشنا واتشوشنا واتلعب بمصايرنا واتاكلت حقوقنا ورد فعلنا كان الصبر .. وكتمان الحسرة فى القلب .. على أمل ان بكرة يكون أحسن .. ولما جه بكرة .. وألف بكرة .. و مليون بكرة .. والحال متغيرش الأمل مات .. بعدها .. حتي الصبر على موت الأمل هو كمان مات .. وبالتالي الكيل طفح ..

حمدى : ولما الكيل يطفح .. يطفح دموع !!؟

حازم : هو فيه أصدق من الدموع عشان تعبر عن حالة زى دى

حمدى : بس الواحد مهما اتألم بيبكى شوية وبعدين يرتاح

حازم : ده لما يكون بيبكى كرد فعل على جرح واحد أو ألم واحد أو معاناة واحدة

حمدى : تقصد أيه

حازم : الناس دي بتبكي تاريخ من الألم والمعاناة والقهر
والكبت .. بتبكي باثر رجعي .. بتبكي عمر كامل من
الحرمان والضياع والوجع والجوع .. كل واحد

حمدى : (يصرخ فيه مقاطعاً) بس والنعمة ما أنت مكمل

حازم : أيه .. خايف تسمع باقى الحقيقة

حمدى : وأيه يخوفني وأنا داخل على أسعد وأحلى سنين عمرى
.. كلها كام ليلة وأبقى مع حلم عمرى وجها لوجه

حازم : ربنا يهنيك مع هند

حمدى : أنت كمان ربنا يسعدك مع منال

(فجأة يدخل أيمن مهرولاً ويقول لرضا)

أيمن : هات اذاعة الاخبار يا رضا بسرعة .. بيقولوا هيذيعوا
بيان هام

**(يتحرك رضا نحو المذياع ويدير مؤشره بينما يلتفت
رواد المقهى حول المذياع وينصتون باهتمام)**

المذيع: لقاء جديد مع أحداث يوم جديد نبدوها من مصر .. في
تحرك سريع يهدف إلى التخفيف عن المواطن المصري
وتمشياً مع تعامل المجتمع الدولي مع أزمة نقص الموارد
المائية و انساقاً مع توجيهات منظمة الصحة العالمية ..
جاءنا البيان التالي:

(تعلو نبرة صوته)

قرار السيد رئيس جمهورية مصر العربية بالقانون رقم ٧٧ لسنة ٢٠١٠ لتنظيم استخدام الماء بشكل مباشر

رئيس الجمهورية

بعد الاطلاع على الدستور

وعلى قانون حماية الثروة المائية الصادر بالقانون رقم ٤٠ لسنة ٢٠٦٥

وعلى قانون حماية حقوق المواطن المصري الصادر بالقانون رقم ١٥ لسنة ٢٠٩٧

وبعد موافقة مجلس الوزراء

وبناء على ما ارتاه مجلس الدولة

قرر

القانون الآتي نصه

المادة الأولى:

يحظر بشكل نهائي استعمال الماء بشكل مباشر بغرض نظافة الجسد إلا في حالتين:

الحالة الأولى .. عند الزواج بغرض الاستحمام .. الذي يشترط أن يكون زواجا شرعيا .. على أن تتم مراسم الاستحمام في حضور كل من :

١- مندوب عن السيد وزير مياه الشرب

٢- مندوب عن السيد مدير جهاز الرقابة الإدارية

٣- مندوب عن السادة أعضاء المجالس الشعبية (حي ، مدينة، محافظة) في دائرة المواطن المُستحم أو المواطن المُستحمة

٤- المأذون الشرعي المعتمد لمحل إقامة المواطن المُستحم أو المواطن المُستحمة

على أن لا يتم الشروع في مراسم الاستحمام، إلا بعد عقد قران المواطن المُستحم .. على المواطن المُستحمة، لضمان عدم التذرع بالزواج من أجل الاستحمام

(ينتفض جسدُ حمدي و يضرب كفيه مستغرباً)

حمدي : لا .. كده تبقى الحكومة باصة لي في الجواز .. يعنى أيه .. بعد حمام ليلة الدخلة انا ومراتى هنلحس في بعض زى القَطَط

حازم : استنى لما نعرف باقى الموضوع

المذيع : الحالة الثانية .. عند الوفاة بغرض الغُسل ، على أن تتم مراسم الغُسل في حضور كل من

١- مندوب عن السيد وزير مياه الشرب

٢- مندوب عن السيد مدير جهاز الرقابة الإدارية

٣- مندوب عن السادة أعضاء المجالس الشعبية (حي ، مدينة، محافظة) في دائرة المواطن المتوفى أو المواطن المتوفاة

٤- مندوب عن السيد مدير مصلحة الطب الشرعي

٥- مغسل شرعي

على أن لا يتم الشروع في مراسم الغسل ، إلا بعد معاينة السيد مندوب مصلحة الطب الشرعي .. لحثة المواطن المتوفي .. أو المواطنة المتوفاة .. وذلك للتأكد من عدم التذرع بالوفاة من أجل الغسل .

(ينظر علي نحو حازم ويقول مستغربا)

علي : علي كده لما واحدة تحب تدعي لابنها .. تقول له .. روح يا ابني .. يا رب تموت عشان أشوفك مستحمي

حازم : اصبر بقي يا عم علي لما نشوف اخرتها ايه

المذيع : المادة الثانية

لكل مواطن في جمهورية مصر العربية ممن جاوز عمره الثمانية عشر عاماً الحق في العناية بجسده و تنظيفه مرة واحدة في مطلع كل شهر ميلادي ، وذلك عن طريق مسح جسده بقوطة مبلولة

(فترة صمت تزيد خلالها تعبيرات الاهتمام والانصات على المجموعة)

المذيع : وذلك في حضور كل من

١- مندوب عن السيد وزير مياه الشرب

٢- مندوب عن السيد مدير جهاز الرقابة الإدارية

٣- مندوب عن السادة أعضاء المجالس الشعبية (حي ، مدينة ، محافظة) في دائرة المواطن الراغب أو المواطنة الراغبة في النظافة

٤- السيد رئيس مباحث قسم الشرطة .. التابع له محل إقامة الراغب أو الراغبة في النظافة ، على أن لا يتم الشروع في مراسم التنظيف .. إلا بعد أن يتأكد السيد رئيس المباحث من أن الراغب أو الراغبة في النظافة من سكان دائرة القسم وغير مطلوب أو مطلوبة على ذمة قضايا جنائية .

(يصرخ حمدي في رضا)

حمدي : كفاية .. كفاية .. (وهو يتحرك نحو المذيع) اقل الزفت ده

(يقف رضا متخشبا وهو يقول)

رضا : لا حول ولا قوة الا بالله .. يعنى ايه .. يعنى عشان الواحد يستحمى من هنا ورايح .. لازم يطلع فيش وتشبيه

(يغلق حمدي المذيع، ينظر نحو حازم وتدمع عيناه)

حمدي : فيه كده يا حازم

حازم : مفيش .. بس لازم نصبر .. عشان أحلامنا اللي مستتية نحققها لازم نصبر

حمدي : (بغضب) هو الجربان ينفع يحلم .. دا حتى أحلامه هتبقى وسخة .. (صارخا) هم ليه عايزين يشوهوا كل حاجة فى عيننا .. حتى الأحلام !!؟

(يصرخ فيه حازم مقاطعا)

حازم : اوعى .. اوعى تضعف يا حمدي

(يتمالك حمدي نفسه ، ينظر نحو حازم ويقول بثقة)

حمدى : عندك حق .. مش هضعف .. مهما حصل مش ...
(يقاطعه صوت صراخ منال .. ثم تدخل لنراها في حالة
صدمة وفزع)

منال : يا لهوووووووى ..

حازم : (وهو يتحرك نحو منال) ده صوت منال
حمدى : أيوه هو .. (وهو يهرول من خلف حازم) منال .. (وهو
يقترّب منها) فيه آيه .. أتكلمى

منال : بابا وماما

حمدى : مالهم

منال : جت لهم شوطة العياط اللي مالية البلد

حمدى : (مصعوقاً) لا اله الا الله .. وأيه السبب ؟

منال : النقاش اللي شغال فى الشقة بتاعتك

حمدى : ماله ؟ .. (مفكراً) هو عشان ظبطه بيخنصر فى المونة ..
رمى نفسه من بلكونة الشقة واتهمنى أن أنا اللي رمينه

منال : لا .. هو سليم وزى القرد .. بس جه وقال لهم

حمدى : قال لهم آيه .. اتكلمى

منال : مش قادرة .. مش قادرة أنطقها

حمدى : قوليتها .. ولا يهيك (وهو ينظر حازم) أخوكي جبل
ويتحمل أى حاجة .. هيكون آيه يعنى .. قال لهم أن
الدهانات اللي جببتها له طلعت مغشوشة .. مش مهم ..
أجيب غيرها

منال : يا ريت كان قال كده

حمدى : يبقى قال لهم المحارة طلعت مغشوشة ووقعت من فوق الطوب لما جه يمشى عليه الرولة

منال : يا ريت يا حمدى يا ريت

حمدى : يبقى الأسمنت كله طلع بايظ والحيطان وقعت .. بس عاды .. أبنى أم الحيطان من تانى

منال : لا ده ولا ده .. الموضوع أكبر من كده يا حمدى

حمدى : يبقى الحديد .. أكيد الحديد اللي اتحط فى الأساسات كان مغشوش والعمارة وقعت .. بس برضو مش مهم .. أنا عقدى تمليك وبحصة فى الأرض .. يعنى برضوا هتبقى لى شقة فى العمارة دى أنشائه تتبنى بعد خمسين سنة

منال : برضوا لا يا حمدى .. العمارة ما وقعتش ..

حمدى : (وهو يتنفس الصعداء) الحمد لله .. ياما انت كريم يا ...

منال : بس برضوا يا ريتها كانت وقعت ولا كنش ده حصل

حمدى : (بعصبية ونفاد صبر) طيب قولى .. قولى قبل ما يجينى شلل يا منال .. قولى وما تخافيش .. وحياتك عندى ما هيحصل حاجة .. أنا عارف انك خايفه عليا .. عشان كده عايزك تتطمنى .. قولى يا حبيبتى .. قولى ومتخافيش

منال : النقاش قال لهم ان فيه ناس جم طردوه من الشقة و غيروا لها الكالون

حمدى : مش مهم .. أجيب كالون غيره

منال : الشقة طلعت متباعدة لو احد قبلك يا حمدي .. وبعقد
مُسجل في الشهر العقارى كمان .. وقبل ما تكتب عقدك
بسنتين

حمدي : يعنى ايه .. (يتحرك في جنبات المسرح بخطوات
مُتأمله .. متداعية) يعنى ايه .. يعنى ايه مشترئها قبلى
.. يعنى ايه عقد مسجل .. يعنى ايه شهر عقارى

(يقترب منه حازم وهو يقول بمنتهى القلق والإشفاق)

حازم : حمدي .. اهدا يا حمدي

حمدي : يعنى ايه كالون .. يعنى ايه شقة .. يعنى ايه شقا .. يعنى
ايه حلم .. يعنى ايه حب .. يعنى ايه جواز ..

(يمسك حازم بكتفيه)

حازم : اهدا .. اهدا .. ما ينفعش كده

حمدي : يعنى ايه أى حاجة .. و كل حاجة

حازم : (صارخا فيه) حمدي ؟!

حمدي : (وهو يجهدش باكيا) يعنى ايه حمدي .. يعنى ايه هند ..
يعنى ايه حياة .

حازم : (صارخا فيه) اياك تبكى يا حمدي .. اياك تبكى

(يبكي حمدي .. يبكي بحرقة .. بينما تتأمله منال بذهول)

حمدي : لا يا حازم .. أنا مش ببكى .. صدقتى .. أنا مش ببكى
والله ما ببكى

(وهو يواجه منال باكيا)

حمدي : قولى له يا منال .. قولى له انى مش ببكى
حازم : يا خسارة يا حمدي
حمدي : (صارخا بحازم من خلال دموعه) متقولش كده تانى ..
أنا مش ببكى .. ومش هبكى
(يستمر حمدي بالبكاء .. ويزداد تأثر منال.. التي اقتربت
منه بخطوات وجلة)
منال : أنتا كمان يا حمدي .. بابا وماما وانت .. وفى يوم واحد
(تصرخ)
منال : فاضل لى مين
(يضمها إلى صدره .. يمسح الدمع عن عينيه وهو
يقول)
حمدي : لا يا حبيبتي متخافيش.. متصدقش حازم .. أنا مش
ببكى .. مش ببكى
(ترتعد تعبيرات وجه منال وهي ترى حمدي ينهار هابطاً
على الأرض وهو يبكي بشدة.. بينما يمسك حازم
بكتفها ويصرخ فيها محذراً)
حازم : أمسكى نفسك يا منال .. أوعى .. أوعى تبك.....
(تبكي منال وهي تهبط على الأرض وتضع رأسها على
صدر حمدي)..
حازم : (صارخا) لا يا منال .. لا
(يرتفع صوت بكاء حمدي ومنال .. بينما يُظلم المسرح)

المشهد الثالث: صالة منزل عزمى

صالة متواضعة تفتتح على بابين ،باب في الجدار الأيمن (باب الشقة) وباب في الجدار الأيسر (باب غرفة) وفي الجدار الثالث (المواجه) نرى شباكاً مفتوحاً على الشارع .

عزمى (والد هند) مع زوجته أمينة بينما تقف هند (العقد الثالث،جميلة ومتناسقة القوام) .. وقد بدا عليها التوتر.

عزمى : مستحيل أدى بنتى الوحيدة لعيلة معيبة زى دى .. دى عيلة موبوءة .. حتها شوطة .. فرة .. الأب والام والواد والبنات .. وفى ليلة واحدة؟!!!

هند : يا بابا ده قضاء ربنا

عزمى : مهو عشان قضاء ربنا أنا خدت القرار ده .. دول أكيد ربنا بيعاقبهم .. أكيد حماكى .. قصدى اللي كان حماكى .. كان بيهلب من شغله فى الجمعية الاستهلاكية .. أكيد كان بيعبى كراتين البيض الفاضية لحسابه .. ودخل على عياله فلوس حرام

هند : يا بابا حرام عليك .. أنا حمايا طول عمره راجل محترم .. عاش حياته كلها شريف وشحات .. انت اللي استغليت حب حمدى ليا وضغطت عليهم وحملتهم فوق طاقتهم .. حد يطلب فى الايام السوداء دى من عريس بنته أنه يجيب شقة أوضة وصالة ومطبخ وكمان حمام .. وفين .. فى إمبابية .. وفوق ده كله مرتبة السرير والمخدات والطلبية بتأغة أوضة السفارة .. دول كانوا المفروض ينتحروا مش يعيطوا بس

عزمى : بعنى كنتى عايزانى أوافقهم ونمشى الجوازة بالنص
عشان أنتحر أنا وأمك .. بعدين تعالى هنا .. ما أنا طفحت
الكوتة على ما جبت لك باجور الجاز والزيزر والمقشة
السعف وطشت الحموم .. هو مين اللى كان هيستحمى
فى الطشت .. أنا ولا المدعوق بتاعك

هند : يا بابا أنا مقولتش أنك كنت هستحمى فى الطشت أو لا
قدر الله قصرت فى حاجة .. بس هما كمان مقصروش
وجابوا الحاجات اللى حضرتك طلبتها

**(نرى حازم وهو يدق على باب الشقة ومن خلفه حمدي
وهو يغالب في كتم صوت بكائه)**

عزمى : مين ؟

حازم : أفتح يا عمى أنا حازم

عزمى : عايز أيه يا حازم ؟

حازم : عايزك فى كلمتين

عزمى : الزفت اللى أسمه حمدي معاك ؟

حازم : أفتح لى الأول ياعمى وبعدين نتكلم

عزمى : مش فاتح غير لما اطمئن ان المعيط ده مش معاك

حمدي : (وهو ينفجر باكياً) بس متقولش معيط .. اياك أسمعك
بتقول الكلمة دى تانى

عزمى : أمشى من هنا يا معيط يا أبن الناس المعيطين

حمدي : (وهو يبكي) مش ماشى من هنا غير لما أقابل هند
سامعنى .. مش همشى من هنا حتى لو صورت قتيل الليلة
دى

عزمى : روح عيط بعيد عن هنا .. أنا مابتهدش
حمدي : (وهويكي بشدة) طب لو راجل أفتح لى .. أفتح لى وأنا
هفر جك

عزمى : روح امسح عينيك الأول .. بعدين تعالى اعمل دكر
حمدي : (يحتد وهو يضرب الباب بكتفه) طب والنعمة لكسر
الباب وامسحهم فى الفوطة بتاعتك .. يا ندل .. يا جبان
(يتجه عزمى نحو الباب ويفتحه بحماسٍ وحميةٍ ثم يضع
يده على أنفه خوفاً من العدوى)

عزمى : وبتهددنى فى فوطتى كمان .. طب أدى الباب ..
وورينى هتيجى ناحية الفوطة بتاعتى ازاي

(يدخل حازم ومن خلفه حمدي ثائراً .. ثم عندما يرى
هند تسمع موسيقى رومانسية يخرج خلالها منديلاً من
جيبه ويستعمله لمسح عينيه وأنفه فيحدث صوتاً
مقرزاً)

حمدي : خلاص .. مش هاجى ناحية فوطتك أو أى فوطة فى
الشقة .. بس اياك تفكر أن ده خوف منك .. أنا بس خايف
على هند عليها من العدوى

هند : (وهي تتأمل حمدي بنظرة حب هائلة) بحبك

حمدي : (وهو يعاود البكاء) بعشقك

عزمى : (يصرخ في هند) ادخلي جوا يا بنت .. (لحمدي وهو
يشير نحو باب الشقة) وانتأطلع برة .. أنا مش عايز
معيطين فى بيتى .. ومن هنا ورايح ملكش دعوة بيتى ..
لان اللى بينك وبينها انتهى .. يلا بالسلامة

- حمدى :** مش ماشى من هنا .. وبنترك مش هتكون لحد غيرى
- عزى :** هنشوف .. وورينى ساعتها هتعمل أيه
- حمدى :** (يهجم على عزى لكن حازم يحول بينهما) هعمل فيك
اللى مايخطرش على عقل بشر .. لو فكرت مجرد تفكير
أنك تحرمنى من هند (يقرب رأسه من عزى وهو يضع
إصبعين على أنفه) هأنف فى وشك
- عزى :** (صارخا فى حازم) عاجبك كده .. يعمل فى عمك كده
وانت واقف .. تى مجاييك يا دكتور حازم
- حازم :** ممكن نهذا شوية يا عمى ونتكلم بالعقل
- عزى :** عقل .. هو خلا فى عقل .. بعد ما قل بقيمتى قدام مراتى
وبنتى
- حازم :** اعذره يا عمى .. ما انتا شايف حالته
- عزى :** مهو حالته دى اللى مخليانى مصمم مجوزوش بنتى ..
تقدر تقول لى بعد اللى حصل له هيصرف عليها منين
- حمدى :** (يقطع نوبة البكاء ويتدخل قائلاً) من شغلى
- عزى :** واللى فى حالتك دى ممكن يشتغل أيه
- حمدى :** مضيع .. والا انت نسيت انى خريج إعلام
- عزى :** واللى فى حالتك دى يضيع ايه و ازاي ان شاء الله .. ولا
التلفزيون هيعمل لك برنامج مخصوص ويسميه صباح
العياط يا مصر
- حمدى :** (يهجم على عزى مرة أخرى) بتتريق .. طيب

حازم : (ينهر حمدي ويُسكته) خلاص بقى .. مش هينفع كده ..
كده مش هنوصل لحل .. (وهو يتجّه نحو عزمي) عمى ..
ممكّن تسمعنى لو سمحت

عزمى : (يلتفت نحو زوجته) خدى البنّت وادخلوا الأوضة
وما تطلعوش منها غير لما الموبوء ده يمشى

حمدي : (بمنتهى الضيق بعد ما تابع انصراف هند مع أمها) يا
رب صبرنى .. يا راجل انت لم لسانك .. أنا مناخيرى
بتاكلنى ومش هيحصل كويس

عزمى : (لحازم) شوفت كلامه .. اهو رجع يهدد تانى

حازم : اعتبره مش موجود يا عمى .. خلى كلامك معايا أنا

عزمى : طيب خلصنى.. وهات من الآخر لانى ابتديت اتخنق

حازم : الحالة اللى بيمر بيها حمدي حالة مؤقتة .. يعنى مسيرته
ه يخف

عزمى : يخف الأول وبعدين أجوزها له

حمدي : لا .. أتجوزها الأول وبعدين أخف

عزمى : على جتتى

حازم : اللى قاله حمدي هو الحل يا عمى .. صدقنى .. أنا دكتور
وفاهم بقول ايه .. سبب تعب حمدي ضياع الشقة منه ..
وجود عائق حال بينه وبين جوازه من هند .. يعنى لما
يتجوزها .. هيزول العائق ده وبالتالي هيشفى من المرض

عزمى : وعلى فرض انى وافقت .. هيتجوزها فين ان شاء الله ؟
بعد ما شقته طارت

حازم : فى شقة العيلة

عزى : عيلة مين ؟

حازم : عيلته

عزى : على جتتى .. على جتتى ان ده يحصل .. بقى أنا
معترض انها تعاشر معيط واحد .. أقوم اوافق على انها
تعاشر اربع معيطين ..

حمدى : (وهو يهجم على عزى) هقتاك .. والنعمة لقتاك

حازم : بس يا حمدى .. اسكت انت .. أنا

صوت عامل (١): يا حاج عزى ..

صوت عامل (٢): يا حاج .. يا حاج .. الحقنا يا حاج

(بهرول عزى نحو الشباك)

عزى : العيال الشغالين عندى جم .. هخليهم يطلعوا يقطعوك ..
(بنبرة توعد) والله لخليهم يضربوا فيك لغاية ما تضحك
من شدة الألم (وهو ينظر من الشباك) مالكم يا ولاد ؟
وايه اللي مبهدلكم كده ؟!!

صوت عامل (١): المحل اتحرق يا حاج

صوت عامل (٢): الأنوبة ضربت فيه وساوته بالأرض

يلتفت عزى مصعوقا بينما تلمع عينا حمدى وهو
يتحرك ناحيته

عزى : لا اله الا الله .. شقا عمرى ضاع

حمدى : (وهو يربت على كتف عزمي) ما تكتمش في نفسك يا
حمايا يا حبيبي .. أبكى احسن تيجى لك جلطة ولا يطق
لك عرق ولا تجيك مصيبة تاخذك

حازم : لا يا عمى .. متسمعش كلامه

عزمى : (محدثاً نفسه) هو البكا بيرجع اللى راح .. قدر الله وما
شاء فعل

حمدى : ونعم بالله .. اليكا مبيرجعش اللى راح .. لكنه بيريح ..
بعدين ده شقا عمرك .. مش شقا عمرك بس .. ده فيه
ذكريات طفولتك وشبابك و ..

عزمى : (بعد أن دمعت عيناه) أه .. هي الذكريات .. خصوصاً
انى وارثه عن المرحوم أبويا

حازم : (محدراً) عمى .. أوعى يا عمى

حمدى : (مُغْطِياً على صوت حازم) يعنى شقا أبوك كمان ضاع

عزمى : (متشججاً) الله يرحمه بناه طوبة على طوبة

حمدى : والمرحومة أمك .. هي كمان أكيد شاركتة فى الشقا
والمرار ده .. مش كانت مراته وشايلة همه؟

عزمى : اه .. أمى .. (باكياً) اااااااا يا امه

حازم : يا عمى لا

حمدى : (وهو يربت على ظهر عزمي) عيط يا ابن المعيطه ..
هات من جوة .. من جوة قوى

(يرتفع صوت بكاء عزمي بينما يظلم المسرح)

الفصل الثاني

المشهد الأول :شقة والد حمدي

المسرح منقسم إلى جزأين .. الأول ناحية اليمين يشغل ثلثي المساحة. وهو عبارة عن صالة الشقة المزدحمة بالمدعوين من الجنسين .. في الواجهة مقعدان على أحدهما تجلس هند .. بجوار هند نرى منال وعدداً من الفتيات .. كما نرى عدداً من المدعوين وهم يلتقطون قطع القطن المبلل بسائل أحمر (شربات الفرح) من فوق صينية تحملها امرأة في العقد السادس (أم حمدي)

أم حمدي : (وهي تشير نحو امرأة) خدتى قطنتك يا ام عصام ؟

أم عصام : أيوه يا حبيبتي خدتها وعقبال ما ناخذ قطنة منال

في ركن بالصالة نرى عدداً آخر من الرجال يلتف من حول كنية بلدي يجلس عليها المأذون بين عزمي وحمدي .. من بينهما فؤاد - (والد حمدي الذي نلاحظه دائماً وهو يرمق حمدي بنظرات الضيق

والإزدراء) - وحازم وعدد من رواد المقهى (نلاحظ أن جميع من في المشهد سيكون ما عدا حازم وهند) ..

الجزء الثاني .. يشغل ثلث المساحة (نلاحظ اتصاله بباقي مساحة المسرح من خلال باب يفصل بين المساحتين) .. ونراه مظلماً ظلاماً تاماً

المأذون : (وهو يرفع المنديل ويمسح به عينيه .. يقول بصوت يقطعه البكاء) زواج مبارك ان شاء الله

(يسحب عزمي يده من يد حمدي بعنف .. بينما يغادر المأذون مهرولاً)

حمدي : (بعصبية لعزمي) هو أنتا بتسحب إيدك من كلبش .. ما بالراحة يا عم انت

عزمي : (وهو يبكي بحرقة) ياريتها كانت اتكلبشت في إيد عسماوى ولا انها كانت تتحط في إيد واحد معيط زيك من تحت منديل واحد ،، يا معيط .. يا معفن

(يهم حمدي بالرد على عزمي لكنه يتراجع ثم ينظر في اتجاه خروج الماذون وهو يقول بعصبية)

حمدي : المنديل .. (يهم بالنهوض وهو يقول لحازم) إلحق الماذون الحنجى ده قبل ما يمشى وهات منه المنديل بتاعى

حازم : (بعصبية) احترم نفسك بقى .. منديل آيه وهباب آيه بس..

فؤاد: (لحمدي وهو يرمقه بنظرة تأنيب واحتقار) طول عمرك معفن وكاسفنى

حمدي : حتى انتا يا بابا .. حتى انتا .. يعنى أقوم أمشى وأسيب لكم الفرحة ده

(ينصرف فؤاد متذمراً ، بينما يميل حازم على حمدي)

حازم : مش هتنتفع عصبيتك دى .. وسع خلك شوية .. عشان الليلة دى تعدى على خير .. ريح اعصابك يا حمدي .. اهدى .. حاول تسيب قلبك يفرح .. تفاعل يا أخى .. تفاعل

حمدي : (وهو يمسح دموع عينيه بكم الجاكت) مهو عشان الليلة تعدى على خير لازم أدخل ومعايا منديل .. ولا انتا عايزنى امسح فى هدومها .. بعدين يا حازم بعيد عن أى حاجة .. مش عارف ليه حاسس ان الليلة دى مش هتعدى على خير .. حاسس اني متشائم .. عارف يعنى ايه متشائم .. متشائم يا حازم .. متشائم

(يخرج حازم منديلاً من جيبه ويلقيه في وجه حمدي)

حازم : خد .. داهية تسد نفسك

(تلتفت أم حمدينحو مجموعة النسوة)

أم حمدي : ماتسمعوننا ز غروته يا ستات

(يزغردن ز غردة يقطعها صوت البكاء)

حمدي : (لمجموعة النسوة) تتردد لكم في الأفراح .. عقبال ما نعيط في فرح أبلك يا أم شريف

ام شريف : عقبال ما نقلبها مندبة في يوم ماربنا يرزقك بالخلفة يا حبيبى

حازم : (لحمدي) قوم بقى عشان تقعد جنب عروستك

حمدي : (وهو ينظر متحسراً نحو المقعد الشاغر المجاور لمقعد هند) بلاش يا حازم .. بقول لك متشائم .. عارف يعنى أیه متشائم .. مت

حازم : (يصرخ فيه مقاطعاً) متشائم يا حازم متشائم .. خلاص عرفت .. (وهو يسحبه ويدفعه من ظهره نحو مقعده بجوار هند) غور بقى أقعد جنب عروستك

(ينظر نحو هند مشفقاً)

حمدي : خايف أعديها يا حازم

حازم : سيبك من الجهل ده بقى .. ما أنا قولت لك على السبب الحقيقى للمرض .. وبعدين انتا بعد شوية هتدخل عليها .. يعنى لو الوسواس الفارغة دى ليها اعتبار .. اللى مش هيحصل دلوقت هيحصل بعدين

حمدي : حتى موضوع بعدين ده أنا بقيت مش ضامنه

حازم : (مصعوقاً) معقول .. بعد الحب اللي حبيت هولها ده كله

حمدى : الحب موجود لكن الرغبة مش موجودة .. يا حازم أنا من ساعة ما اتصبت ببلوة العياط دى وأنا حاسس ان أنا مش أنا .. على طول زورى ناشف ومدروخ ونفسى مقطوع وأعصابى سايبة .. ده غير الشحنة والنهضة من طول العياط فر هدتنى .. أذنا متخيل جاحات زى دى .. فى حالة زى دى .. ممكن تؤدي لنتائج شكلها ايه

(يتلفت حازم حوله وهو يمد يده في جيبه ويخرج ورقة سيلوفان ملفوفة على شيء بحجم حبة العدس، ثم يقول وهو يمدها لحمدى)

حازم : خد سنة اللحمه دى حطها تحت لسانك .. متبلعهاش .. مصها مص .. استحلها يعنى .. وانتا هتبقى تمام وزى الحديد

حمدى : (مرتبكاً) مخدرات !!؟

حازم : ومش أى مخدرات .. دى مخدرات ضانى .. من اخر خروف جه تهريب من ليبيا

حمدى : (بعدها وضعها في فمه) على الله تجيب نتيجة .. بدل شوربة كوارع الفراع اللي أمى عملتهالى على الغدا .. (وهو يحرك قطعة اللحم تحت لسانه) .. ومن عند مين من عند الحاج عطية اجدع تاجر ريش فراخ فى المنطقة .. يعنى مش من عند أى ريشارجى .. قالت لى نفس الكلام اللي انتا قولته وهى بتسقيهاالى .. لكن الظاهر ان حالتى بقت مستعصية .. ومن ساعة ما كلتها .. مش حاسس بحاجة غير أنى متشائم .. عارف يعنى أياه متشائم.

حازم : (يقاطعه مصعوقاً) يعنى ادتا عايذ تفهمنى ان كوارع
الفراخ مجبتش نتيجة معاك

حمدى : (بيأس وحزن) شوفت المصيبة اللي اخوك فيها .. مع
انى مصمست رجل فرخة بالكامل .. اه والمصحف يا
حازم .. رجل فرخة من بابيه .. عشان كده بقيت حاسس
ان مفيش حاجة هتجيب نتيجة معايا .. حتى لو ادونى
حقنة سمن بلدى .. هفضل زى ما أنا

حازم : (وهو يربت فوق كتف حمدى مشفقاً) لا أطمئن .. سنة
للحمة دى هتعمل معاك الصح .. روح بقى عشان تقعد
جنب عروستك وسلمها الله

(ينهض حمدى ، وبهمم بالتَّحَرُّك نحو مقعده ، لكنَّ دخول
«النوباتشى» والراقصة وأعضاء الفرقة الموسيقية
وعطية الريشارجي - (نلاحظ أن جميعهم يكون ما عدا
عطية) - يجعله يتوقف ليقول لحازم بسعادة)

حمدى : الليلة شكلها هتسخن يا حزوم .. يا ريتنا كنا افكرنا ورك
فرخة .. اهو الحاج عطية بذات نفسه جه .. بس تصدق ..
الراجل ده أصيل .. من يوم ما أبويا نقط فى فرح ابنه
بصباغ موز وهو مبيفوتش واجب عندنا .. فى كل مناسبة
لازم يجى ويعمل الصح

النوباتشى : سمع هس ..

(يلتفت المدعون نحو «النوباتشى»)

النوباتشى : أحلى تحية من المعلم عطية .. يعنى الدسم كله ..
والبهاريز كلها .. أحلى سلام يا جدع للمعلم عطية ملك
الريش ورجول الفراخ وكل مشتقات البروتين الحيوانى

(تشترك الفرقة الموسيقية بالعزف فنسمع إيقاع صاخب ثم نرى الراقصة وهي تمسح دموعها بكفيها وتسحب نفسها عميقاً قبل أن تدخل في وصلة رقص بمشاركة عدد من النسوة والفتيات بينما يكتفي الرجال «بالحملة» .. حتى يرتفع صوت عطية وهو يتحرك ناحية الراقصة)

عطية : سمع هس .. أحلى مساً وتحية منى للعريس .. وأبو العريس واللى جابت العريس .. أحلى مساً وتحية على حبيبى الأستاذ فؤاد .. ولما أقول الأستاذ فؤاد .. يعنى الواجب كله والذوق والمفهومية

(بلفت فؤاد نحو حمدي ويرمقه بنظرة مزدرية ثم يقول بدهو)

حمدي : (وهو يشيخ بيده مستخفاً) يا عم بطل تقطيم بقى .. ده ما كنش صباغ موز

عطية : (وهو يمد يده في جيب الجلاب) ودى تحيتى للعريس وأبو العريس واللى جابت العريس

حمدي : (وهو يشيخ بغضب نحو عطية) يا عم خلصنا بقى .. أنت بتنقط ولا بتشتم

عطية : (وهو يخرج من جيبه حفنة ريش) خمسين ريشة هنا وشفا على قلب العريس ورقصنى يا جدع

(ينثر عطية حفنة الريش فوق رأس الراقصة ثم يشاركها مع فؤاد في وصلة رقص .. ينهض حمدي ويهم بمشاركة الراقصة بالرقصة لكن فؤاد يمنعه ويدفعه بقوة ناحية مقعدة بجوار هند .. ثم فجأة .. يدخل من الكالوس الأيمن ضابط شرطة مع عدد من المخبرين .. يتوقف أعضاء الفرقة عن العزف .. ترتبك الراقصة وتراجع لتختبئ خلف النسوة .. بينما يبدو على عطية الارتباك البالغ)

فؤاد : (وهو يتقدّم نحو الضابط) فيه ايه يا فندم
(يتحرّك الضابط نحو عطية ويمسك به وهو يقول)
الضابط : مش قولت لك هتشرفنا قريب
(يسئلم عطية بينما يعيد فؤاد الكرة وهو يشير نحو عطية)

فؤاد : يا فندم ده ضيفى
الضابط : طالما ضيفك يبقى تشرفنا معاه عشان نضايفكم سوا
فؤاد : (متراجعا) ولا اعرفه يا فندم
حمدى : (وهو ينهض محتدا من فوق مقعده) لا بقى .. أنا العريس .. وده فرحى .. يعنى من حقى افهم فيه ايه
الضابط : (وهو يشير نحو عطية) البيه عليه كذا حكم مقفول فى قضية غش فى بروتين حيوانى

حمدى : يعنى أياه غش فى بروتين حيوانى .. يكونش بيحقن رجلين الفراخ بالبوتكس عشان تظلظ وتوزن معاه
الضابط : لا .. (وهو يرمق عطية بنظرة غضب) الموضوع أخطر من كده بكثير

عطية : (بذلّ وتوسّل) يا باشا هو انا كنت مرببها فى عشة امى ما المستورد عندكم .. ولا هو عشان بيدفع مرتبات شهرية كبد وقوانص لرجال تقال فى الدولة .. هتطرمخوا عليه وتيجوا على غلبان زى حالاتى

حمدى : (يتجهّم وجهه وهو يتحسّس بطنه) دا الموضوع شكله خطير بجد (وهو يقترب من الضابط) يا فندم فهمنى .. أنا آخر حاجة دخلت معدتى رجل كاملة من رجلين فراخه عرفنى يا فندم انا طفحت آيه عشان حالتى النفسية متدهورش أكثر من كده

الضابط : وانت بتاكل ملاحظتش حاجة

حمدى : وألاحظ إزاي يا فندم وأنا متربى تربية محافظة ومتعودتش أبص حتى على رجلين الفراخ

الضابط : ملاحظتش ان حجم الضوافر فى رجل الفرخة كان أطول من اللازم (وهو يثنى سبابه يده اليمنى أمام وجهه حمدى) ومتنى أكثر من اللازم

حمدى : (وهو يعن متفكرا) على ما وصلتتى مكش ليها ضوافر .. (وهو يشير نحو والدته) أصل أمى على ما بتسويها بتكون كلت ضوافرها

الضابط : (وهو يدفع عطية من ظهره بين زوج المخبرين) عموما اللى انتا كلتها مكانتش رجل فرخة

حمدى : (وهو يمسك ببطنه متألما) كانت رجل بنى ادم يعنى .. (متذكرا) بس يا فندم .. دا كان لها أربع صوابع مش خمسة

الضابط : مهو أبو قردان برضو له أربع صوابع .. واليومه كمان لها أربع صوابع .. والغ

حمدى : الغراب .. هو الغراب (يلتفت نحو حازم ويقول بعصية) عشان لما أقول لك متشائم يا حازم متشائم تبقى تصدقنى

(يخرج الضابط مع عطية والمخبرين بينما يتحسس حمدي بطنه متألماً .. ثم يشير نحو هند ويقول صارخاً)

حمدي : انتي استحلتي القعدة .. (وهو يشير نحو الباب المؤدي إلى الجزء الأيسر من المسرح) قومي عشان نلحق ندخل قبل ما أجيب اللي في بطني

(يظلم الجزء الأيمن من المسرح في نفس توقيت إضاءة الجزء الأيسر لنكتشف أنه يحتوي على غرفة نوم حمدي .. بينما نسمع صوت إيقاع الزفة .. مع أصوات زغاريد نسوة يقطعها صوت بكاء .. يفتح باب الجزء الأيسر .. وتدخل هند .. ومن خلفها حمدي .. الذي نلاحظ أنه مازال يتحسس بطنه متألماً .. بينما ينقبض وينتفخ صدره كالبالون مع اهتزاز رأسه نتيجة لتهته وتقطع أنفاسه من شدة الكاء المتواصل .. يتجه نحو السرير ويجلس عليه وهو يقول بنبرة حزينة مصدومة)

حمدي : يعنى يا رب حتى الكوارع اللي أكلها فى ليلة زى دى تطلع مغشوشة

هند : (وهي تتأمله بغضب) ايه ده .. أننا هتقع

حمدي : تعبان يا هند .. العياط هادد حيلى ومخيلنى مش قادر أصلب طولى

هند : فى ليلة زى دى

حمدي : أيوه .. وادعى ربنا انها تبقى اخر ليلة

هند : (تصرخ فيه) أننا بتقول ايه .. لا .. أسمع .. اذا كنت فاكرو هند قبل الجواز زى هند بعد الجواز تبقى غلطان .. (تصرخ فيه صرخة اشد) ده مش وقت عياط وهدة حيل

حمدى : (وهو يبكي) عارف .. وربنا عارف .. بس أعمل ايه

هند : تقف وتقوم من ع السرير ..

حمدى : يعني انتى فاكرة ان ده حل .. والنعمة (وهو يبكي) والنعمة لو مت وصحيت تانى ما فيه حاجة هتتغير (وهو يبكي بحرقة) اسكتى يا اختى اسكتى .. أنتى مش دريانة بحاجة

(تتأمله هند برهة بتعبيرات وجه محدث .. بعدها تتراجع حدة تعبيرات وجهها حتى تصل إلى درجة الأشفاق وهي تقترب منه وتقول بنبرة خافتة حانية)

هند : حبيبي .. أنا عايزاك تقوم عشان أنا اللي أقعد ع السرير .. وأعمل مكسوفة واننا تيجى ت....

حمدى : مش جاى .. لو قعدتى ع السرير وعملتى مكسوفة خمستاشر سنة أنا لا هاجى ولا هروح .. تعبان .. (وهو يبكي) بقول لك تعبان

هند : (تعود إلى نبرتها الحادة) يعنى خلاص .. مبقاش منك رجا .. أمل اتجوزتنى ليه

حمدى : هو أنا بس اللي اتجوزتك .. ما انتى كم.....

هند : (تقاطعها مصعوقة) نهارك أسود .. اننا بتقول ايه

حمدى : بقول ان مش أنا بس اللي اتجوزتك .. انتى كمان اتجوزتينى .. يعنى متقعديش من أولها تقطمينى وتقوليلى اتجوزتنى ليه اتجوزتنى ليه .. لان انتى كمان ليكى دور فى الورطة اللي احنا فيها دلوقت

هند : ورطة ؟! بتسمى جوازك منى ورطة

حمدى : أيوة .. ولو كنتى فى موقفى وحاسة بلى انا حاسس بيه هتسميها كارثة .. هتسميها مصيبة

(تتمالك نفسها وهي تتأمله بالنظرة المشفقة نفسها .. ثم تعود
لنفس النبرة الحانية)

هند : لا يا حبيبي .. لا ورطة ولا كارثة ولا مصيبة

حمدي : ماشى .. طالما الثلاثة مش عاجبينك (وهو يبكي) نسميها
محنة

هند : (وهي تضحك في محاولة لمداعبته وتلطيف جو الحوار)
طيب لو جه ولد نسميه ايه ؟

حمدي : (وهو يبكي بشدة) نسميه خازوق

هند : (تربت علي كتفه) اهدا .. اهدا .. هي محنة زى ما انتا
قولت .. وعشان انا مراتك .. وعشان بحبك .. وواثقة من
انك بتحبني .. (وهي تميل عليه وتمسح بيدها فوق
رأسه) هقف جنبك لغاية ما نخرج منها

حمدي : (منكسراً) ماشى .. براحتك .. بس ما تبقيش تز على منى
لما تعبك كله يرسى على مفيش

هند : حاضر .. اللي تشوفه .. (وهي تهبط بيديها على ربطة
عنقه وتهم بفكها) حاضر يا جوزى

حمدي : (وهو يمسك بيديها) انتى هتعملى ايه

هند : هقلعك هدومك

حمدي : (ينظر نحوها مصدوماً .. وينفجر باكياً ثم يقول بحسرة)
بقى انتى .. انتى اللي هتقلعيني .. وفى ليلة زى دى

هند : مش مهم يا حبيبي .. احنا الاتنين اتجوزنا وبقينا واحد
يعنى مش هتفرق مين فينا اللي يقلع التاني .. (بحركة
عصبية تنزع رباط العنق وتلقي به فوق السرير .. ثم
تقول بنبرة مهمومة) المهم ان حد فينا يقلع فى الليلة
السودة دى (تمد يدها وتحسس شعر رأسه) حاسس بياه
دلوقت .. يا حبيبي .. يا قلبى .. يا ننى عين روى من
جوا

حمدى : حاسس انى قلعت الكرافت

هند : بس

حمدى : اه وربنا بس .. وأنا هخبى عنك ليه

(تغالب شعورها بالإحباط وهي تتحسس كتفيه من فوق
الجاكت ثم تبدأ بفك أزراره مع القميص وهي تقول بنبرة
متهدجة)

هند : متأكد

حمدى : متأكد جدا

(تخلع عنه الجاكت والقميص وتلقي بهما فوق الكرافت)

هند : طب وكده

حمدى : لا .. كده الوضع مختلف .. كده انا بقيت حاسس .. حاسس

هند : بياه .. حاسس باباه

حمدى : (وهو يضم يديه على كتفيه) حاسس بالبرد

هند : (تشعر بالصدمة فتقول بعصبية) مش معقول يا حمدى ..
مش هينفع كده .. لازم تتفاعل معايا

حمدى : ما أنا متفاعل اهوه .. وسايبك تقلعى فيا زى ما انتى عايزة

هند : (بحدة) سايبنى !!!.. هو انتا عرفت تقلعنى وأنا قولت لأ
حمدى : لأ

هند : يبقى تسكت .. تستسلم للأمر الواقع ومتضيعش وقت
حمدى : حاضر .. أنا عن نفسى مش فارقة معايا .. أنا عامل على تعبك انتى

هند : (تصرخ فيه) ملكش دعوة بتعبى .. انتى تسيبنى اتعامل بطريقتى

حمدى : حاضر .. اللي تشوفيه .. اعملى اللي انتى عايزاه .. بس صدقنى .. كل تعبك هيرسى على مفيش

هند : انت مش لسه قايل انك بردان

حمدى : أيوه

هند : (وهي تميل على ملابسها فوق السرير وتتحياها جانبا) يبقى سيبنى أدفيك

حمدى : هتلبسنى هدمى تانى ؟!! (بعصبية) امال كنتى بتقلعنى ليه

هند : أنا بشيلهم عشان اعرف اقعد جنبك .. بعدين انا مش زوجة خايبة عشان لما جوزى بيرد أدفيه بهدومه

حمدى : (بيكي) يبقى نويتى تولعى فيا

هند : (بدلال ورومانسية) أيوه هولع فيك

حمدى : عندك حق .. (بنبرة متأثرة) .. أنا خلاص حياتى بقت زى قلتها .. حيث كده .. (وهو ينهض) يبقى بيدى لا بيد هند .. سيبينى يا بنت الناس اولع فى نفسى بنفسى .. انتى ملكيش ذنب .. كفاية اللى حصل لك .. بختك يميل وكمان تلبسى جريمة

هند : (وهي تمسك بيده) هولع فيك من غير ما أمسك كبريت ولا اذلق بنزين

حمدى : تبقى هتكرى عليا حد يولع فيا .. وده برضو ما يرضينيش .. لانه لو اتقفش هيرشد عنك

هند : (بضيق) حاول تخرج من الحالة دى .. افهم قصدى من الكلام .. اهدى وركز معايا .. مفيش داعى لحالتك دى

حمدى : مفيش داعى ازاي .. انا مش هقدر اعيش قلقان عليكى بعد ما اموت محروق

هند : افهمنى .. أنا هدفك وهولع فيك من غير ما شرارة تلسعك

حمدى : هتخطبنى فى المكرويف يعنى .. بس تفتكرى هنلاقى مكروويف مقاسى

هند : (بعصبية ونفاد صبر) من غير مكروويف ولا فرن ولا هباب أزرق

حمدى : ازاي يعنى

هند : ببوسة

حمدى : بوسة ؟!! هتكرى عليا حد ببوسنى

هند : (تصرخ فيه) حمدى

حمدى : نعم

هند : فاكّر لما كنا مخطوبين

حمدى : فاكّر طبعاً

هند : فاكّر خدت منى كام قلم فى كل مرة كنت بتحاول فيها تبوسنى

حمدى : مش فاكّر طبعاً .. لانى بطلت اعد بعد خامس سنة من خطوبتنا .. لكن بالويم .. ممكن يكونوا

هند : مش مهم الرقم .. المهم ان انا دلوقت بقيت مراتك .. يعنى بقى من حقك تبوسنى من غير ما اقول لك بم

حمدى : (تنتشى تعبيرات وجهه) يعنى أبوس وأنا مطمئن لانك مش هتضربينى بالقلم

هند : أكيد

حمدى : (وهو يقترب منها) وبوسة طويييييييييييلة

هند : أيوه يا حبيبى .. طويييييييييييلة

حمدى : زى بوسة عبد الحليم حافظ لنادية لطفى فلا فيلم أبى فوق الشجرة

هند : أيوه

حمدى : (تكتسى تعبيرات وجهه بالضيق) بس بوسة زى دى محتاجة لنفس طوييييييييييل .. (ينهذه فتزداد أنفاسه تقطعاً) اجيب لبوسة زى دى نفس منين دلوقتى

هند : نحاول

حمدى : صعب .. صعب يا هند .. أنا نفسى مكروش من كتر العياط

حمدى : يكفيننا شرف المحاولة

هند : (تلطم على وجهها) شرف المحاولة .. (تدمع عيناها) ليه هو أنا طالبت منك تشارك فى تصفيات كأس الأمم الأفريقية (تبكي) شرف المحاولة .. دى بوسة

حمدى : (يصرخ فيها) لا يا هند .. لا .. أوعى تبكى

هند : حنة بوسة .. (تبكي) فتقوطة بوسة

حمدى : (وهو يبكي) قولت لك ما تبكيش

هند : حتى البوسة يا حمدى (تبكي)

حمدى : (وهو يوغل في البكاء) أرجوكى بطلى بكا .. متبكيش ياهند .. أرجوكى ما تبكيش

هند : حتى البوسة مش قادر عليها

حمدى : هقدر .. عشانك هقدر على اى حاجة .. بس انتى تبطلى تبكى (يبكى) بس انتى متبكيش (يبكى بشدة) متبكيش يا هند ويلاً نحاول

هند : مش قادرة .. مش قادرة يا حمدى

حمدى : أنا هخليكى تقدرى .. (وهو يبكى) بس متبكيش .. (يبكى حمدى) عشان خاطرى ما تبكيش

هند : مش قادرة يا حمدى صدقتى .. (تبكى هند) صدقتى بقيت حاسة .. أنى مش قادرة أعمل حاجة غير انى أبكى (تبكى هند .. تبكى بشدة وهي تنهار ساقطة على الأرض)

حمدى : (يلحق بها ويمسك بيدها ويحاول رفعها) أرجوكى مأتقوليش كده .. ما تقوليش الكلام ده (يبكى حمدى)

هند : للأسف دى الحقيقة .. (وهي تسحب يدها من يده) دى الحقيقة يا حمدى (تبكي هند)

حمدى : ملعون أبو الحقيقة .. ملعونة كل الحقايق اللى بالبشاعة دى ..

(يبكي حمدى وهو ينهار ساقطاً بجوار هند .. بينما تدخل موسيقى مناسبة في نفس توقيت إظلام الجزء الأيمن من المسرح .. فيصبح المسرح مظلماً بشكل كامل .. مع الموسيقى نسمع صوت بكائهما .. ثم من خلال أضواء مركزة تكشف جسديهما فقط .. نلاحظ تبادلها لنظرة تحدي وإصرار .. بعدها في نفس اللحظة يقف كلا منهما على ركبتيه ويتواجهان .. وفي نفس اللحظة يتوقفان عن البكاء .. في نفس اللحظة يكتمان أنفاسهما .. في نفس اللحظة يتقارب وجهيهما .. لكن قبل ان تلتقي الشفاه .. يجهشان بالبكاء .. ويعودان للسقوط على الأرض .

إظلام

المشهد الثاني: القهوخانة

مذيع المقهى مفتوح على قناة تذيع برنامج لتعليم الطهي، حالة البكاء المتواصل قد شملت كل المجموعة.. وهم يحدّقون بشغف وتركيز في المذيع (كانهم يشاهدون تلفاز) مثل حفنة من مراقبين يتابعون فيلماً إباحياً ساخناً.. خاصة علي الذي اقترب منه رضا)

رضا : شمر دراعك يا عم علي عشان تاخذ حقنة الشاي اللي طلبتها

الشفيف شرفنطح : مشكلة كبيرة بتقع فيها ست البيت لما بتيجي تعمل صينية قشر البطاطس بز عانف السمك

(الذي ضايقه عدم انتباه علي لوجوده فحال بجسده بينه وبين المذيع وهو يقول بعصبية)

رضا : قولت شمر دراعك يا عم علي (ثم بعصبية ونفاد صبر) بعدين مش كل مرة هتلتع ربع ساعة على ماتشمر دراعك (يلتفت مخاطباً مجموعة الزبائن)

بعد كده اللي عايز طلب يفك زورار قميصه ويشمر دراعه قبل ما يطلب الطلب يا أسطوات

علي : وهو يحملق في المذيع .. ساك ع المطلوب يا رضا .. لاني جوعت خلاص

الشفيف شرفنطح : جاتنا رسائل كتير بتقول ليه سوا الزعانف مبيبقاش مضبوط .. (بنبرة العليم ببواطن الامور) وانا هقول لحضراتكم ليه

رضا : (وهو يشير نحو المذيع) قطيعة تقطع شرفنطح واللي جابت شرفنطح قادر يا كريم

الشفيف شرفنطح : (بغضب) ان شالله انتا واللى جابتك يا قهوچى
يا حقير (ينظر رضا نحو شاشه المذياع مستغرباً ..
بينما يعود شرفنطح لنبرة الخبير) لازم كل ستات البيوت
ياخدوا باللهم من حاجة مهمة .. وهى ان الزعانف اللى
بنستوردها بتبقى مقسومة لحاجتين ..

**(نلاحظ دخول حمدي من الكالوس الأيسر وهو يجر
أقدامه من شدة تهالكه وشعوره بالإعياء .. يتأمله رضا
وهو يقول)**

رضا : العريس وصل يا رجالة .. وبيجر جر فى رجليه ومفرهد
زى مايكون فتح عكا ورجع

حمدي : (باكياً) اهو عين أمك الوحشة دى اللى جابتنى الأرض
الشفيف شرفنطح : الاولانية هى الزعانف نفسها .. اللى بتبقى فى
جناب السمكة وضهرها .. ودى مش بتاخذ سوا كثير ..
والحاجة الثانية هى ديول السمك ..

**(يسحب حمدي مقعداً وينتحي جانباً .. وهو يشير نحو
ظهور المجموعة الملتفة حول المذياع**

حمدي : هو فيه ماتش النهاردة

رضا : (هامساً) ده الشيف زفت اللى ربنا ابتلانا بيه عشان
نتحسر على عيشتنا ..

حمدي : (ساخراً وهو ينظر نحو ظهور المجموعة) قال يعنى
فى بيوتهم حاجة تتطبخ .. صحيح .. عالم جعانين
وبيحلموا بسوق العيش (وهو ينهض ويتجه بمقعده نحو
علي) هات لى حقنة ليمون بالنعناع جنب عم علي

الشف شرفنطح : ولان الديل بيبقى أكبر من الزعانف في الحجم وأنسجته متماسكة عنها .. بياخد سوا أكثر .. عشان كده لازم تقسمى ديل السمكة لذصين .. قبل ما تحطيه في التتبيلة .. عشان ميتأخرش عن سوا الزعانف .. ومعانا اتصال .. مدام أمل .. نقول ألو

متصلة (١): معاك أمل من قشر السويس ..

الشف شرفنطح : تقصدى حضرتك من جسر السويس

متصلة (١): أسفة يا شيف .. أعذرني لانى قايمة نايمة بحلم بطريقة بفتيك قشر البطيخ

حمدى : (معلقاً) قشر .. قشر .. قشر .. كل حاجة بقت قشر .. حتى احنا .. بقينا قشر بنى ادمين

علي : (صارخا في حمدى) .. افقل بقل .. يا تقوم من جنبى خالص .. (وهو يشير نحو المذيع) عايزين نتفرج

حمدى : (يشيح لعل بغضب) طيب يا عم .. انفرج يا حلو .. (وهو ينهض ساحباً مقعده) اللى يسوف حمقتك دى يفكر ان ولادك وأحفادك بيتزحلقوا على بلاط الشقة من كتر قشر البطيخ المترمى ع الأرض .. (وهو يعود إلى مكانه الأول) جاتكم الفقر ..

الشف شرفنطح : تقدرى حضرتك تتفرجى على حلقة الخميس اللى فات على اليوتيوب .. واللى شرحنا فيها طرق عمل بفتيك قشر البطيخ وفيليه قشر الرومان وهتلاقى كمان فى نفس الحلقة طريقة جميلة جدا لعمل المربي من قشر الموز وقوالح الدرہ الشامى .. معانا اتصال تانى .. مدام انجلينا .. حرم سفير بريطانيا فى مصر .. اهلا ب حضرتك

متصلة (٢): موسى أرفه أوبر أن إيجابى بهضرتك وبالاتباك
الى بتقدمهانا

الشف شرفنطح : ده شرف ليا يا حرم معالى السفير .. تؤمرينى
حضرتك

متصلة (٢): مدمس نوى البله سيف سرفلطح

الشف شرفنطح : شرفنطح معاليكى .. بعدين الى فى مقام
حضرتك يقول الى يقوله .. كملى حضرتك مدمس نوى
البلح .. ماله يا فندم

متصلة (٢) : جوزى بيهبه جدا ولانى بهاف اليه من أكل السارع
بهاول أملهوله فى البيت .. لكنه موسى بيقفى
The same quality

الشف شرفنطح : بتتقى نوى البلح قد ايه يا مدام سحر

متصلة (٢) : أنقهه
I do not understand what you meaning of What

الشف شرفنطح : يعنى تحطيه فى ميه يا مدام سحر

متصلة (٢): Sure انا بهطه فى ميه بأدين بهطه ألى النار

الشف شرفنطح : لا يا مدام سحر .. تحطيه فى المية وتسبيبه
منقوع فيها سنة ميلادية على الأقل .. بعدين تسوية على
نار هادية .. وصدقينى .. لو ربنا أدى معالى السفير العمر
وكل منه هيعجبه جدا .. شكر ا مدام انجلينا .. ودلوقت
نطلع فاصل اخبارى .. بعده نكمل موضوع حلقتنا .. وهو
طريقة عمل عجينة الطعمية من قشر الفول السودانى ..
استنونا .. ومترحوش فى أى حلة .. لان مع الشيف
شرفنطح .. مش هنقدر تقفل بقتك

على : (يبتلع ريقه وهو يشيح بوجهه عن المذيع) جريت ريقنا يا ابن الحرام

حمدي : هو انتا ريقك فيه حيل يجري .. بقى تبخ فيا بخة زي دى يا راجل يا كركوب .. وعشان مين .. عشان واحد اسمه شرفنطح

على : (وهو يسحب مقعدة ويسير نحو حمدي) معلىش يا حمدي يا ابني .. الجلالة خدنتي .. كنت سخنان حبتين من أصناف الأكل اللي بيعملها المدعوق ده .. المهم .. انت ايه منزلك ع القهوة .. فيه عريس يسيب مراته فى يوم صباحيته

(مع سماعنا لصوت موسيقى النشرة من المذيع، ينظر حمدي نحو علي محرجا ،نشعر بأنه يقاوم رغبة تدفعه إلى الحديث ، لكنه يتمالك نفسه ويتهرب من الإجابة)

حمدي : استنى يا عم على لما نشوف أخبار الدنيا شكلها ايه

((((((((((الجزء بتاع النشرة يتراجع يا استاذة قمر))))))))

المذيع : على خلفية قرار الحكومة برفع أسعار السلع الأساسية ، جاءنا البيان التالي

.. أعلن مصدر مسؤول بوزارة الصحة .. أن ما يعرف بظاهرة البكاء الهستيرى والتي ادعت تلة مغرضة من عناصر هدامة الإصابة بها ،ليست إلا محاولة مبتذلة لدغدة مشاعر الرأي العام والتأثير على المواطنين الشرفاء .. بهدف إجبار الحكومة على التراجع عن قرارها الأخير برفع الأسعار.

كما صرح مصدر مسؤول بوزارة الداخلية، بأن عيون رجال الأمن الساهرة .. (ترتفع نبذة صوته بالتهديد) سوف ترصد أية محاولة للبقاء الجماعي الهدام .. وأن أي مواطن سيضبط متلبساً بحالة بكاء أو شحقة أو نهضة أو يضبط حاملاً لأي مواد محظورة .. كالمناديل القماش أو الورق ، بين قوسين (الكليمنس) ، سوف يكون عرضة لتوقيع العقاب القانوني المقرر على مثل هذه الأفعال الهدامة

(يلتقط أنفاسه) ننقل إلى الشأن العربي وهذا الخبر من العراق أعلن المتحدث الرسمي باسم البيت الأبيض ، أن أعمال العنف الدائرة بالعراق والتي راح ضحيتها قرابة السبع وثلاثون مليون مواطن عراقي ، لن تنال من الرغبة الحثيثة للولايات المتحدة الأمريكية والمجتمع الدولي الحر في تحقيق السلام والأمن لشعب العراق.

(يصمت برهة يعود بعدها صوته)

المذيع : عودة الى أرض الوطن وهذا الخبر الفني ، صرح المطرب الشعبي صفر محرم رجب رمضان شعبان عبد الكريم ، بأنه على وشك الانتهاء من البومها الجديد والذي يحمل أسم .. أنا بكره نفسي

في الختام إليكم أسعار الماء العذب في الأسواق العالمية برميل ماء منخفض التلوث الف دولاراً للبرميل ، برميل ماء شديد التلوث ثمانمائة وخمسون دولاراً للبرميل ، برميل ماء غير صالح للشرب خمسمائة وسبع وثلاثون دولاراً للبرميل .. وإلى هنا تنتهي أخبار الموجز وإلى أن نلتقي .. لكم تحيات فريق الإعداد .. وتحياتي .. أنا .. وليد هيثم حمادة وائل تامر أمين كموني .. تصبحون على خير.

(بنبرة يائسة مصدومة)

حمدى : يعنى حتى العياط حرموه على الناس

على : انت لسه فاكّر .. دى اخبار بايئة يا ابنى .. دا زوار
الفجر جم الاسبوع اللي فات قبضوا على عرفة بتاع
المكرونة ومن ساعتها محدش عارف له طريق جرة

حمدى : وعرفه يتقبض عليه ليه .. دا راجل طيب وبتاع ربنا

علي : (يتلفت حوله ثم يقول هامسا) ولاد الحرام شكوه كام
تقرير .. قالوا فيهم ان عنيه دايمًا حمرة ومدمعة

حمدى : مهو من البصل اللي بيخرط فيه طول النهار عشان
الصلصة

علي : (بنبرة يائسة) ومين يثبت يا ابنى .. هو نفسه طلب تحويله
للطب الشرعى لبيان سبب البكاء لكنهم رفضوا

حمدى : ربنا يفك ضيقته بقى

على : (وهو يتفحصه بنظرة خبيثة) وضيقتك انت كمان

حمدى : (محاو لا التماسك) ومين قال لك انى فى ضيقة

على : سحتك المتلخبطة

حمدى : (بحدة) حاسب على كلامك يا عم علي

علي : يا ابنى ريحني .. وصارحني بالحقيقية عشان اقدر
اساعدك .. انت شكلك خدت خازوق امبارح

حمدى : (وهو يبكي) أسكت يا عم على والنبي .. بلاش تفكرنى

على : يا وكستك .. أو عى تقول

- حمدى :** أقول ايه يا عم على (بيكي) ودى حاجة تتقال
- على :** يا نهار أسود يا ولاد .. دا اللي يشوفك قبل الجواز كان يفكر ك عنتيل وهتخربها
- حمدى :** أنا فعلا خربتھا يا عم على .. مش خربتھا بس .. أنا خربتھا (وهو بيكي) وقعدت على تلھا
- على :** (مشفقاً) بس يا ابنى بس .. ما تقهرش نفسك .. دواك عندى
- حمدى :** (يمسح الدمع عن عينيه وهو يتأمله مشدوها) ب ب بجد يا عم على
- على :** جد وستين جد كمان .. (بنبرة ثقة) هو انت فاكر الكام وسبعين سنة اللي أنا عيشتهم راحوا هدر .. دا أنا اتسأسأت فيهم خبرة .. شوفت صينية البسبوسة لما بتطلع م الفرن موهوجة ويسقوها الشربات
- حمدى :** شوفتها كتير فى الراديو
- على :** (بغضب) انت هتسطعبط .. من امتى الراديو بييجيب صورة
- حمدى :** تخيلت يا عم على .. تخيلت انى شوفتها .. زى ما انتم بتتخيلوا انكم شايفين الأكل اللي بيطبخه شرفنطح
- على :** اه .. قول كده .. (يعود لنبرة الثقة) اهو زى البسبوسة ما بتتسأسأ شربات .. أنا بقى اتسأسأت خبرة .. (منتشياً وهو يضرب كتف حمدى بيده) ولحسن حظك معظم الساساة فى الموضوع ده

حمدي : طيب سأسأني .. (وهو يمسك بيد علي من على كتفه ويوسعها بالقبلات) أبوس أيدك سأسأني يا عم علي .. سأسأني عشان ربنا يكرمك في ولادك واحفادك و

علي : (وهو يسحب يده بقرف من بين يدي حمدي وشفتيه) خلاص .. خلاص .. هسأسأك .. قولت خلاص .. خلاص .. هنيلك .. (وهو يتأمل ظهر يده بغيط) انتى بتعيط من عنيك ولا من مناخيرك .. الله يقرفك

حمدي : طيب قول يا عم علي .. طلباتك كلها أوامر

علي : أول طلب تخلى رضا يجيب لى حقنة شاى بحليب عشان الجوع قرصنى

حمدي : (يتجهم وجهه برهة بعدها يأمر رضا) حقنة شاى بحليب هنا يا رضا .. (وهو يرمق علي بنظرة جادة) نخش فى السأسة بقى

علي : أول خطوة فى السأسة لازم تتغدى غدوة جامدة .. غدوة تكون فى الجون

حمدي : لو على غدوة جامدة تبقى ساهلة

علي : ظروفك المادية كويسة

حمدي : (بعصبية) أنا هتجوزنى تانى يا عم علي ولا أيه

علي : يا ابني رد علي قد السؤال .. لان على قد فلوسك هدبر لك الغدوة اللي تناسبك

حمدي : (بحماس) فى الموضوع ده كل حاجة مناسبة .. أى حاجة مناسبة .. دوس ع الآخر .. ميهمكش أى حاجة .. اطلب اللي تطلبه .. ان شالله حتى تقول لى اشترى بيضة فرخة بلدى.

على : لا لا لا .. مش للدرجة دى .. انت فى عز شبابك ومش محتاج نتعة شديدة زى دى .. لو كنت عديت الستين كنت هقول لك هات حاجة محملة زى دى .. لكن بالنسبة لك انتا .. (وهو يتفحصه وكأنه يراه لأول مرة) .. انت تيجى بالببتجان (بنبرة تأكيد) الببتجان هيجيب معاك نتايج كويسه

حمدى : تؤمرنى (وهو ينهض من فوق مقعده) اروح اشترى كام جرام

على : كام جرام ايه يا ابنى .. احنا هنلعب .. انتا تلزمك بتتجانة مقفولة

حمدى : بتقول ايه ؟ (وهو ينهار جالساً على كرسيه) ليه .. هو أنا هعزم منتخب مصر يتغدى معايا

على : انت مش لسه قايل انك جاهز

حمدى : أيوه قولت بس مش للدرجة دى .. بتتجانة مقفولة ؟!!

على : أيوه مقفولة .. لازم تكون مقفولة عشان تبقى محافظة على الدسم بتأعها .. (وهو يشمر عن ساعده) سيبك من شغل جرام وانتين جرام ده .. انتا فى ورطة ولازم تاكل أكلة طازة وتمرى عليك .. سامعنى .. بتتجانة كاملة وتخلى مراتك تدبها بأيدها

حمدى : وبعد ما تدبها ..

(يأتي رضا ويغرس سن المحقن في ذراع علي ، فيتحسس على مكان الحقنة ويفرد يده وينتهيها عدة مرات ثم يقول)

على : تاكل منها حته قد ورقة الدومنة (هامساً وهو يميل على حمدي) قبل الموضوع بساعتين

حمدي : حته ! وقد ورقة الدومة .. كثير .. كثير يا عم علي على معدتي .. مش هستحمل كل ده .. وهيتقل عليا وانام

على : خلاص .. يبقى استعمله كدهان

حمدي : (مصعوقاً) أدهن بتتجان

على : أيوه .. الحته اللي قد ورقة الدومنة تحطها في الهون وتفضل تدق فيها لغاية ما تبقى زى المرهم .. بعدين تدهن بيها

حمدي : أدهن بيها أية

(يقرب على فمه من أذنيه ويهمس له بكلمة، يتجهم بعدها وجهه ويبيكي بحرقة)

حمدي : هي حصلت .. أنا .. وبتتجان

(يدخل حازم ،يلقي نظرة على المقهى وعندما يكتشف وجود حمدي يقترب منه وهو واجم)

حازم : معقول ده .. انت تعمل في هند كده .. وكمان تسبيها لوحدها وتنزل الشارع .. (يصدم عندما يراه باگيا) وبتبكي كمان .. ازاي .. فهمنى ازاي .. (اجهاش حمدي بالبكاء مرة أخرى يثيره أكثر.. فيعيدها بصوت أكثر ارتفاعاً) ازاي .. ازاي يا حمدي .. لو جوازك من هند مايعالجكش .. ايه هيعالجك .. لو تحقيق حلم عمرك ما يعالجكش .. ايه هيعالجك .. لو الأحب ما يعالجكش ايه هيعالجك .. ليه يا حمدي .. ليه

حمدى : (وهو يشير لعلّي) قول له ليه يا عم يا بتاع السأسأة انتا .. فهمه

علّي : (وهو ينهض) وانا مالي .. هتدخلوني ليه فى مشاكلكم ..
بعدين الفاصل بتاع برنامج الشيف شرفنطح خلص .

حمدى : بقى كده .. بعد ما طفحت حقنة الشاى بحليب .. الالهى
تبزعها .. الالهى اشوفك بنتسأسأ فى نار جهنم يا بعيد

حازم : (وهو يجلس على مقعد عم علي) وعم علي ماله .. انا
صاحبى انت .. اللى وعدنى انت .. اللى وثقت فيه انت ..
اللى صدقته انت .. اللى كنت فاكراه راجل انت

حمدى : (محدثا) يا حازم ما تغلطش .. انا مكديتش عليك لما
قولت لك ان جوازى من هند هيعالجنى ..

حازم : (صارخا فيه) وادبنى جوزتهالك .. اتحديت عمى وعيلتى
وجوزتهالك .. والنتيجة ايه .. محافظتش عليها .. وبدل ما
هى اللى تطلعك من الدوامة الوسخة دى .. انت غرقتها
فيها

حمدى : غصب عنى يا حازم والله .. غصب عنى يا صاحبى

حازم : بعد جوازك من هند مبقاش ليك اعدار عندى

حمدى : يا حازم افهمى .. أنا .. (يجهش بالبكاء)

حازم : أنت أيه

حمدى : أنا فشلت مع هند .. أنا .. (بيكي)

حازم : (مصعوقا وهو يتأمل حمدى) تقصد ؟!

(يهز حمدى رأسه بالموافقة وهو بيكي)

حازم : ازای .. یعنی تقصد محصلش حاجة

حمدي : أيوه .. نهائي .. نهائي يا حازم نهائي .. حتي البوسنة معرفتش أبوسهالها .. تصدق .. أنا .. **(يقولها بزهو وكبرياء)** أنا .. حمدي .. اللي انت والناس كلها عارفينه .. أفشل .. وفي أيه .. في بوسة

حازم : **(مصدوما)** انت بتقول أيه .. للدرجة دي .. **(وكانه تذكر شيئا)** هو انت مش حطيت حطة اللحمه اللي أنا اديتها لك تحت لسانك زى ما قولت لك

حمدي : وأيه دخل لسانى فى الموضوع .. هو أنا بقول لك معرفتش أبوسها **(وهو يبكي)** ولا معرفتش الحسها

حازم : رد على قد السؤال .. حطيت حطة اللحمه اللي أنا اديتها لك تحت لسانك ؟

حمدي : اه والنعمة حطيتها .. وفضلت أممصص فيها لحد ما شفايفي اتبرت .. حتى شوف .. **(يضم شفتيه ويقرب وجهه من حازم)**

حازم : **(بغیظ)** كده حطة اللحمه تبقى مغشوشة

حمدي : **(يقشعر بدنه)** مغشوشة !!؟ .. **(يهجم على حازم ويمسك بتلابيبه)** تطلع لحمه أيه دى اللي خلتنى أممصص فيها لغاية ما كنت هرجع

حازم : **(وهو يحاول تخليص رقبته من يدي حمدي)** وأنا ايش عرفنى .. هو انا اللي صنعتها

حمدي : **(يترك تلابيب حازم ويتحسس بطنه متألما)** أنا حاسس ان حطة اللحمه دى من زلمكة غراب .. أيوه .. زلمكة غراب .. عشان كده أنا ...

(صوت ضجة شديدة تشد انتباه حمدي وحازم وكل رواد المقهى الذين وقفوا تباعاً ، نميز من بينها أصوات متظاهرين .. يرددون هتافات يرج صداها جنبات المسرح

ص متظاهر (١): فول .. طعمية .. فيه من الحنفية

أصوات جموع المتظاهرين : فول .. طعمية .. فيه من الحنفية
حمدي : دى شكلها مظاهرة يا حازم .. بس معقول (متفكراً)
الأناس دى كلها فشلت فى البوس

حازم : (بعصبية وهو يقترب من الكالوس الأيمن) بوس أيه ..
أننيل ..

(يهم حمدي بالرد لكن صوت متظاهر ثان يقاطعه)

ص متظاهر (٢): مش بالكنكة ولا بالكوز .. عايزين نشرب لما نعوذ

أصوات جموع المتظاهرين : مش بالكنكة ولا بالكوز .. عايزين
نشرب لما نعوذ

حازم : (يشير نحو الكالوس الأيمن وهو يتراجع للخلف) دى
مش مظاهرة .. دى ثورة .. الأعداد دى مشوفتهاش فى
مظاهرة قبل كده .. بص يا حمدي .. بص

(تنظر المجموعة كلها ناحية الكالوس الأيمن ،حتي دخول
مجموعة المتظاهرين وفي مقدمتهم متظاهر ٣ الذي
اعتلى كتفي احد الشباب وهو يهتف بصوت جهوري وهو
يشير نحو ربائن المقهى)

متظاهر (٣): يلى ساكت ساكت ليه .. خدت كوزك ولا أيه

جموع المتظاهرين : يلي ساكت ساكت ليه .. خدت كوزك ولا آيه

(من خلف متظاهر (٣) المحمول علي الاعناق ،تتنوع المجموعة من حيث الجنس والسن والشريحة الاجتماعية فيمقدمة المجموعة نرى متظاهرة (١) وهي ترفع بيد لأفثة مكتوب عليها «الاستحمام كالماء والهواء» بينما ترفع يدها الأخرى وتحك باظافرها خلف ظهرها، كما نرى أيمنوهو يرفع لأفثة بطول ذراعيه مكتوب عليها «لا للفاسدين .. لا للمتشطفين» وهو يميل برأسه للخلف ويقول لمتظاهر (٤))

أيمن : والنبي يا زميلي .. اهرش لي في ضهري فوق الحزام بخمسة سنتي لأن أيديا مشغولين

(يمد متظاهر (٤) يده ويحك بأظافره ظهر أيمن، بينما يخترق حشد المتظاهرين بهجت أبوالعنين رجل الأعمال ألثري وهو محاط برجال حراسته ومن بينهم سكرتيه الخاص حاملا حقيبة، يرمق حازم بهجت بنظرة ثم يقول (لحمدي)

حازم : أنا بشبه على الرجل ده

حمدي : أنهى راجل

حازم : الرجل المستحمى ده .. (وهو يشير نحو بهجت) الواقف هناك

حمدي : اه .. انا كمان حاسس اني اعرفه .. شكله من الجماعة اللي بيطلعوا كثير في التلفزيون

حازم : خلاص افكرته .. ده بهجت أبوالعنين

حمدي : بتاع البيض (متفكراً) اللي كان مرشح يمساك وزير
الفقس في الحكومة اللي فاتت

حازم : ابوه هو .. ببياضه وصفاره

حمدي : طيب وايه اللي يمشى واحد مستحمى زيه في مظاهرة
ضد الحكومة

حازم : أكيد جاى يركب الموجة ويعمل نيولوك سياسى جديد ..
بعد ما ريحته فاحت ووضعته اتهم في الحزب بعد ما
جرايد كثير كتبت عن احتكاره لقشر البيض

حمدي : يعني هو ذارق في وسط دول عشان يكسب جماهيرية
جديدة

(يهم حازم بالرد ،بينما يرفع متظاهر ٣ عقيرته مرة
أخرى بهتاف جديد)

متظاهر (٣) : يلي ساكت ساكت ليه .. ورك الفرخة بألف جنيه
جموع المتظاهرين : يلي ساكت ساكت ليه .. ورك الفرخة بألف
جنيه

(يواجه بهجت المجموعة)

بهجت : اخوانى .. اخوانى

جموع المتظاهرين : ابيبيبيبيبي

بهجت : احنا مش هنقضيه هتافات ممشة .. انما لازم ننهض
من رقادنا ونصيح

جموع المتظاهرين : كاك .. كاك

بهجت : لا مش كده .. مش ده قصدى .. أنا أقصد نصيح بمطالبنا القابلة للتحقيق .. مطالبنا الشخصية يعنى .. بلاش من الكلام العام والطلبات العامة .. عشان مندورش جوا بيضة مفرخة .. قصدى بيضة مفرغة .. قصدى دايرة مفرغة .. أنا عايز كل واحد فيكم يصيح بمطلبه .. وبقول هو عايز ايه

متظاهر (٥) : أنا عايز أشرب

متظاهرة (٢) : وأنا عايزة استحمى

متظاهرة (٣) : (امرأة في العقد الخامس) أنا مش عايزة أشرب ولا عايزة استحمى

بهجت : امال عايزة أيه يا ست

متظاهرة (٣) : عايزاهم يطلعوا ابنى من المعتقل .. بقالى سبع سنين مشوفتوش

بهجت : وهما خدوه ليه يا ست

متظاهرة (٣) : قالوا انه عضو فى حركة قفايا

بهجت : (مستغرباً وهو يتحسس قفاه) قفايا

متظاهرة (٣) : مش قفا سعادتك يا باشا .. قفاهم هم

(يقترّب حمدي متدخلا)

حمدي : دى حركة سياسية سلمية بتدعو الى ان كل مواطن فى مصر يحافظ على قفاه وميخيليش الحكومة تضربه عليه

متظاهرة (٤) : أنا كمان بطالب بان بابا يخرج من المعتقل

بهجت : هو كمان كان عضو فى حركة قفايا

متظاهرة (٤) : لا

بهجت : امال اعتقلوه ليه

متظاهرة (٤) : وهو راجع من الشغل وقفه كمين .. الضابط اشتبه فيه لما لقي عيونه حمرا وخدوده مندبة .. شك أنه كان ببيكي وخبي دموعه لما اتفاجيء بالكمين .. راح الضابط منزله من العربية وفتشه تفتيش ذاتي وقبض عليه بعد ما حرز له المنديل اللي كان نافق فيه

بهجت : واعتقله بتهمة أيه

متظاهرة (٤) : البكاء بدون تصريح

متظاهر (٦) : أنا كمان مش عايز أشرب ولا عايز استحمي

بهجت : أنت كمان عندك حد عايز تطلعه من المعتقل

متظاهر (٦) : أنا عيلتي كلها فى المعتقل لكنى مش عايزهم يطلعوا

(ردود أفعال مستغربة مستهجنة من جمع المتظاهرين)

بهجت : ازاي عيلتك كلها معتقلة ومش عايزهم يخرجوا

متظاهر (٦) : (وهو يبكي) لانى مش هقدر أشيل همهم ولا أدبر احتياجتهم لو خرجوا

(لحظات من الصمت نسمع خلالها بعض الهمهمات)

بهجت : طيب ايه طلباتك ؟

متظاهر (٦) : ان الحكومة تعتقلنى معاهم

(ترتفع الهمهمات مرة أخرى)

بهجت : ليه ؟

متظاهر (٦) : لاني مبعثش قادر أشيل هم نفسى .. أبوس أيدك ..
خليهم يعتقلونى ويريحونى

بهجت : حاضر

بهجت : مين له طلبات تانية

متظاهرة (٥) : أنا

(متظاهرة (٥) فتاة جميلة جدا وبي مقتبل العمر ، تمسك بلافتة
، يتفحصها بهجت بأعجاب وهو يقول)

بهجت : طلباتك أوامر يا ست البنات .. عايزة أيه

متظاهرة (٥) : عايزة أشتغل

بهجت : (باشتهاء وشبق وهو يشير نحو السكرتير) شغاك
عندى

(يقترب السكرتير من بهجت، يأخذ منه الحقيبة، يفتحها
ويخرج منها ورقة، يوقع عليها ثم يشير بها نحو
متظاهرة (٥)، بينما نسمع موسيقى مناسبة، ونرى
متظاهرة (٥) تلقي باللافتة على الأرض وتسير خاضعة
منكسرة نحو الورقة التي أعطاها بهجت للسكرتير،
تتحرك متظاهرة (٥) خلف الورقة التي مدها السكرتير
بيد ومد باليد الأخرى الحقيبة لأحد رجال بهجت (رجل
الحقيبة) .. يتحرك السكرتير في جنبات المسرح بظهره
وهو يمد يده بالورقة التي بدت مثل طعم لا يقاوم ، تتبعه
متظاهرة (٥) وهي مسلوطة الإرادة ، وقد بدت كمن مسه
سحر أو كمن وقع تحت تأثير نوع قوي من المخدر، حتي
تختفي في الكالوس الأيمن من خلف السكرتير والورقة
التي تمدها يده ، مع نهاية الموسيقى يرتفع صوت بهجت
).

بهجت : مين تانى عايز يشتغل (يقترّب حامل الحقيقة من بهجت حتى يلاصقه)

متظاهرة (٦) : أنا (تقولها بميوعة ثم تتحرك حركة إغراء مع أنها لا تحمل أى مقومات الاغراء أو الجمال)

بهجت : (وهو يتفادى النظر إليها) على فكرة انتى حظك مش حلو .. فرص العمل اللي معايا داخل مصر خلصت .. انتو عارفين ان سوق العمل مرتبك .. والبلد مفيهاش شغل خالص

حازم : (رافعا صوته) ولما البلد مفيهاش شغل خالص .. انت واللى زيك جبتوا المليارات دى من فين

بهجت : ها .. قولتى أيه .. أشوف لك فرصة عمل برة مصر
متظاهرة (٦) : انشالله حتى برة الكرة الأرضية .. المهم أطفش من البلد دى

بهجت : (وهو يشير لحامل الحقيقة) عقد عمل فى الصومال (موجهًا حديثه لمجموعة المتظاهرين) مين تانى عايز فرصة عمل برة مصر

متظاهر (٣) : (وهو يلقي بنفسه من فوق كتفى الشاب الذي يحمله) أنا .. (وهو يهرول مخترقًا الحشد نحو بهجت) أبوس أيدك أنا .. انشالله حتى تشغلنى ألم تلج فى القطب الشمالى

(يعصف بحازم رد فعل متظاهر (٣) .. يقشعر بدنه عندما يراه يهبط من مكانه فوق الأعناق فى مقدمة المظاهرة ويهرول متذللًا نحو بهجت .. فيرفع صوته إلى أقصى درجة وهو يشير نحو بهجت)

حازم : نخاس

بهجت : (يتجاهل حازم بعدما رمقه بنظرة غضب ويقول بتشفي ، كأنه يتحداه) فقلت مين عايز فرصة عمل برة مصر

متظاهر (٣) : انا (يعيدها بنبرة استعطاف) ابوس ايدك أنا

حازم : (وهو يشير نحو متظاهر (٣)) وانت عبد (وهو يشير مرة أخرى نحو بهجت متحدياً) لنخاس فاسد عاهر دجال مصاص دم

بهجت : (يصرخ في حازم) اخرس يا وقح (وهو يستعدى جموع المتظاهرين على حازم) شغل العناصر المندسة ابتدى اهوه

حازم : انت وامثالك المندسين مش أنا .. مش في مظاهرة زى دى بس .. انما في البلد كلها .. انت وامثالك شوكة في كبد البلد دى .. دمل في لحمها .. انت وامثالك وجعها ومرضاها والقشة اللي بتقسم ضهرها (يخاطب جموع المتظاهرين وهو يشير نحو بهجت) .. متصدقوش الكداب ده .. النخاس ده .. ده مش هنا عشان يساعدكم .. ده هنا عشان يبيعكم .. أو يبيع اللي فاضل منكم .. فوقوا .. (صارخاً) فوقوا

بهجت : (صارخاً في حازم) عميل .. افاق .. طابور خامس (وهو يشير نفس الإشارة نحو الكالوس الأيمن) اقبضوا على الكلب ده

(تدخل نفس مجموعة العساكر وتهول نحو حازم .. لكن قبل أن يصلوا إليه يحول بينه وبينهم حمدي ورضاً وعم علي وعدد من المتظاهرين ، فيشير بهجت نحو مجموعة رجاله).

- بهجت : اتصل بمدير الأمن وخليه بيعت لنا دعم
حامل الحقيبة : السكرتير بتاع حضرتك مش هنا يا فندم
بهجت : راح فين الغبى ده
حامل الحقيبة : راح يوصل البنت المتظاهرة لاستراحة المنصورية
بهجت : (ينظر نحو حازم والمجموعة التي تحميه بضيق ، ثم يلتفت نحو جمع المتظاهرين) مين تانى عايز يشتغل متظاهرة (٦) : أنا
(يشير بهجت لحامل الحقيبة مع كل فرصة عمل يشير بهجت لحامل الحقيبة نفس الإشارة فيقوم حامل الحقيبة بكتابة كلمة على الورقة قبل أن يعطيها للشخص _ وهو ينظر نحو حازم متحدياً)
بهجت : عقد عمل فى أمريكا
بهجت : مين تانى عايز يشتغل متظاهر (٧) : أنا
بهجت : المانيا ..
متظاهرة (٧) : أنا
بهجت : بلجيكا
(ينظر حازم بضيق نحو بهجت ثم يصرخ في حمدي ومجموعة المقهى ومجموعة المتظاهرين الذين لا زالوا يلتقون من حوله كي يحموه من مجموعة العساكر ويقول بأعلى صوته)

حازم : اللى عايز ياخذ حقوقه كاملة .. ياخذها بكرامة وشرف .. مش
وهو موطى و زاحف تحت رجلين نخاس زى ده .. يحصلنى
(يهرول حازم خارجا من الكالوس الأيمن ومن خلفه
حمدي ورضا وأيمن ومجموعة من المتظاهرين .. ومن
خلفهم مجموعة العساكر .. بينما يرفع بهجت صوته)

بهجت : مين تانى عايز يسافر

متظاهر (٨) : أنا

بهجت : إسرائيل

متظاهرة (٨) : أنا

بهجت : النمسا

متظاهر (٩) : أنا

بهجت : إسرائيل

(يظلم المسرح تدريجيا .. بينما يظل معنا صوتي بهجت
ومجموعة المتظاهرين)

متظاهرة (٩) : أنا

بهجت : إسرائيل

متظاهر (١٠) : أنا

يهجت : إسرائيل ..

متظاهرة (١٠) : أنا

بهجت : إسرائيل

أنا .. اسرئيل .. أنا .. اسرائيل .. أنا اسرائيل .. أنا
اسرائيل .. أنا اسرائيل .. أنا اسرائيل .. أنا اسرائيل ..

الفصل الثالث

المشهد الأول: مكتب التحقيق والحجز

المسرح منقسم الى نصفين .. يربط بينهما باب مغلق .. النصف الأيسر مظلم .. والنصف الأيمن له باب من ناحية اليمين ويحتوى على مكتب يشغله المحقق ومساعدته، على الجدار خلف كرسي المكتب نرى برواز عريض مذهب لصورة الرئيس ، بجوار الباب من الداخل ، يقف **مُخبر (مُخبر ضرب القفا)** نرى يده اليمنى مرفوعة دائماً فى وضع من يستعد لتسديد صفعه ، أنه يبدو مثل تمثال حجرى منحوتاً فى هذا الوضع ، ثابتاً مع ثبات من يتم التحقيق معه .. ويتحرك مع حركة .. بحيث يبدو مثل ظله ، نسمع طوال المشهد من وقت لآخر أصوات تعذيب - وقع سياط ، صراخ ، استغاثة - مصحوب بأصوات ضحك هيسئيرى بأصوات المعذبين ، يرفع المحقق عيذه عن ورقة أمامه ثم ينظر نحو شابين يجلسان أمامه ، نظرة من نفذ صبره .. ثم يقول مؤكداً للشاب الجالس عند يمينه

المحقق : لو مضيت انت وصاحبك على اقولك فى المحضر ده مش هينفع اعمل لك حاجة .. ويكرر لك كامل الحرية فى أنك تتصل بالباشا باباك وتعرفه المشكلة اللي انت واقع فيها .. وليك عليا يا سيدى لو خليتة يكلمنى .. تقديرا لمكانته فى البلد هطلعك انت وصاحبك من الموضوع .. زى الشعرة من العجين

شاب (١) : لا يا فندم .. أنا متمسك بأقوالى ومصر على موقفى .. ومستعد اتحمل أى نتائج تنترتب على كده

المحقق : (للمساعد) مضيهم

(يضغط المحقق على زر الاستدعاء، بينما يقوم الشابان بالتوقيع على المحضر ، يفتح الباب ويدخل منه عسكري (١))

المحقق : (العسكري) فاضل عندك كام متهم

عسكري (١) : اتنين يا فندم

المحقق : (وهو يشير نحو الشابين) دخل الاتنين دول الحجز ..
ولما ارن الجرس دخل الاتنين اللي فاضلين

(بمجرد خروج عسكري (١) مع الشابين يرن هاتف
المحقق فيفتح المكالمة ونسمع صوت الرجل المهم)

الرجل المهم : عندك ولدين اسم واحد فيهم هيثم العنانى

المحقق : هيثم مصطفى العنانى يا فندم ومعاه زميله اللي اسمه
حسام

الرجل المهم : عندك بيعملوا ايه .. انت متعرفش الاتنين بيقو
ولاد مين فى البلد

المحقق : عارف طبعا يا فندم.. وعرضت على هيثم انى اطلعه
هو وصاحبه من الموضوع لو كلم باباه وخلاه كلمنى

الرجل المهم : (بعصبية) مكنش فيه داعى للتعقيدات دى .. خد
منه الرقم واتصل انتا يا أخى .. مش طريقة رجل أمن
ناجح دى يا هشام

المحقق : يا فندم أنا أسف .. واوعدك .. بمجرد ما أقفل مع
حضرتك الخط .. المحضر هيتقطع وهخلى السواق
بتاعى يوصلهم بعريبتى لغاية باب البيت .. (مفكرا) بس
كده فيه مشكلة يا فندم

الرجل المهم : مشكلة ايه دى ؟

المحقق : معظم اللي اتقبض عليهم سعادتك طلخوا من ولاد
حبايينا و

الرجل المهم : (مقاطعا) مهى دى نتيجة الجامعات الأجنبية يا هشام .. بيعلما العيال غلط .. ويحشوا دماغهم بحاجات غربية ملهأش طعم ولا ريحة .. قال آيه حرية و عدالة اجتماعية وحقوق انسان .. عشان كده العيال باظت و ...

المحقق : (مقاطعا) أنا مع حضرتك يا فندم .. بس مش دى المشكلة اللي أنا قصدتها

الرجل المهم : (محتدا) طيب ما تقول .. هتحايل عليك عشان تتكلم

المحقق : (مرتبكا) معدش فاضل غير اتنين بس من اللي اتقبض عليهم يا فندم .. لو الاتنين دول كمان طلعا من ولاد حبايبنا و جاني تليفون زى تليفون حضرتك .. مش هنلاقي حد نشيله القضية

الرجل المهم : (بضيق) فى الحالة دى يبقى تشيلها انت يا هشام

المحقق : (مصعوقاً ومتلعثماً) أأأأأ .. أنا يا فندم ..

الرجل المهم : (وقد زادت نبرته حدة وجبروتاً) أيوه تشيلها انت ما دمت مصمم تغير انطباعى عنك يا هشام (صارخا فيه) لو الاتنين الفاضلين طلعا من ولاد حبايبنا تطلعهم من غير ما تستنا تليفونات من حد .. واذا كان على اللي يشيلها مالحجز بتاعك مليون يا أخى .. بلاش الحجز .. مالشوارع وقهاوى وسط البلد مليونين شباب .. تهز طولك .. وتنزل تشرب حجرين قص على أى قهوة وتأخذ في ايدك وانت قايم واحد ولا اتنين تلبسهاهم .. ده الشغل يا هشام .. ورجل الأمن اللي عايز ينجح ويتصعد لازم يكونش تقليدى فى شغله .. وتكون عنده المرونة والحنكة اللي تخليه يقدر يتصرف فى كل الحالات مهما كانت صعوبتها.

المحقق : حا.....

(يغلق الرجل المهم الخط قبل ان يكمل المحقق كلمته ،
فيأنتقط المحقق انفاسه ثم يضغط على الزر ، فيدخل
عسكري (١))

المحقق : اخر اتنين دخلتهم الحجز

العسكري : أمر سعادتك يا فندم

المحقق : تطلعهم حالا .. (وهو يشطب على أسمين في الورقة)
وتدخل لي الاتنين اللي فاضلين (بخبث) بس بعد ما
تطمئنهم بالكلمتين اللي أنا محفظهم لك

(ينحنى عسكري (١) موافقا ثم يخرج وبعد لحظات من
خروجه يدخل حمدي ومن خلفه رضا وقد بدا عليهما
الخوف والارتباك البالغ)

المحقق : اهلا اهلا بالثوار .. شرفتنا والله ورفعتم راس مصر
فوق .. (وهو ينهض) .. اللي انتو قمتم بيه النهاردة عمل
لوزارة الداخلية شو كبير في الراي العام العالمي .. (وهو
يضع يده على كتف حمدي) دلوقت نقدر نقول للعالم كله
ان مصر فيها حرية رأى وحرية تعبير وحق تظاهر ..
(وكأنه سيظهر من الفرح) حقيقى برافوا عليكم

(نلاحظ ان حمدي قد ابتلع الطعم سريعا .. على عكس
رضا الذي لازال متوجسا قلقا وهو ينظر نحو يد المُخبر
المرفوعة فوق قفاه)

حمدي : يا باشا ما تشكرناش .. احنا معملناش غير الواجب ..

المحقق : (وهو يعود الى مقعده) بالمناسبة .. احب اعتذر لكم عن أى سوء معاملة ممكن تكونوا اتعرضتوا له **(بعد سماعنا لأصوت وقع سياط و ضحك)** انتم عارفين ان أشخاص ومنظمات كثير يتندس في وسط التجمعات الوطنية دى .. عشان تثير البلبلة وتعمل حاجات تتعارض مع أمن الدولة .. وطبعاً احنا مينفعش نقف ننقرج

حمدى : (لرضا) مش قولت لك ياض ان الناس اللي بتضحك من شدة التعذيب دى ناس وحشة .. **(للمحقق)** عندك حق يا سعادة الباشا .. الحلو ياخذ حقه **(وهو ينظر نحو يد المخبر بقلق)** والوحش برضو ياخذ حقه

المحقق : (وهو يشير نحو المقعدين أمام مكتبه) اتفضلوا .. واقفين ليه .. اقعدوا .. اقعدوا يا حلوبين .. **(وكأنه سيقوم من فوق مقعده ويقبل ايديهم شاكرًا)** انتو ورد الجنابن الى فتح فى شوارع مصر بجد؟

(يجلس حمدى على المقعد فيزداد شعوره بالاطمئنان وتقمصاً لشخصية المناضل الثورى، بينما يظل رضا واقفاً، قلقاً ومن خلفه المخبر، فيقول له حمدى بعصية)

حمدى : ما تقعد يا عم الوردية

المحقق : (متصنعاً التأثر وهو يشير نحو رضا) سيبه .. سيبه براحتة .. هو اكيد مش مصدق ان فيه رجل أمن ممكن يتعامل مع المتهمين بتوعه بالطريقة دى .. **(موجهاً حديثه لحمدى وببنبرة مهمة)** محدش بيسوتوعب بالسهل ان الحفاظ على مصالح الدولة العليا ومؤسسات الوطن من عبث المندسين عب كبير جداً .. بيخاينا نتجاوز فى بعض الأحيان ...

حمدى : (بحماس) يا فندم حضرتك زى ما تكون سمعتنى وان بتكلم فى اجتمعا عاتنا .. أنا دايمًا بقول للولاد نفس كلامك ده .. حافظوا على مصالح الدولة العليا والسفلى والوسطى يا ولاد .. وياما حذرتهم من الأشكال المندسنة اللي حضرتك بتقول عليهم دول (وهو يشير نحو رضا) حتى أسأل الرفيق رضا

(ينتفض جسد رضا ويتراجع خطوة للخلف بعد سماعه لكلمة الرفيق ، فيتراجع معه المٌخبر نفس الخطوة ، بينما تبدو علامات الاهتمام البالغ على وجه المحقق وهو يشير لمساعدته إشارة تجعله يضع القلم على الورقة ويسجل كل كلام حمدى)

المحقق : طب ماتعرفنا الأول بشخصية الرفيق رضا يا رفيق حمدى

حمدى : ده يا سعادة الباشا المساعد بتاعى ويعتبره أهم صباغ فى صوابع أيدي اليمين .. المناضل الرفيق رضا جمعات

المحقق : من اصل فلسطينى

حمدى : لا يا فندم .. لا فلسطينى ولا سورى ولا عارفين له أهل لغاية دلوقت

المحقق : أصل أسم الأب مش مصرى

حمدى : اصل ده أسمه الحركى يا باشا (وهو يضع ساقا فوق ساق) يعنى اللى بيتحرك بيه فى المظاهرات لا مؤخدة

المحقق : واخترتوا له الاسم ده تحديدًا ليه ؟

حمدى : لانه تخصص يوم جمعة يا فندم .. (وهو يقرب فمه من أذن المحقق) تقدر سعادتك تعتبره وتد مدقوق فى كل مظاهرة بتطلع يوم جمعة

المحقق : أشمعى الجمعة يا رفيق حمدى
حمدى : لان ده يوم اجازته من القهوة سعادتك
(ينهض المحقق ويتحرك نحو رضا وهو يقول)
المحقق : على كده يا رفيق رضا .. أكيد انتا كنت ضالع فى
جمعة علمنى العوم والنبي يا أحمد
رضا : أحمد مين يا فندم .. انا معرفش حد بالأسم ده
(صفعة قوية من يد المخبر على قفا رضا تجعله يهرول
مدفوعا الى الأمام حتى يصطدم بالمكتب)
(يرمقه المحقق بنظرة شامتة وهو يقول)
المحقق : الظاهر انك متعرفش اللي بينكر الحقيفة عندنا بيحصل
له ايه
رضا : (وهو يتدسس قفاه متألما) يا باشا أنا حنة قهوجى على
قد حالى .. لا ليا فى سياسة ولا مظاهرات
المحقق : ومظاهرة النهاردة مشيت فيها ليه
رضا : عشان ألم الحساب سعادتك .. لان مسيرة فى المظاهرة
دى عدت من قدام قهوتى .. ونص القاعدين ع القهوة
قاموا ودابوا فى زحمتها عشان مبدفوش الحساب (وهو
يشير نحو حمدى) ومن ضمنهم المعفن ده
المحقق : يعنى انتا مشيت فى المظاهرة عشان تلم حساب
المشاريب
رضا : اه والنعمة يا باشا

المحقق : (وهو يشير للمخبر) حاسبه على المشاريب اللي نزلت على ما ارجع له تانى

(صفعات متلاحقة يسدها المخبر الى قفا رضا ووجهه على مدار الحوار ، بينما يتحرك المحقق نحو حمدي بتعابير وجه متجهمة)

المحقق : نرجع لموضوعنا .. كنت عايزنى اسئل الرفيق رضا عن آيه يا رفيق حمدي

حمدي : (ما لاقاه رضا يجعله يوغل فى الكذب وهو فى قمة الارتباك والقلق) عن الأشكال المندسة سعادتك اسئلته وهو يقول لحضرتك أنا قد آيه ريقى نشف وأنا بحذر الولاد منهم .. دايما بقول لهم لما تشتغل أى مظاهرة يا ولاد وتشوفوا أى عيل مندس أو بيفكر يندس أو بيحلم أنه يندس .. خطوا عليه قبل ما يعمل حركة أندساس واحدة .. وأنفخوه وقتي

المحقق : جميل .. جميل جدا .. أنا يعجبني زعماء الثورة اللي واثقين فى نفسهم زيك كده

حمدي : أصلها مش بالساهل يا فندم .. الثورة دى مسئولية

المحقق : اكيد .. خصوصا لما تكون عن تنظيم كبير زى بتاعك

حمدي : أكيد يا باشا .. (وهو ينظر نحو رضا مشفقا بعدما رآه يسقط على الأرض مع صفة قوية من يد المخبر) ادعى لانا انتا بس عشان ربنا يوفقنا ونقدر نرفع راس مصر فوق أكثر وأكثر

المحقق : (بنبرة حادة صارمة) عدد أعضاء تنظيمك كام يا رفيق حمدي

حمدى : بخاف اعدهم يا فندم

المحقق : ليه ؟

حمدى : عشان ما يتحسدوش

المحقق : (وهو يبتسم ابتسامة باهتة صفراء) دا احنا هنهزر
بقى .. طيب

(يشير نحو المُخبر إشارة تجعله يترك رضا ويتحرك
حتى يصبح من خلف المقعد الذى يجلس عليه حمدى ،
بعدها يردف المحقق وقد زادت نبرته حدة وصرامة)

المحقق : أسماء وعناوين القادة الأساسيين فى التنظيم بتاعك ايه
يا رفيق حمدى

(يرتبك حمدى ، ليس لخلو رأسه من أى معلومات فقط ،
انما لتعالى الحدة فى نبرة المحقق ، يحاول انه يتماسك ثم
يقول)

حمدى : يا فندم أعد لك مين ولا مين .. (متظاهراً بمحاولة
التذكر) عندك مثلاً على سبيل المثال وليس الحصر ..
المناضل حازم احتجاجات وعم على اعتصامات ومن
الحرائر عندك مثلاً على سبيل المثال وليس الحصر
برضو .. المناضلة هند وقفات و...

المحقق : (بحدة ونفاذ صبر) مش عايز أسماء حركية وكلام
عايز وحوارات فارغة (ينتزع ورقة من أمام المساعد
ويضرب بها المكتب أمام حمدى) عايز الأسم الرسمى
الثلاثى لكل واحد فيهم .. (وهو يمد له القلم) وعنوان بيته
و شغله بالتفصيل

(يسقط في يد حمدي ، بمتقع وجهه وهو يلقي نظرة نحو رضا ، الذي نراه يتسلق الجدار محاولا النهوض، يهب حمدي واقفا، متراجعا للخلف ويد المخبّر تتبعه وهو يقول بنبرة واهنة مقطّعة)

حمدي : لا .. لا يا فندم .. مقدرش .. مقدرش

المحقق : (ساخرا) ليه مقدرش .. (بنبرة تهديد وغل) يا رفيق حمدي

حمدي : لان دي أسرار شغل يا ياشا

المحقق : وحياة امك .. أنطق يا ض

(يتراجع حمدي مفزوعا بعد تلقيه الضربة ،حتى يصطدم ظهره بصدر المخبّر)

المحقق : هتقول أسماء وعناوين العيال اللي معاك .. أماكن تجمعكم .. مين بيد عمكم و ..

حمدي : (مقاطعا في رعب) يا فندم ما ينفعش

المحقق : (وهو ينهض ويواجهه) ليه يا روح أمك .. هتعمل لي فيها بطل وتشيلها انت والقهوجي اللي معاك

حمدي : لا أنا ولا القهوجي اللي معايا عملنا حاجة عشان نشيلها

المحقق : (وهو يشير نحو اوراق المحضر) يا ابني انت لسه معترف بالتخطيط لأعمال بتضرر بأمن الدولة وقيادة تنظيم سرى .. (وهو يشير نحو اوراق المحضر) كلامك ده ولا مش كلامك ؟

حمدي : مش كلامي

المحقق : امال كلام مين ؟!

حمدي : كلامك انت .. العسكري بتاعك قال لي أقول كده عشان حضرتك تخرجني

المحقق : خلاص ... (وهو يشير نحو الباب) انده للعسكري عشان يخرجك

حمدي : حضرتك كمان شجعتني

المحقق : (يصرخ فيه) شجعتك ؟! شجعتك ازاي؟

حمدي : حسستني ان اللي بيستجوبني حمدين صباحي

المحقق : صباحي ؟! الأسم ده كمان مش مصري .. عضو معاك ده كمان في التنظيم زي جمعات ..

حمدي : يا فندم عضو ايه بس .. ده من رموز الثورة اللي قامت في بداية القرن اللي فات

المحقق : صباحي .. (وهو يلتفت نحو المساعد) .. احنا ازاي معندناش ملف للراجل ده .. (وهو ينظر نحو حمدي) صباحي .. أسمه كده صح .. صباحي

حمدي : يا فندم متشغلش بالك بالأسم .. لانه أكيد أسم حركي زي جمعات .. تلاقيه كان بيطلع مظاهرات شيفت الصبح بس .. خيلنا في موضوعي سعادتك .. أنا معملتش حاجة .. والله العظيم ما عملت حاجة ..

المحقق : (وهو يرمقه بنظرة شك) معملتش حاجة وانت متابع تاريخ الثورة وحافظ أسماء ثوار عاشوا من ميت سنة فانت

حمدي : يا فندم اهي معلومات بنلاقيها مكتوبة في ورق الجرايد اللي بتتلف فيه كبسولة الفول أو برشامة الطعمية اللي بنبلعها ع الصبح

المحقق : (بنبرة تهديد ونفاذ صبر) هتكتب أسماء وعناوين القادة الأساسيين فى التنظيم بتاعك ولا لأ

حمدى : لا .. لان مفيش تنظيم ولا نيلة .. ومتقوليش اعترافات .. لانى مقولتش غير اللى عرفت انك عايز تسمعه ..

المحقق : بالساهل كده

حمدى : أكيد مش بالساهل .. بس اللى زيبى مقداموش غير كده .. ريبط الحمار مطرح ما يعوز صاحبه .. كان لازم أرضيك عشان تخلىنى اطلع من هنا .. ومعاك فى ان ده مش بالساهل .. وأنه صعب .. ومش بس صعب .. ده صعب ومهين ومقرف .. بس آيه فى حياتنا كلها .. حياة العبيد .. مبقاش صعب ومهين ومقرف .. (رافعا صوته) احنا عبيدكم يا باشا .. والله احنا عبيدكم .. لا أكثر من كده ولا أقل .. (متراجعا بنبرة مكسورة خاضعة نازفة) لا أقل .. أكيد أقل .. وستين أقل كمان .. احنا عبيدكم .. وأقل من عبيدكم كمان .. مزاجكم فى ثورة نبقي ثوار .. فى احتفال نحتفل .. فى غنا نغنى .. فى تلت تيام حداد نبكى .. فى رقص نرقص .. حتى لو طلبت معاكم تنشط .. ننتشط ونبقي قرود .. قرود ؟ لا .. بالتأكيد مش قرود .. انما أقل من القروود .. لان حتى لما بنتنشط مش بنطول من ايديكم .. حق القروود .. فى صباع موز أو حبة فول سودانى

المحقق : (ببرود) كلت أنا من الأونطة دى .. اتهزيت واتأثرت وقربت اعيط (صارخا) جلوب ياض على قد السؤال

حمدى : اللى عندى قولته يا باشا

المحقق : طيب خاينى صدقتك (يشير نحو أوراق المحضر) مع ان عندى ليك اعترافات مسجله بعكس كده .. قولي .. رجالتى جابوك النهاردة من مظاهرة ولا دخلوا عليك بيتك وجروك من فوق سريرك

حمدى : لا يا فندم .. جابونى من المظاهرة بتاعة النهاردة

المحقق : ومين اللي دعاك للمشاركة فى المظاهرة دى

حمدى : يا فندم دى مظاهرة .. مش عيد ميلاد عشان اروح بدعوة .. قا عدين على القهوة لقينا مسيرة معدية فيها شباب مستحمين وولاد ناس زى حالاتك كده .. سمعناهم بيهتفوا هتافات بتطالب بحقوق عادلة احنا محرومين منها ومحتاجين لتحقيقها .. فمشينا معاهم

المحقق : (بنبرة ظفر وهو يشير للمساعد) ده اعتراف تانى منه سجل .. بيقول ان الشعب محروم ومحتاج .. ومدام الشعب محروم ومحتاج يبقى نظام الحكم هو اللي حارمه .. وحارم يعنى مانع .. ومانع يعنى معاه ومش عايز يدى .. وده مالوش تفسير غير ان نظام الحكم حرامى .. (وهو يرمقه بنظرة اتهام) بتتهم نظام الحكم بالسرقة يا رفيق حمدى.

حمدى : يا فندم نظامك على راسى .. نظامك أشرف من الشرف .. أنا بتكلم عن نفسى وعن الناس اللي اتولدت لقيت نفسى مزروع فى وسطهم .. احنا محرومين يا باشا جدد .. وأكثر من محرومين كمان .. احنا ميتين بالحيا .. مقتولين .. احنا

المحقق : (مقاطعا وهو يشير نحو المساعد) سجل دى كمان .. الشعب مقتول .. يبقى النظام قاتل ومجرم

حمدى : (بنبرة استعطاف) يا فندم انت بطريقتك دى بتتعمد
تورطنى

المحقق : (مقاطعا وهو يشير نحو المساعد) سجل دى كمان ..
ظعن فى نزاهة جهة التحقيق واتهمها بالعمالة والتدليس
والتواطىء وعدم الشفافية وآل.....

حمدى : (صارخا بنفاذ صبر وهو يشير نفس الإشارة نحو
المساعد) وسجل كمان عندك

(تحتد تعبيرات وجه المحقق ، فتتهوى صفعة من يد
المخبر على قفا حمدى)

حمدى : سجل ان الله حق (صفعة من يد المخبر) سجل ان
الكرامة والشرف وكل القيم الانسانية حق (صفعة من يد
المخبر) سجل ان الخروج فى مظاهرة سلمية حق (صفعة
من يد المخبر) .. سجل ان كلمة اااه من المروج حق
(صفعة من يد المخبر) سجل ان كلمة لا من المظلوم
والمسروق والمقهور والمنتهاك حق (صفعة من يد
المخبر) سجل ان الخالق خلق لنا صوت مش عشان
نهتف (وهو يشير نحو صورة الرئيس) اخترناه اخترناه
بس .. (صفعة من يد المخبر) أو عشان نقول تمام يا فندم
وتحت أمر معالى حضرة جنابك بس (صفعة من يد
المخبر) لكن عشان لما يملانا الوجد والقهر وظلم وخسف
المخلوق للمخلوق نصرخ ونرفض ونحتج ونقول لا

(يهم المخبر بتسديد صفعة جديدة لكنه يمسك بيده
ويصرخ فيه)

حمدى : لأ

(يحاول المخبر تخليص يده كي يعاود تسديد الصفحات لكن
حمدى يستميت فى الأمسآك بها.. حتى يجبره على
الاستسلام ، فيلتفت نحو المحقق الذى اشار له اشارة
تطلبه بالانسحاب وهو يتقدم نحو حمدى يقول بنبرة
المتفاجىء)

المحقق : أيوه كده .. بان على حقيقتك شـيل قناع الساذج
والمغيب اللى أشـتغلتنى بيه أكثر من ساعة واطهر
شخصيتك الحقيقية يا رفيق
(وهو يتأمل بنظرة حاقدة)

المحقق : سمعنى باقى الافتراءات والشعارات الواهية اللى كنت
بتلهب بيها حماس المتظاهرين

**(يشيح بوجهه عن المحقق ويطرق شاردة وكأنه يحدث
نفسه)**

حمدى : فى المظاهرة مفتحتش بقى .. مهتفتش هتاف واحد
كنت ماشى مع الماشين وخلاص .. زى قشة فى موجة
بتتحرك فى اتجاه مش عارفه هيوصل لفين

المحقق : وعقدة لسانك اتفكت دلوقت

حمدى : كان الخوف مالينى .. كانت كل ذرة فى كيانى بتنسحق
لما بتخيل ان الموجة حدفتنى فى وش اصغر عسكرى
من عساكرك

المحقق : (يصرخ فيه) وبقيت فدائى وبطل ومش فارقة معاك
ومحدث مالى عينك دلوقت

حمدى : اه .. بالظبط (وهو يلتفت لىواجه المحقق) عارف ليه ؟

المحقق : عرفنى يا رفيق

حمدى : لانك مخلتليش حاجة أبكى عليها .. انت مسختنى

المحقق : أنا معملتش حاجة غير انى قومت بعمل الواجب
واجب مقدس فى موجهة كتايب من الافاقين والمرتزة
بتنخر زى السوس فى بنيان دولة .. رسالتى وواجبى
بيحتموا عليا انى احميها

حمدى : لا يا باشا .. انت كده بتحل الواجب غلط .. لان مفيش
واجب فى الدنيا يخليك تتعامل مع بشر زيك وكأنهم كلاب
أو ققط

المحقق : ققط ؟! (مستخفاً وبحدة) وهو فيه ققط بتأسس
تنظيمات سرية وبتعمل مظاهرات تطالب فيها بإسقاط
نظام الحكم ..

حمدى : يا باشا لو الققط شافت اللى احنا شوفناه وجاعت زى ما
جو عنا .. كانت عملت أمم متحدة ومجلس أمن قومى
كمان .. بعدين احنا عملنا ايه غير اننا فكينا عن نفسنا
بكام هتاف .. يا اخى دا الققط لما بينداس على ديلها ..
مبتسكتش .. بتمد ضوافيرها وبتخربش وبتعلن عن ألمها
ورفضها واحتجاجها بكلمة نأاااااو(صارخاً فى وجه
المحقق) نأاااااااو

المحقق : (ببرود وهو يتأمله بنظرة حانقة) لو كنتوا نونوتوا فى
المطاهرة مكش حد جه ناحيتكم .. (صارخاً فيه) لكنكم
هتقم بسقوط النظام

حمدى : لاننا مش ققط. احنا بشر. ولينا الحق فى اننا نعيش
كبشر فهلكتير على بشر أنهم يطالبوا بانهم يتعاملوا
كبشر

المحقق : (صارخا فيه) جحود و خيانة و عدم انتماء و فراغة عين .. يعني اتحرمت من كل حاجة .. محدتش حاجة من مصر .. مشوفتش حاجة في مصر

حمدي : مكذبش على حضرتك .. مصر فيها كل حاجة .. لكن .. من غير أى حاجة .. اه بنشوف فيها كل شىء .. كل شىء يخطر على بالك .. (بمرارة وقد دمعت عيناه) بس بنشوفه وهو فى أيديكم أنتم .. أيديكم أنتم بس .. وأيديين ولادكم ومحاسبكم وحباييكم وكلابكم الناهشة فى لحمننا ..

المحقق : أحمدا ربنا انكم بتشوفوا .. عايشين فى أمان ومأنتخين ومش فالحين غير فى البصيص والبلقة اللي فى ايدين غيركم .. شعوب كثير زيكم وأحسن منكم .. مبتشوفش غير الجثث والانقاض وبرك الدم .. مبتسمعش غير أصوات القصف والرصاص وطريقة البيوت والمدارس فوق روس اللي فيها .. شعوب كثير زيكم وأحسن منكم .. بتغير منكم وبتجسدكم على الرخاء والاستقرار والتنمية ونعمة الأمن والأمان اللي انتو عايشين فيه .. وبتتمنى يوم واحد .. يوم واحد بس يعدى عليها من غير كوارث أو انفجارات .. لكن نقول ايه .. (وهو يتأمله بحقد) شعب اتعود على الدلع والجشع والبطر والنمردة .. عايزينها عراق ولا سوريا

حمدي : عايزينها وطن يا باشا .. عايزينها وطن بجد .. وطن بجد مش مجرد يافطة كدابة .. بتحمل اسم وطن بالكذب .. انتو خدثوا كل حاجة يا سعادة الباشا .. خدثوا كل البضاعة اللي فى الدكان .. شفطوه .. نفضتوه .. كنستوه .. مسحتوه .. مسبيتوش فيه طوبة على حيط ولا بلاطة فى أرض .. (يبتسم بمرارة) دا أنتم كمان بتعايروننا ؟ .. بتعايروننا لانكم سبيتولنا اليافطة .. (يضحك بينما تنهمر دموعه) يافطة كدابة مكتوب عليها اسم وطن بالكذب (صارخا فى هيستريا) احنا جيل اليافطة يا سعادة الباشا .. أحنا شعب اليافطة .. وجمهور اليافطة وابناء اليافطة .

المحقق : (يقاطعه مصعوقا) للدرجة دى ؟ .. جتلك الجرأة تهين الوطن وتزدرية وتحقره وتقلل منه للدرجة دى ؟ .. وفين ؟ فى تحقيق رسمى كمان ؟!!

حمدى : (وهو يعاود الاشاحة بوجهه والحديث هائمة غائمة وكأنه يحدث نفسه) اللي هان الوطن وحقره مش أنا يا سعادة الباشا

المحقق : آمال مين .. مين اللي حقن دمك الأسود .. الملوث .. بكل الغل والحقد وعدم الانتماء ده

حمدى : اللي خد منى كل حاجة ومسابلش من الوطن حاجة غير حنة الخشب .. اليافطة .. اللي لا تنفع تابلوه يتحط فوق رصيف أكل من وراه لقمة عيش .. ولا تنفعقارب أعبر بيه البحر .. ولا تنفع حتى نعش ..

المحقق : حنة الخشب اللي انت مستقل بيها دى .. لو تعرف المجهودات اللي بتبذلها الدولة عشان تحافظ لك عليها مكنتش تقول كده

حمدى : خلاص يا باشا .. تاهت ولقيناها .. خدوا حنة الخشب .. وخذوا الكراسى والمناصب .. (بنبرة متأثرة) بس سيبولى الوطن

المحقق : (بحقن) هتعمل لى فيها لطفى بوشناق يا ابن الكلب (وهو يضغط بيده على زر الاستدعاء) نسيب لك الوطن ؟! هو حد كان خده منك .. ما انت عايش على أرضه وتحت سماه أهوه يا ابن الجاحدة

حمدى : الفار والصرصار ودود الأرض هم كمان ليهم أرض وسما يا سعادة الباشا .. الوطن مش أرض وسما بس ..

(يضغط المحقق على زر الاستدعاء بعصبية بينما يردف حمدي)

حمدي : الوطن عدل .. الوطن رحمة .. الوطن حرية .. الوطن لقمة عيش نضيفة وشريفة .. الوطن حق .. الوطن حب .. الوطن كرامة

(يعادود الضغط على زر الاستدعاء وهو يرمقه بنظرات نارية)

المحقق : انت شكلك هتطول معانا كتير قوى .. **(متوعدا)** بس وحياة أمك .. ما هخليك تطلع من هنا غير لما اعرفك يعني أيه كلمة وطن

حمدي : انا عارف يعني ايه كلمة وطن اكثر منك واكثر من اى حد فى البلد دى .. انا محتاج اعرف حاجة تانية أهم

(يدخل عسكري (١) بينما يرمق المحقق حمدي بنظرة مستخفة)

المحقق : ودى تبقى أيه يا رفيق

حمدي : تبقى .. هي فين الوطن ؟

(يطرق برهة نشعر خلالها انه يحاول ان يكظم غيظه ثم يشير نحو حمدي ورضا وهو يقول لعسكري (١))

المحقق : خدهم على الحجز .. ووصي عليهم قوى .. سامعنى .. وصي عليهم قوى .. عايز لما أشوفهم المرة الجاية معرفهمش .. عايز لما أشوفهم المرة الجاية الاقيهم بقوا حاجة تانية خالص .. حاجة تانية تشبه البشر

إظلام

يظلم النصف الأيمن من المسرح ويضئ الجزء الأيسر، لنرى غرفة الحجز ، في أركان الغرفة نرى عدداً من المحتجزين معظمهم عراة الصدور التي تنسدل عليها لحاهم الطويلة المغبرة وهم يتحسسون مواقع السياط فوق ظهورهم ، بعضهم يصدر ضحكات متوجعة من حين إلى آخر ، والبعض نراه نائماً .. لكنه من حين إلى آخر .. نراه ينتبه منتظلاً .. ليتحسس مواضع ضرب السياط على جسده قبل أن يعاود النوم .

في منتصف الجدار المواجه ، نرى فتحة شباك ، يتخللها قضبان حديدية سميكة صدئة .. يقف أسفلها (محتجز ١) وهو يرسل نظرات مستطلعة قلقة نحو باب الحجز بعد أن نسمع صوت خطوات من خلفه .

على مقربة من باب الحجز ، يجلس (شيخ وقور) ملتحي وهو يداعب دباب سبحة في يده ، يفتح باب الحجز فتقف مجموعة المحتجزين ببطء وتهالك وتراجع حتى تلتصق بالجدران ، يبتعد (محتجز ١) في وقفته خطوة عن الشباك ، بينما نرى (عسكري ٢) ضخم الجثة وقاسي الملامح ، يقف على باب الحجز المفتوح وهو يحرك كرباج في يده .. حركة من يهيم بتسديد ضربة قاسية قاضية ، يدخل حمدى من باب الحجز مدفوعاً من الخلف دفعة قوية .. بينما يرتفع كرباج (عسكري ٢) ويهوى على مؤخرته بضربة عنيفة ، يعود بعدها (عسكري ٢) لتجريك الكرباج بنفس الطريقة .. حتى يدخل رضا مدفوعاً نفس الدفعة وينال نفس الضربة العنيفة من الكرباج على مؤخرته .

يغلق الباب ،فيتحرك حمدى ويمسك بتلابيب رضا ويصرخ فيه
حمدى : بقى أنا جريت منك عشان اهرب من الحساب يا قهوجى
 يا معفن

رضا : (وهو يمسك برقبته) وهو أنا يعنى اللي كنت صباع فى
 ايدك اليمين يا أهبل يا عبيط ضيعتنا .. روح منك لله ..
 الهى صوابك العشرة يتشلوا وتتفرج عليهم وهما
 مدلدلين من كفوف ايديك

حمدى : (يتركه بغيط) ربنا يشل لسانك الوحش ده .. حتى دول
 عايز تدلدلهم يا قهوجى يا نتن .. اتقوه عليك

(نسمع صوت هند من خارج غرفة الحجز)

صوت هند: برضو مجاش اللي اسمه حمدى يا اخويا

محتجز (١) : (يقترب من فتحة شباك الحجز ويقول هامسا) لا
 يا ست .. اللي دخلوا اتنين .. واحد قهوجى نتن والثانى
 أحمرانى مش أبيضانى زى ما انتى قولتى

صوت هند : طيب يا اخويا .. تسلملى .. ربنا يسوقه قادر يا كريم

حمدى : (وهو ينصت لصوت هند) الصوت ده زى صوت هند
 مرأتى (رافعا صوته) هند .. يا هند

صوت هند : حمدى

حمدى : (وهو يقترب من فتحة الشباك) هند

صوت هند : (بلهفة)حمدى

(يدفع محتجز (١) صدر حمدي دفعة قوية تبعده عن الشباك)
 محتجز (١) : أبعد عن الشباك يا زميلي وبلاش تبوظ لى الشغل
 حمدي : (مستغرباً) شغل أيه يا ابني .. أنت اهبل .. دى مراتي
 محتجز (١) : لا مش مراتك .. (وهو يشير نحو فتحة
 الشباك) هي قالت ان جوزها أبيضاني وأنت أحمراني ..
 (وهو يتأمل قفا حمدي وخديه) أحمراني مزرق كمان
 حمدي : (يقترّب من الشباك وهو يصرخ في محتجز (١)) هو
 أنت كنت مسنتي بعد السبعين قفا اللي خدّتهم أبقي
 أخضراني مقلم ولا فحلقي كاروهات (وهو يزيح محتجز
 (١)) .. أبعد .. بقول لك مراتي .. مراتي
 صوت هند : ده صوت جوزي .. سييه .. سييه يا اخويا انشالله
 حتى لونه يكون فسدي
 حمدي : (وهو يقرب وجهه من فتحة الشباك) هند .. هندوتى ..
 هندوتى حبيبتي
 صوت هند : حمدي .. حبيبى .. جوزى ونور عيني .. (وهي
 تبكي) حمروك يا قلبى
 حمدي : حمرونى وشونى (وهو يبكي) ولو كان عندهم زيت
 بيغلى كانوا قلونى وقرمشونى كمان يا حبيبتي
 .. بس صدقيني .. (محاولاً التماسك) أنا نسيت حمراى
 وزرقانى بمجرد ما سمعت صوتك .. وحشتيني .. وأمى
 وحشتنى .. والشارع وحشنى
 هند : هترجع لكل دول يا حبيبى .. كلها سواد الليل بس

حمدى : لا ياهند .. المحقق حطنى فى دماغه .. (وهو يبكى)
شكلى مش هطلع من هنا غير على طريقة حسين رياض
فى فيلم أمير الدهاء

صوت هند : متقولش كده .. ان شاء..

حمدى : (مقاطعا) لا .. زى ما يقول لك كده .. هى شكلها هترسى
على أمير الدهاء .. (فجأة يزداد تماسكه ويفرد قامته)
بس أو عدك انى مش هطلع زى حسين رياض .. لا ..
(صارخا) هطلع زى أنور وجدي .. عشان النذل ابن
عمك اللي اسمه حازم يبقى الأول .. عارفه يعنى ايه
الأول .. لأن هو اللي اتحرر وعمل فيها سعد زغلول ..
جاء رجلنا ولما اتزنقنا غطس ومشوفتوش تانى .. قوليله
حمدى طالع لك يا حازم وهي

صوت هند : أقول له ايه بس .. ده مرجعش من ساعتها وشباب
فى الحارة بيقلولوا انه اتصاب فى المظاهرة

حمدى : اتصاب ولا حتى اتقتل .. والنعمة ما هسييه لأنه السبب
فى ..

(صوت فتح الزنزانة يسكته فيقول لهند هامسا محذرا)

حمدى : ما تتكلميش .. الظاهر ان بدران جاى

(يدخل عسكري (٢)، يتفحص المحتجزين بنظرة وهو
يقول)

عسكري (٢): الاتنين بتوع مظاهرة النهاردة فين

(يقترب حمدى ورضا من عسكري (٢)، الذى سحب
رضا من ذراعه وهو يقول لحمدى متوعدا)

عسكري (٢) : خليك انت للاخر .. عارف ليه ؟

حمدي : ليه؟

عسكري (٢) : عشان انت حلو

(يخرج رضا مع عسكري (٢) ثم يغلق الباب ، فيهرول حمدي نحو الشباك)

حمدي : هند .. يا هند

صوت هند : نعم يا سبعي

حمدي : (برعب) سبعمك خلوه للاخر يا هند (وهو يبكي) هيجلوا بالسبع بتاعك يا بنت الفقرية ..

صوت هند : (تهمس له مقاطعة) أسمع .. العسكري اللي دخلني بيشاور لي عشان اطلع .. أنا عملت لك شوية أكل يخلوك تصلب طولك على ما نشوف اخرتها ايه .. مد ايديك من فتحة الشباك

(يرفع حمدي جسده ويدخل ذراعه من بين القضبان وبعد برهة من تحريكها يعود باصابعها وهي تمسك بعلبة كبريت، يتأمل علبة الكبريت بضيق وهو يقول)

حمدي : كل ده .. كل ده يا هند .. مكنش فيها داعي تكلفي نفسك كده .. انتي كمان محتاجة لمصاريف على ما أطلع

صوت هند : متشيلش همي .. لو ضاقت بيا هبقى اروح بيت بابا .. المهم انت متبقاش نفسك محرومة من حاجة .. يلا سلام

حمدي : (متأثرا وهو يرج علبة الكبريت بجوار أذنه) سلام يا حبيبتي

(بمجرد جلوس حمدى على الأرض وفتحته لدرج علبة الكبريت يلتف من حوله مجموعة المحتجزين - ما عدا الشيخ - وهم يتلمظون جوعا ، ينظر نحوهم بقلق وريبة وهو يقول)

حمدى : وحركات فيلم المغتصبون لزومها أياه دلوقت

الشيخ : مكانك يا ض انت وهوا .. (صارخا) ألزم محلك يلا

(ينفض جمع المحتجزين من حول حمدى ، ويشير له الشيخ إشارة تدعوه للاقتراب ، فيزحف فى وضع الجلوس وهو يرفع علبة الكبريت على إحدى يديه حتى يصبح جالسا فى مواجهته)

حمدى : (للشيخ) ربنا يوقف لك ولاد الحلال يا مولانا

الشيخ : (وهو يعود لمداعية حبات السبحة) مش من الانسانية ولا من الذوق تاكل قدام ناس جعانة

حمدى : (وهو يلوح بعلبة الكبريت) ما أنا قولت الحق الأكل قبل ما يبرد

الشيخ : (وهو يمد يده لحمدى) هات العلبة دى

حمدى : اتفضل

الشيخ : (وهو يضع علبة الكبريت فى جيبه) مش هتشوف العلبة دى غير لما كل الللى فى الحجز يبقوا نايمين (وهو يتفحصه بنظرة) أسمك حمدى

حمدى : أيوه يا مولانا .. حمدى فؤاد

الشيخ : (هائما وهو يداعب حبات السبحة) حمدى من الحمد وفؤاد من القلب .. أسمع حلو وله أشارات أحلى .. تعرف ان سيدنا النبی كان بیتفاعل بالاسماء

حمدى : عليه الصلاة والسلام

الشيخ : (وقد زادت نبرته شفافية وهياماً) أطمئن يا ابنى .. فرج الله قريب

حمدى : (بلهفة) بجد يا مولانا .. قلبك الطيب الطاهر حاسس بكده (باكيا) ربنا هیفرج کربنى دى قريب

الشيخ : اقرب مما تتخيل

حمدى : قول والنعمة

الشيخ : (وهو يرمقه بنظرة غضب) انت رغاى قوى

حمدى : معلش .. معلش يا مولانا .. أصلي ما صدقت الاقى حد ارتاح له .. تعرف يا مولانا ... وحق اللى جمعنا من غير معاد أنا من ساعة ما شوقتك وأنا متفاعل

(لا يرد الشيخ ولا يعيره أدنى اهتمام ، فيلح عليه حمدى قائلاً)

حمدى : عارف يعنى أيه متفاعل ؟ .. متفاعل يا مولانا متفاعل ؟

الشيخ : (وقد زاد غضبا) طيب غور من قدامى دلوقت

حمدى : اللى تشوفه يا مولانا .. بس لما تحقق لى طلب

الشيخ : (بنفاذ صبر) انتيل أطلب

(يفتح باب الحجز .. يدخل رجل بدين جدا وطويل جدا مدفوعاً من ظهره دفعة قوية تجعله يهرول حتى يصطدم بجدار الحجز ويسقط علي الأرض دون حراك، ومن خلفه يدخل عسكري ٢ وهو يشير نحو حمدي)

العسكري : يلا يا حلو دورك جه

(ينهض حمدي ممسكاً بالورقة والقلم ،ويواجه عسكري ٢ قائلاً بحدة)

حمدي : لا أسمع .. أنا قبل ما اتحرك خطوة من هنا وقبل ما قلم تاني يطرق علي قفايا لازم اعرف صاحبي فين .. رضا القهوجي فين .. انا سيبتهلوكم عشان تعذبوه مش عشان تقتلوه .. رضا فين يا عسكري .. وديت الواد فين

العسكري : (وهو يرفع الكرباج حتى اخر ذراعه) خليك في حالك ويلا

حمدي : مش هيلا .. هاتولي رضا الأول (يهرول نحو باب الحجز ويتعلق في فتحته وهو يصرخ) رضا .. يا رضا (تهوى يد عسكري (٢) الممسكة بالكرباج على ظهر حمدي)

عسكري (٢): يلا يا كلب

(من داخل الحجز نسمع صوت رضا يقول متوسلاً)

رضا : سيبه يا عسكري .. متضربوش .. متضربوش بسببي .. أنا رضا يا حمدي

حمدي : (وهو لازال يرسل صرخاته نحو الخارج) أيوه يا رضا .. سامعك .. سامعك يا صاحبي انت فين .. وعائش ولا ميت .. وليه مرجعتش الحجز تاني

(يرفع عسكرى (٢) الكرباج ويهوى على ظهر حمدى
بضربة اخرى)

رضا : (بنبرة واهنة متقطعة) أنا فى الحجز يا حمدى .. ولسه
داخل عليك دلوقتى

(يلتفت حمدى ليلقى نظرة نحو جسد الرجل الطويل
البدين الساقط على الأرض)

حمدى : لا .. ده مش انت يا رضا .. ده واحد تانى أتخن واطول
منك بكتيبير

رضا : لا .. أنا .. أنا رضا .. رضا يا حمدى

حمدى : (بعصبية) آيه رضا يا حمدى دي .. حاجة كده زى أحمد
يا عمر .. بقول لك اللى دخل دلوقت حد تانى .. اطول
واتخن منك

رضا : (باكية) الحد ده أنا .. والنعمة أنا .. أنا رضا القهوجى يا
حمدى

(يترك فتحة الباب ويستدير نحو الحجز ، يتحرك
بخطوات متثاقلة نحو الجسد الساقط على الأرض وهو
يقول بنبرة حزن شديد)

حمدى : ازاي .. ازاي يا رضا .. بقيت كده ازاي

رضا : نفخونى يا حمدى .. نفخونى

حمدى : (وهو يميل على جسد الرجل الساقط على الأرض) اللى
بينفخ بيخن .. وانت متخننش بس يا رضا .. (وهو يرفع
رأس الرجل من على الأرض) انت تخنت وطولت

رضا : مهم نفخونى بالعرض وبالطول .. نفخونى من كل الزوايا
ولاد الكلب

(مع موسيقى مناسبة تسقط رأس رضا على الأرض
وهو يهمس ببيرة من تفارقه الروح)

رضا : ول اد ال كلب

(يرفع عسكرى (٢) الكرباج ويهوى على ظهر حمدى
بضربة اخرى وهو يقول)

عسكرى (٢) : يلا يا كلب

(ينظر حمدى مصعوقاً نحو رأس رضا ويستكين جسده
برهة رغم توالى ضربات كرباج عسكرى (٢) فوق
ظهره .. بعدها .. يهتز جسده .. يهتز متشنجا ونسمع
صوت بكاءه .. وفجأة .. تفلت شفتاه صرخة عميقة
مكلومة عاصفة مدوية)

حمدى : رضااااااااا ..

(يرفع عسكرى (٢) الكرباج ويهوى على ظهر حمدى
بضربة اخرى وهو يقول)

عسكرى (٢) : يلا يا كلب

(يحرك جسد رضا .. يضغط بيديه على صدره وهو
يصرخ)

حمدى : رد عليا يا رضا (يبكى) .. رضا ..

(يرفع عسكرى (٢) الكرباج ويهوى على ظهر حمدى
بضربة اخرى وهو يقول)

صوت هند : رضا تانى .. وقتل كمان .. هو انت حكايتك أياه
صوت المحقق : يا ابنى ومين قال لك أنه اتقتل .. رضا انتحر
صوت حمدى : (صارخا) رضا منتحرش .. رضا اتقتل .. واخر
حاجة عملها قبل ما يموت على دراعى ده .. أنه لعن
الكلاب اللى قتلوه

صوت هند : الحمد لله ان الصبح صبح .. يلا قوم ..
صوت المحقق : على دراعك ده !!.. يبقى انت اللى قتلتاه (مغيرا
نبرة صوته) سجل عندك

صوت حمدى : انت بتقول أياه
صوت المحقق : وفى مساء يوم الثلاثاء الموافق الثامن من يونيو
سنة الفين ومائة وعشر ، ووفق ما أكد شهود عيان داخل
الحجز

صوت هند : حمدى .. حمدى .. (بعصبية) قوم يا راجل
صوت المحقق : قام المتهم حمدى فؤاد مصطفى بالاعتداء
المبرح على المحتجز رضا سيد عبد العال
صوت حمدى : كداب ..

صوت هند : يا راجل مين اللى كداب .. قوم بقى
صوت المحقق : بسبب رغبته فى تقديم معلومات الى جهة
التحقيق

صوت حمدى : كدايين
صوت هند : (محتدا) انت أكيد اتجننت

صوت المحقق : تثبت تورطه فى تأسيس وإدارة تنظيم سرى
يهدف إلى تكدير الأمن العام وقلب نظام الحكم

صوت حمدي : قتلة ..

صوت هند : قتلة كمان .. لأبقى .. شكلك مش هتصحى بالذوق

صوت المحقق : وتلقى معونات مالية وعينية من جهات أجنبية

صوت حمدي : سفلة ..

صوت هند : طيب .. أنا هفرجك على السفالة اللى بجد

صوت المحقق : مما دفعه الى التحرش به واصابته باصابات
قاتلة أدت الى وفاته ..

صوت حمدي : يا ولاد الكلب ..

صوت هند : وكمان بتغلط فى الأبهات .. طيب خد

المشهد الثاني :شقة والد حمدي

(يضيء المسرح في الثلث الذي تشغله غرفة نوم حمدي ، لنراه نائما على سريره في وضع من يعاني من رؤيه كابوس ، بينما تجلس هند بجواره وهي تعصر قطنه مبللة بالماء على وجهه، حتى نراه يستيقظ مفزوعا)

حمدي : أشهد ان لا اله الا الله واشهد أن محمد رسول الله .. أيه فيه ايه (وهو ينظر نحو هند مندهشا) انتى دخلتى الحجز ازاي

هند : حجز ؟! هي فيها كمان حجز

حمدي : (وهو يتلفت حوله) أيوه الحجز .. اللي جبتي لى فيه الزياره .. (في محاولة لأن يجعلها تتذكر) اللي مليتى بيها علبه كبريت خمسين عود

هند : والله أنا لو معايا خمسين عود كبريت مرة واحدة كنت عملت بيهم حاجة تانية خالص (وهي تتأمله بغضب) طيب قوم (وهي تلطم على وجهها) قوم يا أبو بتتجانه

حمدي : (مندهشا) بتتجانه (متفكرا) بس الحلم مكنش فيه بتتجان **هند :** الببتجان كان فى الواقع .. قبل ما تتخمد .. وياربتك فلحت (تهمس بنبرة مهمومة وهي تهبط من فوق السرير) يعنى يا رب توقعنى فى واحد فاشل حتى بالببتجان

حمدي : (وهو يمعن متفكرا) بتتجان .. أنا سمعت الاسم ده قبل كده .. اه .. عم على .. الساساة .. (رافعا صوته وهو يشير نحو هند) هو أنا دخلت عليكى أمبارح بببتجانه

هند : أيوه .. وياربتك ما دخلت

حمدى : (برعب) اوعى تقوليلى خدت منها حة قد ورقة الدومنة
هند : (وهي تنظر له بغيط) الأولانية اللى كانت قد ورقة
الدومنة (وهي تشير بيدها إشارة الدق بالهاون) بتاعة
الهون

حمدى : (وقد تجهم وجهه) عايزة تقوليلى انى خدت حة تانية
هند : أبوه .. ومش قد ورقة الدومنة .. دى كانت (وهي تفرد
كف يدها اليمنى) قد ورقة الكوتشية

حمدى : (بحزن) ودى عملت بيها أيه .. غطست جواها
هند : بزعتها .. وبعدين قعدت تهلوس وترقص فوق السرير
يجى ساعة .. لحد ما اتخمدت ومحتطش منطق زى اللى
دأست فوق منه دبابه

حمدى : تبقى جرعة البتتجان زادت وجت بأثر عكسى .. هو كده
.. اى شىء بيزيد عن حده بينقلب لصدّه

هند : أنا كمان اللى شوفته معاك من ساعة ما اتقفّل علينا (وهي
تشير نحو باب الغرفة) باب المخروبة دى .. زاد عن
الحد وهيخلينى اتقلب بجد

حمدى : (برعب) لا والنبي .. بلاش من سيرة الانقلابات ..
متفكر نيش بلى حصل لرضا .. كفاية اللى شوفته فى
الكابوس

(نسمع صوت دقات على باب الشقة ، فيشير نحو باب
الغرفة)

حمدى : وده مين اللى هيجى لنا دلوقت .. روحى افتحى

(تهم هند بالخروج بينما نسمع صوت الدقات مرة أخرى
تفتح باب الغرفة في نفس توقيت إضاءه الجزء الأول من
المسرح وظهور منال وهي تعدل من وضع الروب على
جسدها)

منال : (وهي تتجه نحو الباب) حاضر .. حاضر .. لحظة واحدة

هند : (وهي تغلق باب الغرفة) منال راحت تفتح

حمدي : (وهو يهبط من فوق السرير) هحصلها يمكن يطلع
المحصل بتاع شركة الهوا .. (بحمية وحماس) لازم
أشده شدة حلوة .. إيصال الهوا بتاع الشهر اللي فات جه
مولع كالعادة .. مع أن البيت كله مناخيره كانت مسدودة
.. ودور الانفلونزا اللي لف على العيلة كلها .. خلى
محدث فينا كان قادر ياخذ نفسه.

(يظلم الجزء الثاني من المسرح وتفتح منال ياب الجزء
الأول فيدخل حازم ، لنراه يلف رأسه بقطعة شاش
ملطخة بسائل أحمر)

منال : اهلا حازم .. (بلهفة) مالك .. الف سلامة

حازم : اطمنى .. مفيش حاجة .. ده أثر طلاقة خرطوش اتضربت
عليها في مظاهرة امبارح

منال : ونضفتها كويس .. أحسن تكون بذرة سفندي سكنت جوا
الجرح

حازم : (مستخفاً) سفندي أيه يا منال .. خرطوش بذر السفندي
ده كان زمان .. النظام المجرم بقى بيستعمل أسلحة
محرمة دوليا في فض المظاهرات (بغضب) بقى بيستخدم
خرطوش بذر التين الشوكي .. شوقنى إجرام أكبر من ده

منال : (وهي فاعرة فاها) المجرمين .. الظلمة .. ربنا ينتقم منهم
(وهي تربت على كتفه) أقعد علي ما عمل لك حقنة
عتاب سافع تعوض الدم اللي نزل منك

حازم : مفيش داعى .. أنا لسه ماصص ورقة كركديه خام عشان
تأثيرها يبقى سريع

منال : ماشى يا حبيبى .. شوية كده (وهي تشير نحو المطبخ)
واجيب لك حاجة تلحسها .. أقعد .. خد راحتك

(يدخل حمدي من باب الجزء الثاني من المسرح ، فيفاجأ
بوجوده)

حمدي : الله .. حازم ! .. (وهو يشير نحو رأس حازم) وأيه ده
.. (بغضب) مين ابن الكلب اللي عمل فيك كده

(ينظر حازم نحوه نظرة عتاب مستخف ولا يرد ، فتثور حمية
حمدي أكثر)

حمدي : مين عمل فيك كده .. قول لي عشان أنفخه .. (متراجعا)
ولا بلاش من سيرة أنفخ عشان بتفكرنى برضا .. قول لي
عشان أقطعه

حازم : بلاش انت يا حمدي .. خلاص .. مبقتش أصدقك .. لان
هروبك من الميدان امبارح كشفك

حمدي : يا حازم أنا مهربتش .. أنا امبارح انسحبت انسحاب
تكتيكى

حازم : (ساخرا) عشان تحمى البتجانة اللي أول ما لقيتها واقعة
خدتها فى حضنك وجريت

حمدي : ما انت شوفت البلطجية كانوا بيستغلوا الانفلات الأمنى
الى سببته المظاهرة بيعملوا ايه فى المحلات

- حازم :** قوم لما تعوز تنقذ حاجة .. تروح تنقذ بتجانة
- حمدى :** مش هي اللي وقعت فى وشى .. هو كان وقع قدامى
علبة حلاوة طحينية ولا حتى بطيخة .. وأنا قولت لا
- حازم :** (بطريقة محقق) أفهم من كده انك عملت زى أى مواطن
شريف .. وروحت سلمت البتجانة لأقرب قسم شرطة
- حمدى :** كنت ناوى أعمل كده .. (بنبرة دفاع عن النفس) صدقتى
وكنت هطلع على مديرية الأمن رأسا مش القسم بس ..
لكن لما فكرت فى الموضوع كويس تراجع
- حازم :** (بنبرة اتهام) يعنى ما سلمتش البتجانة للشرطة
- حمدى :** مش طمع فيها يا حازم .. صدقتى
- حازم :** امال يعنى حماية لمستقبلها .. قول لى .. (وهو يشير نحو
منار ونحو هند التي دخلت من باب الجزء الثاني) قدام
اختك ومراتك .. مسلمتش البتجانة للشرطة ليه
- حمدى :** لان البتجانة مكنش ليها رقم شاسيه .. يعنى كده كده يا
ناصر لو سلمتها للشرطة مكنوش هيقدرُوا يستدلوا على
صاحبها ..
- حازم :** ده مش مبرر يا حمدى (بصدمة) مكنتش اتوقع ان انت
تعمل كده
- منال :** (وهي تتحسس بطنها متألمة) يعنى أيه .. يعنى شوربة
البتجان اللي اكلتها انا امبارح من بتجانة حرام ..
مسروقة
- هند :** (وهي ترمقه بنظرة ضيق شامت) وأنا أقول ليه وكستك
امبارح كانت زى وكسة الباباغوج

- حازم :** (وهو يتحرك نحو باب الشقة) قدرك بقى
- حمدى :** (صارخا) يعنى أيه قدرى .. وأسمعنى أنا .. حازم
- حازم :** نعم
- حمدى :** تفكر لو نزلت الشارع هتيجى لهم الجرأة يواجهونى
- حازم :** أكيد .. ومش يعيد العيال الصغيرة يزفوك ويقولوا
حرامى البتجانة أهوه
- حمدى :** (يهزول نحو حازم ويمسك بيده) طيب استنى ..
متسيبنيش .. أبوس أيدك متسيبنيش
- حازم :** مش فاضى يا حمدى .. لان أنا كمان فى ورطة كبيرة
- حمدى :** الجزيرة صورتك فى حضن بتجانة انت كمان
- حازم :** لا .. لكن الشباب اللي عالجونى امبارح جايبين لى كمان شوية
على القهوة .. اتفقنا نتجمع وننسق سوا ونتحرك مع بعض
خصوصا بعد ما عرفنا المصيبة اللي بيخطط لها بهجت
أبو العنين
- حمدى :** ومالوا بتاع البيض ده كمان
- حازم :** فاكّر عقود العمل اللي فرقها على المتظاهرين امبارح ..
عشان يفض المظاهرة ويقضى عليها فى مهدها
- حمدى :** اه .. واستفزنى أكثر لما عرفت ان معظم عقود العمل
كانت فى اسرائيل
- حازم :** الاستفزاز والمصيبة الأكبر مش فى كده .. انما فى
الشغل اللي هيشغلوه فى اسرائيل وفى غيرها

حمدى : واللى زى دول هيشغلوا ايه يعنى فى اسرائيل.. ولا فى غيرها .. هما بيعرفوا يعملوا حاجة غير انهم يعيطوا

حازم : مهو ده مرتبط الفرس

حمدى : ايه ؟ هما هيشغلوا ايه هناك

حازم : معيطاطية

حمدى : معيطاطية .. يعنى أيه؟

حازم : يعنى يعيطوا

حمدى : فى الجنازات

حازم : لا .. فى الغيطان .. والمزارع

حمدى : ياااه .. هى الناس دى بتحب الزرع للدرجة دى .. ويوصل بيهم الحب لدرجة انهم يشغلوا عندهم ناس مخصوص .. عشان تعيط على الزرع لما يموت

حازم : لا يا ناصح .. دول بيشغلوا المعيطاطية عندهم .. عشان يعيطوا على الزرع بدل ما يموت .. يعيطوا على البذر عشان ينبت والنبت عشان يخضر

حمدى : (مصعوقاً) تقصد ؟!!!

حازم : أيوه .. الناس اللي سافرت سافرت عشان تبقى مصادر رى دائم ومنخفض التكلفة فى الدول اللي سافرت لها

حمدى : أنت أكيد بتهرج

حازم : انت اللي عبيط ومش فاهم حاجة .. العالم كله بيعانى من ندرة المياه العذبة .. خصوصاً بعد جفاف أهم وأطول انهار العالم .. النيل فى مصر والأمازون فى أمريكا الجنوبية والمسييسيبى فى الشمالية واليانجستى فى الصين والكونغو وأركون ولينا وفنلاي وغيرهم .. يا ابنى ده خلال سنين قليلة جاية .. نقطة المية هتبقى أغلى من برميل البترول

حمدى : أيوه .. أيوه .. (متفكراً) بس زرع أيه ده اللي يتروى بالدمع

حازم : وهو الدمع أيه غير ميه

حمدى : بس مالحة .. ساعات لما بيعيط فى بقي .. (موضحاً بعدما لاحظ استغراب حازم) يعنى لما نقطة دمع تنزل على شفتى .. بحس ان طعم الدمع مالح

حازم : ه يكون أشد ملوحة يعنى من مية البحر

حمدى : لا طبعاً .. بس حتى لو سلمنا بكل كلامك .. من حيث الكم مش هينفع .. بمعنى .. لو جينا بنى ادم لسه امه ميتة ودفسنا راسه تحت جدر بطاطساية مش هيشبعها مية

حازم : ده لو الرى هيبقى بطريقة الدفس .. يعنى الغمر يا ناصح **حمدى :** تقصد ...

حازم : (مقاطعاً) أسم الله عليك .. اديك ابتديت تفهم .. طرق الرى الحديثة يا حمدى .. رش وتنقيط وكمان نشع

حمدى : (مستغرباً) نشع .. يعنى الفلاح لما يستيقظ مبكراً وحد يقول له رايح فين يقول له أنا رايح أنشع الزرع بتاعى

حازم : (بضيق) لو هترجع تستظرف أمشى أنا .. واروح استنى الناس المحترمة اللي هتجبنى

حمدى : (وهو يمسك بذراعه) لا استنا .. استنا .. دا انت فتحت
عنيا بكلامك ده على حاجات كتبيبيير

حازم : زى أيه؟

حمدى : زى السفر

حازم : سفر مين؟

حمدى : سفرى

حازم : أنت تسافر؟!

حمدى : وليه مسافرش .. هما اللي سافروا أعيط منى فى أيه ..
دا أنا أقدر أنقط قد خمستاشر من اللي سفرهم بهجت

حازم : وتسبب مصر .. يجى لك قلب تسيبها

حمدى : هو انت شايف مصر بتتصل بيا كل شوية عشان تظمن
على صحتى .. ولا قولت لك ان مصر بتيجى تخبط كل
يوم على باب اوضتى ولما اقولها بتخبطى ليه يا مصر
؟.. تقول لى .. كنت عايزة اعرف اذا كنت محتاج حاجة
منى قبل ما أنام .. (بجدة) حازم .. مصر متعرفش
الأشكال اللي زى .. ولا تفرق معاها الأشكال اللي زى
عشان كده بعدتني وأنكرتني وسابتني لحد ما جوعت
وأتحرمت واتمست وبقيت مجرد برميل دمع .. برميل
دمع مبيعرفش يعمل حاجة .. غير أنه يبكى

حازم : حتى لو كلامك صح .. الهروب مش حل .. وتراب
الأرض دى له حق عليك و ..

حمدى : (مقاطعا) كلامك مش هيجيب نتيجة .. هسافر يا حازم
يعنى هسافر

(ينفتح باب الجزء الثاني وتخرج هند وهي تتصل من
ذراع منال بصورة توحى بأن منال كانت تحاول منعها
من الدخول)

هند : (بعصبية لحمدي) سفر أيه اللي هتسافره عشان تنقط
لوحديك

(الذي فوجيء بدخولها وسامعها للحديث ، يرتبك برهة ثم
يقول)

حمدي : هبقى وحدي مؤقتاً يا حبيبتي .. سنة ولا اتنين بالكثير ..
على ما ظروفي تستقر هناك وأبعت اجيبك تنقطي معايا

(وهو يسحب حمدي من ذراعه ويواجهه بحدة)

حازم : لأ حاسب .. أنا ماليش بنات عم تنقط برة البيت

حمدي : (بنبرة تحدّ وهو يخلص ذراعه) بنت عمك دي مراتي
.. وأنا الوحيد اللي يحدد اذا كانت تنقط ولا متنقطش ..
ولما تطلب معايا انها تنقط .. يبقى هتنقط .. وفي المكان
اللي أقول لها تنقط فيه .. ان شاء الله في الاسكيمو .. (بنفاد
صبر) يا اما عليا الطلاق ل....

حازم : بس .. متكلمش

حازم : واضح ان اعصابك تعبانة .. عشان كده مش هضغط
عليك .. وواضح كمان اني تجاوزت حدودي في الكلام
عن هند .. وده لانها مش بنت عمي بس .. وانت عارف
كده .. هند اختي الصغيرة .. لكن انت كمان جوزها وقبل
ما تكون جوزها انت حب عمرها (وهو يشير نحو منال)
زي ما منال حب عمرى .. احنا الاربعة كنا وهنفضل
طول العمر في مركب واحد .. وعشان كده

حمدى : (بنبرة اعتذار) متكلمش يا حازم .. انا اسف .. بس
عشان خاطرى .. بلاش تكلمنى تانى فى موضوع السفر
حازم : حاضر .. مش هقول لك متسافرش .. لكن عشان أطمئن
عليك .. قول لى .. هتسافر فين ؟

**(ينظر برهة نحو حازم متفكرا ، ثم يطوف في أرجاء
المسرح وكأنه يفتش عن شيء وهو يقول)**

حمدى : فين .. فين .. تنقط فين يا حمدينو .. تنقط فين .. فين ؟
حازم : أسهل عليك الموضوع .. أقول لك اختيارات .. امريكا
روسيا ايطاليا فرنسا

حمدى : (وهو يشير بعلامة الرفض) لا .. يا حازم لا .. ولا دولة
من الدول دى تلزمنى

حازم : ليه ؟

حمدى : مش حابب أنقط وأنا سقعان .. فكر معايا فى بلد دافية

حازم : الهند مثلا

حمدى : هند أيه بس .. هم الهنود بيزرعوا غير جوز الهند
والموز والرز والمانجة والتمر هندى

حازم : يبقى نشوف لك دولة فى الخليج او على الساحل الافريقي

حمدى : عشان يقولولى بطاطس وبامية وقدقاس والحاجات
المزحلقة دى .. لا يا حازم .. لا .. الراجل منا لما يقرر
ينقط .. يبقى لازم ينقط صح .. وفى المكان الصح

حازم : زى أيه مثلا

حمدى : زى أفغانستان (وقد لمعت عيناه وهام صوته) أفغانستان
.. هى أفغانستان

حازم : (بنبرة شك) وليه أفغانستان تحديداً

حمدي : عشان أنقط بمزاج .. أنقط وأنا متكيف وأعمل في شهر واحد أكثر من اللي هيعمله خمسين نطع من اللي سفرهم بهجت في سنة كاملة

حازم : (بنبرة ذاهلة .. كنظرات هند ومنال) تبقى نويت تنتنقط على مخدرات

حمدي : (وقد زاد هياما) أيوه .. ومش هعتق .. خشخاش ماشي كوكايين ماشي هيروين ماشي يانجو ماشي .. انشالله حتى أنقط على غيط مزروع برشام أبو صليبة .. هنقط وأدوس ومعتقش .. وفي نفس الوقت أمسك أيدي واحوش اللي يطلع لي بعد ما ابعت المصاريف لهند .. سنة والثانية يبقى معايا فلوس .. اشترى بيهم فدانين تلاتة .. ازرعهم مخدرات وأنقط عليهم لحسابي .. بعدها

حازم : (مقاطعا) بس .. بس

حمدي : لا لسه .. انا مسلسل صعودي لسه منتهاش

حازم : لكن مسلسل سقوطك انتهى .. انت خلاص ركعت وسقطت وانتهيت ..

حمدي : انت بتقول أيه

حازم : بقول الحقيقة .. أنت انتهيت يا حمدي .. مت .. عارف يعني أيه مت .. أنا دلوقت بتكلم مع انسان ميت

حمدي : ميت ؟!! ميت عشان بقي عندي طموح ؟

حازم : (بعصبية) اللي عندك ده مش طموح .. دي انتهازية وانتفاعية وانانية وانسحاق وتقزم وتردى ووهن .. ده اللي فكرت فيه .. ده اللي قدرت تقدمه لمصر في محنتها.

حمدى : (بضيق بالغ) تانى هيقول لى مصر

حازم : تانى وتالت وعاشر .. (بيأس) بس حتى لو قولتها لك مليون مرة .. ده هيغير أيه فى انسان ميت .. (وهو يرمقه بنظرة ازدراء) انت ايه .. بدل ما ضميرك الوطنى يتحرك وتحط ايدك فى ايدينا عشان نرجع ولاد بلدنا الغلبة .. المغرر بيهم .. تقول لى هسافر .. يا اخي عيب .. عيب عليك بجد .. امبارح تبيع الثورة ببتجانة والنهاردة عايز تبيع البلد كلها عشان فرصة عمل ضد كرامتك كبنى ادم

حمدى : (صارخا فى حازم) وأيه فى البلد دي مش ضد كرامتي كبنى ادم .. اللقمة اللي باكلها ولا المية اللي بشربها ولا المواصلات اللي بركبها .. ولا ولا ولا .. وبعدين احنا هنروح بعيد ليه .. يا سيدى شوف لى شغلانة أوضع من دى هنا وأنا استننا .. شوف لى حتى موة كريمة فى البلد القاسية دى وأنا أموت راضى واقول احمدك يا رب .. يا حازم دى مش بلدنا .. صدقنى .. البلد اللي ميبقاش ليننا فيها كرامة لا واحنا عايشين ولا حتى واحنا ميتين .. تبقى مش بلدنا

حازم : البلد دى بلدنا .. وهفضل بلدنا .. بس انت اللى بقيت أعمى وجاحد

حمدى : خلاص .. خليك فى بلدكم .. وسيبوني أنا ادور على بلدى الحقيقية .. اللى الاقى فيها حقوقى وكرمتى وانسانيتى.

حازم : براحتك .. بس لو لفيت الدنيا كلها .. وملقتش اللي انت بتدور عليه .. لو اكتشفت بعد فوات الاوان ان جذورك وهويتك وقيمتك الحقيقية في البلد دي .. وفكرت ترجع لها تانى .. متنساش وقتها تبقى تفكر حاجة تانية أهم

حمدى : ودى تطلع أيه

حازم : (وهو يتحرك خارجا) ان مبقاش ليك فيها صديق أو أخ اسمه حازم

حمدى : (وهو يهرول خلفه) حازم

هند : (وهي تهرول نحو غرفتها) ولا زوجة اسمها هند

حمدى : (وهو ينظر نحو هند مصدوما) : هند

منال : (وهي تغادر المسرح) ولا أخت أسمها منال .. عارف ليه (وهي تهرول باكية) لان النهاردة أخويا الوحيد مات

حمدى : ليه ؟ يتحكمونى ليه .. بتعذبونى ليه .. (صارخاً وهو يشير

نحو الأبواب المغلقة) أنت ميت .. أنت ميت .. أنت ميت .. انت ميت

ماشى .. أنا ميت .. طيب لو حتى افترضت انى مت .. (فترة

صمت يفكر خلالها) ذا الميت بيصعب على العايشين ..

الميت بيكي عليه العايشين .. الميت .. العايشين بيقتكروا له

حاجة حلوة .. (بعد فترة صمت أخرى) ليه مصعبتش عليكم

!!؟ .. ليه محدش فيكم بكى عليا ؟!! .. ليه محدش فيكم افكر

لى حاجة حلوة ؟!! .. (صارخاً) لبييه ؟!! .. ليه يا عايشين يا

فاهمين يا ولاد ال .. ليه ؟ .. (يصمت برهة متفكراً ثم يقول)

أنا عارف ليه ؟ .. لان أنتو كمان ميتين .. كلكم ميتين .. أيوه ..

مش أنا بس اللي ميت .. أنتوا كمان ميتين

(ثم وهو يستدير لىواجه الجمهور) انتو كمان ميتين

(يسقط على الأرض بينما يظلم المسرح تدريجياً).

المشهد الثالث :القهوخانة

(جو المقهى العادي ، نفس الزبائن ونفس حركة رضا بينهم،
في ركن قصي نرى حازم على رأس مائدة تجمع عدداً
من الشباب ، يبدو منهمكا وقد بدا واضحاً أنه امتلك
سيمات الزعيم وهو يقول للمجموعة)

حازم : يا جماعة ده رابع اجتماع لينا بس.. يعني احنا مش
متأخرين ولا حاجة .. كمان لازم مجموعتنا نتعرف أكثر
ببعض وتشكل فيما بينها تحالف واحد ينظم حركة الكل .

ثائر (١) : وبالنسبة للتعامل مع الأمن .. انت شايف ان من
الصح نحافظ على نفس التكنيك

حازم : طبعاً لا .. لان التكنيك اللي انت بتتكلم عنه بتاع ٢٠١١
و٢٠١٣ و٢٠١٦ و٢٠٢٤

واحنا دلوقت في ٢١١٠ .. زى ما التكنيك الامنى اتطور فى
فض المظاهرات احنا كمان تكنيكنا فى التحرك والمواجهة لازم
يتطور .. فى القرن اللي فات كانوا بيستخدموا قنابل الغاز المسيل
للدموع ودلوقت استبدلوها بالغاز الحابس للدموع .. زمان كانت
خراطيم المية العذبة من ضمن وسائل الفض .. وكان المتظاهر فى
القرن اللي فات لما بيعطش ببروح يفتح بقه قصاد اقرب خرطوم
ليه ويشرب ويرجع تانى لصفوف المظاهرة .. دلوقت بقوا
بيستعملوا خراطيم ميه مجارى عشان هما عارفين ان اللي هيتوسخ
مش هيعرف يستحمأ وهيقدر بعد المظاهرة يقبضوا عليه من تتبع
ريحته .. حتى ال...

ثائر (٢) : (مقاطعا) بمناسبة موضوع الشرب .. احنا متكلمناش
عن طريقة لعلاج السقطة الفظيعة بتاعة المظاهرة اللي
فانت

ثائر (٣) : (بضيق) بقى نص المتظاهرين يسيبوا المظاهرة ..
وينضموا للأمن .. بمجرد ما يشوفوا ضابط من ضباط
فض المظاهرة بيلوح لهم بقزاة ميه مشبرة ..

(ينهض ثائر (١) متحمسا ليرفع صوته هاتفاً)

ثائر (١) : مهما تشاوروا بميه ساقعة .. نار الثورة هتفضل والعة
مجموعة الثوار : مهما تشاوروا بميه ساقعة .. نار الثورة
هتفضل والعة

حازم : (بعد عودة المجموعة للجلوس) فى منشور الدعوة
للمظاهرة الجاية هيكون من ضمن التعليمات .. ان كل
متظاهر يحط قطنته المبلولة بالميه أو بنوع العصير اللي
بيفضله .. فى كيس بلاستيك وياخده معاه قبل ما ينزل
المظاهرة .. عشان لما يعطش يطلع القطنه ويمص

(ينهض مرة أخرى ليهتف بالحماس نفسه)

ثائر (١) : دم شهيدنا فى التحرير .. مش هنبيعه بكانز عصير
مجموعة الثوار : دم شهيدنا فى التحرير .. مش هنبيعه بكانز
عصير

(بعد جلوس مجموعة المتظاهرين ، يهم حازم بمعاودة
الحديث ، لكن نظرة منه نحو الكالوس الأيسر تعقد
لسانه عندما يرى حمدي وهو يجر حقيبة السفر ومن
خلفه والده)

فؤاد : أنا طول عمرى مش طايقك .. وحاسس ان خلفتى ليك
كانت أكبر جريمة عملتها فى حق نفسى .. لكن من ساعة
ما واجهتنى بموضوع سفرك واحاسيسى كلها اتغيرت
ناحيتك

حمدي : أنا كمان إحاسيسى اتغيرت ناحيتك يا بابا .. وابديت أحس انك أبويا

فؤاد : طيب لو أبوك غالى عليك بلاش تفترى على نفسك .. وراعى صحتك كويس وزى ما قولت لك .. لازم يوم فى الاسبوع متنقطش فيه

حمدي : يا بابا مينفعش .. دا أنا لو اطول أنقط على شيفتين كنت نقطت .. أنا عايز أسبق الزمن واحقق كل الاحلام اللي فاتنى تحقيقها

(يتظاهر حازم بعدم الانتباه برغم اقتراب حمدي مع والده من مائدته ، يترك حمدي الحقيبة ويهم بالتحرك نحو حازم ، لكن نظرة باردة متجاهلة من حازم تجعله يتراجع ويعود ليمسك بسحاب حقيبته مع دخول هند قائلة)

هند : (لحمدي) قبل ما تنقط نقطة واحدة بعيد عن هنا طلقنى .. وبالتالاة

حمدي : يا هند افهمينى بقي .. أنا هسافر واتحمل تنقيطى فى الغربية عشانك انتى وعشان اعمل مستقبل افضل لينا ولولادنا .. أنا لسه متمسك بيكى وهفضل متمسك بيكى لآخر نقطة دمع فى عنيا

هند : ما تحاولش تأثر عليا بكلامك الحلو .. أنا قرارى نهائى

(يدخل عزمي من نفس الكالوس ممسكا بعصاة)

عزمي : (لحمدي) يمين الطلاق هترميهِ على بنتى قبل ما تتحرك خطوة واحدة من هنا (وهو يرفع العصاة فوق رأس حمدي) يا أما هخبطك خبطة تصفى دموعك على الأرض (وهو يشير نحوه إشارة تهديد) عشان بيقو بشغلوك تلطم على شجر المخدرات فى افغانستان يا انتفاعى يا قدر.

(يلتفت نحو هند ويصرخ فيها):

حمدي : قولتيه .. دى حاجة تقوليها له وانتى عارفه انه مستتنى
يشوف فيا يوم

هند : مهو كان لازم يقتنع باسباب طلبى للطلاق

(يتحرك عزمي نحو رواد المقهى ويستعديهم على
حمدي)

عزمي : اتفرجوا يا ناس .. اتفرجوا .. المعفن اللي بعد بوس
الرجلين وافقت اجوزه بنتى .. قبل ما تكمل شهر معاه ..
عايز يسيبها ويروح تورا بورا عشان ينقط فى مزارع
المخدرات

حمدي : (بعصية لهند) حتى موضوع تورا بورا قولتى له عليه
.. شكلى هيبقى آيه مع قبائل باكستان .. ليه كده يا هند

عزمي : (مخاطبا جمهور المقهى) ده يرضى ربنا يا ناس .. ده ..
(يتجمد لسانه عند مشاهدته لحازم فيقول له بحدة) انت
هنا؟! .. وقاعد مربع وولا على بالك حاجة .. وانت شايف
عمك واقع مع الشواضلى بتاع المخدرات (وهو يشير نحو
حمدي) ده

حمدي : تورا بورا وبتاع مخدرات وزفت من قبل حتى ما نلف
سيجارة .. روح يا شيخ .. دا انت راجل فقرى

حازم : (لحمدي وهو ينهض محتدا) انا اللي كان مسكتنى اني
حالف لسانى ما يخاطبش لسانك .. لكن تغلط فى عمى لا
.. احترم نفسك يا حمدي

(قبل أن يرد حازم .. يتأمل ثائر (١) حمدي وهو يقول
لحازم)

ثائر (١) : مش ده المتظاهر اللي صورته الجزيرة فى يوم جمعة
الأرنبيط

حازم : أيوه هوه

ثائر (١) : يعنى ده اللي سرق البتنجانه

حازم : (بنبرة استعداد) أيوه .. هوه بشحمه ولحمه

(يرفع ثائر (١) عقيرته وهو يشير نحو حمدي)

ثائر (١) : سفرك برة عار وخيانة .. يا حرامى البتنجانه

مجموعة الثوار : سفرك برة عار وخيانة .. يا حرامى البتنجانه
(يتراجع حمدي مختبئاً خلف والده الذي تأمله مزديراً
وهو يقول)

فؤاد : كدبت أنا لما قولت ان خلفتى ليك كانت أكبر جريمة
عملتها فى حق نفسى

(ينقلب حال المقهى رأساً على عقب ويقف عدد من
الزبائن بين حمدي ومجموعة المتظاهرين وفي مقدمتهم
علي ورضا)

على : حاسب يا ابنى انت وهو .. مينفعش تغلطوا فى ابن حتنا
قدامنا

حمدي : (هامساً لعلّي) الخيارة اللي اتفقت معاك ابعتها لك كل
شهر بقت خيارتين يا عمى علي

على : (هامساً) بلاش خيارتين .. خليه خياراية وحتة بتتنجان قد
ورقة الدومنة (وهو يلتفت نحو حمدي) لزوم السأسة ..

حمدي : انت تؤمر يا عم علي .. يا راجل يا مجدع .. يا أصيل

علي : (وهو يلتفت نحو حمدي مرة أخرى) ومتنسّاش الواد
حوكشة ابني .. أول ما ظروفاك في التنقيط تنضب هناك
تبعت له دعوة عشان يجي لك هناك وترستئه في تنقيطة
على مزاجك

حمدي : (بنفاذ صبر) أنا خدامك يا عم علي .. اطمئن .. ابعتهولى
انت بس وأنا هجيب له (بغيط) أحلى نقطة هناك

علي : (وهو يلتفت نحو حمدي مرة ثالثة) حوكشة دا واد جن
مصور و هيعجبك .. وعنيه بتسح سحاح غريب ..
متلاقهوش عندى حد .. تقولش عنيه جالها إسهال

(يبصق حمدي على ظهر علي بمجرد التفاته عنه ..
بينما نرى رضا وهو يصوب نحو مجموعة الثوار سن
حقنة تحتوي على سائل أصفر غامق)

رضا : اللي هيقرب منه هديه حقنة الجنزيبيل دى فى عينه .. أبعد
يلا ..

حمدي : (هامسا لرضا) حزمة الجرجير هتبقى حزمتين يا رضا
رضا : (هامسا لحمدي) خليهـم واحدة جرجير وواحدة كرفس ..
بس ورور يا برنس .. ورور زى اللي بيطلعهم الشيف
شرفطح فى الراديو

حازم : (لحمدي وهو يحول بين رضا وبين مجموعة الثوار)
ارتحت كده .. ولعتها

حمدي : مهى طول عمرها والعة يا حازم .. أمتى كانت مش
والعة

(رافعا صوته وهو يحاول اختراق المجموعة التي تحمي
حمدي)

ثائر (١) : متتكلمش عن الولعان .. يا حرامى الببتجان

مجموعة الثوار : متتكلمش عن الولعان .. يا حرامى الببتجان

حمدى : (صارخا في جموع الثوار) ولعوها زياده .. ولعوها
 كمان وكمان يا ثوار .. اسحلونى فى الشوارع .. اصلبونى
 .. ارجمونى لحد اخر نفس .. (وهو يرفع يديه مستسلما
 ويتحرك ليخترق المجموعة التي تحميه حتى يصبح في
 مواجهة الثوار) .. يلا .. اسحلونى واصلبونى .. بس
 أمانة عليكم .. متنسوش تعلقوا على رقبتى وأنا مصلوب
 على اطول عامود فى الميدان .. يافطة مكتوب عليها .. ده
 اللى خان (يقولها بنبرة بالغة التأثير والثأير) .. عشان كل
 اللى يعدى على جنثى المتعلقة .. يلعنكم فى سره ويقرا على
 روحى الفاتحة وهو بيتظاهر قدامكم انه بيرميني بججر ..
 لانه من جواه هيبقعارف أنى سرقت عشان أكل .. مش
 عشان أبقي رجل أعمال ولا مدير ولا وزير ولا فرعون
 جديد

(يخف الضجيج ويظهر التراجع على مجموعة الثوار
 والتأثر البالغ على مجموعة المقهى وحازم وهند
 وعزمي وفواد)

حمدى : اكتبوا على اليافطة كمان .. ده اللى دمر مصر .. ده
 نشف نيلها وقلل خيرها وسرق بتنجانتها .. اللى لو
 مكانتش اتسرفت .. كان شبع الجعان وارتوى العطشان
 وشفى العيان واتعلم الجاهل واتجوزت العانس واتكفل
 اليتيم واتسترت الأرملة .. والعاطل فيكم كان لقى شغل
 .. (صارخا فيهم) يلا .. خدوا حقكم وحق مصر منى ..
 مستنين ايه

هند : (صارخة وهي تسحب العصاة من يد عزمي وتهول نحو حمدي) لا .. محدش هيقدر يلمسك

(نسمع صوت منال صارخاً وهينهرول لتقف بجوار هند بين حمدي ومجموعة المتظاهرين)

منال : أخويا

حازم : (وهو يستدير ليوأجه مجموعة الثوار، ليصبح بين هند ومنال) اهدوا يا جماعة .. اهدوا .. عدونا الحقيقي مش حمدي واللى زيه ..

(ينظر حمدي نحو ظهور الثلاثة – هند وحازم ومنال – ويقول بنبرة متأثرة)

حمدي : الحمد لله .. الشدة رجعت لى أعلى الناس .. (وهو يبكي) كده أقدر أسافر وأنقط وأنا ضميرى مرتاح

(نسمع أصوات بكاء متواصل لمجموعة من الجنسين ، فالتفت حازم مع المجموعة نحو الكالوس الأيمن، فنرى متظاهرين ٢ و ٨ و متظاهرات ٧ و ١٠ يجرون حقائب السفر وهم سيكون بكاء هستيريا)

حمدي : (لحازم) دول من ضمن المجموعة اللي سفرها بهجت

حازم : (وهو يتأملهم) اه .. خدت بالي

حمدي : (بعدما فكر برهة) معقولة لحقوا يخضروا البلاد اللي سافروا لها بالسرعة دي .. (يشير نحو حقائبهم وعلى وجهه تعبيرات السعادة والطمع) تلاقي شنطهم متعتنة دولارات .. (وهو ينظر نحو حازم بضيق) وأنا اللي كنت هضعف واسمع كلامك ومسافرش يا فقري يا ابن الفقرية

(تقترب متظاهرة (٧) من حازم فيستغل الفرصة ويشير نحوها)

حازم : ممكن حضرتك

متظاهرة (٧) : (بعدما مسحت دموعها بظهر كف يدها) عايز أياه
انت كمان

حازم : هو حضرتك مش كنتى من ضمن المجموعة اللى سفرها
بهجت أبو العنين

متظاهرة (٧) : أيوه .. (بعصبية) وبعدين انت مالك

حازم : (مرتبكاً) ابدا .. أنا بس ...

حمدي : (وهو يزيح حازم من أمام الفتاة) سيبني أنا أتعامل ..
أنا وهى منقطين زى بعض وهنفهم بعض بسرعة

متظاهرة (٧) : (لحمدي بنفس العصبية) عايز ايه انت كمان ..
اوعى من سكتى .. عايزة اعدى

حمدي : (وهو يوسع لها المجال) حاضر يا فندم تحت أمرك ..
أنا بس كنت عايز اطمئن لأن حضرتك اتوفقتى فى مهمتك
التنقيطية المباركة خارج البلاد

متظاهرة (٧) : (تنفجر في وجهه) نقطة تاخذك وتأخذ أهلك يا
بارد يا ابن

حمدي : (يفاجأ بردها العنيف فيرفع يده ويهم بصفعها) أنا بارد
يا منقطة يا بنت ال

(يد حمدي في عودتها إلى الوراء تصطدم بوجة متظاهر
(٣))

متظاهر (٣): أه يا وشى

حمدى : (بعدما نظر إلى حقيبتيه وعرف أنه من مجموعة العائدين) أسف جدا يا زميلي .. معلش يا صاحبي .. مكنتش شايفك

متظاهر (٣): ولا يهملك (وهو يتأمل حمدى) أنا حاسس انى شوفتك قبل كده

حمدى : (تنفرج أساريره ويشعر بأنه وجد ضالته) وأنا كمان .. حاسس أنى شوفتك كتيبير قبل كده .. الا قول لى الأول .. مش حضرتك من الجماعة اللى سافرت عشان تنقط فى ..

متظاهر (٣): (لا ينتبه لكلمات حمدى ويستمر فى التدقيق فى ملامحه وهو يقول) أيوه انت .. انت اللى صح .. مش حضرتك اللى

حمدى : (بنفاد صبر وتساهل) أيوه يا سيدي أيوه .. كلامك مضبوط .. أنا اللى ... المهم دلوقت .. قول لى عملتوا أيه فى

متظاهر (٣): (وهو ينظر له بازدراء) أعذرنى .. مش هقدر اتناقش مع حضرتك

حمدى : ليه يا زميلي .. دا احنا طلعلنا معارف .. انت نسيت ان انا اللى ولا أيه (وهو يمسك بذراعه) .. المهم .. قول لى

متظاهر (٣) : (وهو يسحب ذراعه بغنف) قولتك مش هقدر اتناقش معاك

حمدى : ليه

متظاهر (٣) : لاني متعودتش اتناقش مع حرامية بتتجان
(يسقط في يد حمدي وهو يميل على الأرض ليمسك
بشيء يقذف به متظاهر ٣)

حازم : بتتجان .. بتتجان يا ابن المقلية .. غور يا ض
(من شدة الاجهاد ، تسقط حقيبة متظاهرة ١٠ على
مقربة من حمدي وحازم ، فيهرولان ناحيتها ويحملانها
عنها)

حمدي : خلى عنك يا ست الكل

حازم : قولى لنا رايحة فين واحنا نوصلك

متظاهرة (١٠) : مفيش داعى .. البيت قريب من هنا

حمدي : (لحازم وهو يزحزح الحقيبة عن الأرض) هي
الدولارات بقت ثقيلة كده ليه اليومين دول

متظاهرة (١٠) : (وهي تشير نحو حمدي بحق) أهو القر
والحسد بتاع الأشكال الوسخة اللي زيك هو اللي جاب لنا
الفقر

حمدي : (يكظم غيظه رغما عنه ويحاول أن يحصل على
المعلومة) ليه يا ست الكل بس .. هو انتى روحتى
بتزغرتى ورجعتى بتعيطى .. هدى نفسك .. هدى نفسك
يا برنسيسة وقوليلي على حاجة واحدة .. عايز اسمع منك
حاجة واحدة بس

متظاهرة (١٠) : وأنا هقولها لك

حمدي : (وهو يميل عليها بأذنه) وأنا كلى اذان صاغية

متظاهرة (١٠) : (وهي تشد من يده صاحب الحقيبة) اتقوه عليك

(يمتع وجه حمدي من شدة المفاجأة ويرفع يده
بمواجهة متظاهرة (١٠) لكن قبل أن تهوي يده بالصفعة
يسمع صوت متظاهر (٨) الصارخ)

متظاهر (٨): ااااه .. ااااه يامه .. حد يغيتتى يا ناس ..

(تلتف من حوله المجموعة ويقترب حازم منه وهو
يقول)

حازم : فيه ايه .. قول لنا محتاج أيه واحنا نساعدك

متظاهر (٨): محتاج وش تانى أدخل بيه على عيالى .. محتاج
وش غير وشى

(يقترب حمدي منه ويربت على كتفه مشفقا)

حمدي : يا سيدى ادخل عليهم بوشك ده .. وهو يعنى انت قبل ما
تسافر كنت شبة أحمد عز .. بعدين صدقتى .. هما مش
هيهتموا بوشك الوحش ده .. قد ما هيهتموا بالهدايا اللي
انت جبتهالهم

متظاهر (٨): هداية أيه .. الشنطة مفيهاش غير الهدمتين اللي
سافرت بيهم وشوية تقاوى من البلد اللي سافرتها

حمدي : اشتريلهم من هنا كام هدية قبل ما تدخل عليهم

متظاهر (٨): منين .. هو انا حيلتى حاجة

حمدي : امال الفلوس اللي نقطت بيها وديتها فين .. (بغيط
وتأنيب) أكيد فرتكتها على النسوان هناك .. يا معفن .. يا
أبو وش عكر

متظاهر (٨) : لا نسوان ولا هباب ولا زفت .. لا أنا ولا حد من
اللى سافروا ينقطوا .. خد جنبه أحمر واحد .. مش بس
كده (وهو يلطم) دول كمان رجعونا مترحلين فى مركب
زى الغنم

حمدى : (مصعوقاً) ليه .. البلاد اللى روحتوها طلع مفيهاش
زرع

متظاهر (٨) : فيها زرع مالوش أول من آخر .. لكن .. لكن احنا
(وهو يبكي) احنا اللى لما وصلنا هناك لقينا عنيينا مفيهاش
دموع .. زى ما يكون كان لعنيينا محابس (وهو يلطم على
وجهه) واتقفلت

(ترتفع همهمات الاستغراب من المجموعة ، ينصت
حازم للرجل بشدة .. بينما يقترب حمدى أكثر من الرجل
وهو يتأمل به نظرة استغراب)

حمدى : ازاي يا عم .. ما انت كل مواسيرك سالكة وعمال تسح
اهوه

متظاهر (٨) : مهو لما رجعنا مصر .. ورجلينا وقفت على
أرضها .. زى ما يكون لعنيينا محابس واتفتحت و ...

(ترتفع الهمهمات للدرجة التي غطت على صوت الرجل
، فيصرخ حمدى في الرجل)

حمدى : انت بتقول ايه .. واضح انك عيان .. عارف .. لو كنت
عرضت نفسك على سباك كويس هناك .. كان ظبطك

متظاهر (٨) : كل واحد فينا لفوه كعب داير على سباكين البلد
اللى سافر لها وبرضو ملقيوش حل

حمدى : يبقى اكيد معندكمش مهارات فردية فى التنقيط .. يا بني ادم التنقيط اللي يحترف برة بلده لازم يكون عنده مهارات فردية تنقيطية عالية .. (وهو يتلوى بجسده)يعنى يعرف ينقط بجسمه كله

متظاهر (٨) : والنعمة حاولت ومعرفتش

حمدى : (وهو يميل برأسه ناحية كتفه) طيب جربت تنقط بالكنتف

متظاهر (٨) : جربت ومعرفتش

حمدى : (بضيق ونفاذ صبر) طيب جربت تنقط تنقيط فرنساوى

متظاهر (٨) : (وهو يلطم على وجهه) جربته .. ومش الفرنساوى بس .. حتى التنقيط فى وضع الضفدعة جربته ومفلحتش

حمدى : (مشككا) لا .. متحاولش تقنعنى .. أنا ...

حازم : (يقاطع حمدى) الكلام ده لو كان هو لوحده .. لكن زى ما سمعت .. كل اللي سافروا .. (بسعادة وظفر)يعنى

(يصرخ في حازم ويقاطعه بدوره وهو يقول)

حمدى : ماليش دعوة بكل اللي سافروا .. أنا ليا دعوة بنفسى بس .. مش عشان مجموعة خايبة زى دى .. حلم شباب مصر فى التنقيط ينتهى ..

حازم : (بنفس نبرة السعادة والظفر) متقولش الكلام الفاضى ده .. بلاش تنعلق بالوهم ..

حمدي : انت اللي موهوم وعاش دور الزعيم ع الفاضى .. انت
اللى نظرك قاصر ومش فاهم حاجة ومصمم تعمل
فلوطة وخلاص .. هسافر يا حازم .. وهنقط فى البلد اللي
هسافر لها ومفيش قوة هقدر تمنعنى من التنقيط .. (وهو
يشير نحو حازم متحديا) واتحداك

حازم : (بنبرة هادئة واثقة مطمئنة) مش هتقدر .. لان الدعم اللي
فى عينيك مش ملكك

حمدي : (ساخرا) لما هو مش ملكى.. يبقى ملك مين يا عم المفتى

حازم : ملك الأرض دى .. الأرض دى بس

حمدي : ليه .. (بنبرة نكران وجحود) هى الأرض دى ادتنا أيه
؟!! عشان حتى شوية الدعم اللي جمعتهم سنين عذابنا
وشقانا فيها يبقوا من حقها

حازم : ادتكوا أغلى ما فيها .. وأحلى ما فيها .. حتى وانتو
كارهينها وقاسين عليها وجاحدين حقها

حمدي : تانى .. هترجع تعمل فيها مصطفى كامل تانى .. طيب
قول لنا فين .. (وهو يكشف جيوبه) قول لنا اديتنا أيه ..
وباملرة أيه

حازم : (وهو يشير نحو عيني حمدي) بامارة اللي فى عينيك دى
(وهو يشير نحو عيون المجموعة) بامارة اللي فى
عينكم دى ..

(حالة من الارتباك واللفظ تسود المجموعة)

حمدي : لا .. انت شكلك لسعت

عزمي : ايه اللي فى عيننا يا ابني .. وضح تقصد أيه

حازم : (لعزمي) النيل يا عمي .. (يخاطب المجموعة) النيل في عنيكم .. (صارخاً) النيل في عنيكم .. (وهو يتحرك بين المجموعة) اللي في عنيكم ده مش مجرد دمع .. مش مجرد ملكية وجع خاصة .. لا .. اللي في عنيكم دي .. النيل نفسه .. النماء نفسه .. الخير نفسه .. الحياة نفسها ..

(ترتفع الهمهمات ، تحرق فيه العيون)

فؤاد : يا ابني وضح أكثر .. انت كده لخبطنا زيادة

حازم : (لفؤاد) النيل اللي اتحرمتوا منه .. واتحرم عليكم تشوفوه الا واندتوا محشورين زى أعواد الكبريت جوا المواصلات اللي بتعبر كباريه .. رحمة بيبكم .. ربنا طواه .. رفعه زى ما رفع سيدنا عيسى .. نقاه وظهره زى ما ظهر قلب سيدنا النبي عند حليلة وعند البعثة وفي الاسراء والمعراج .. بعددين بدره تانى .. زى ما بدر المن والسلوى على اهل سيدنا موسى .. بدره تانى .. بس في عنيكم .. عشان انتوا اللي تملكوه وتحموه وتصونوه وتتحكموا فيه وتتهنوا بخيره .

حمدى : (متهكماً) يا سلام .. دا احنا رجعنا لزمان الف ليلة وليلة يا جدعان ..

متظاهر (٨) : طيب لما هو كده .. لما كل واحد فينا خد نصيبه من مية النيل بما يرضى الله .. عنينا نشفت ليه لما كنا برة

حازم : لان اللي في عنيكم .. مكنش ولا هيكون .. ملك لأرض غير دي .. ولا طير غير طيرها ولا ناس غير ناسها

حمدى : ليه ؟

حازم : لأن ربنا لما خلق الكون .. مخلاش مصر تبقى حجر أساس فيها من فراغ .. أقل بنا أو مقول .. لما بيحي بيبي بيت و يختار حجر الأساس .. بيختار أقوى أحجاره وأبقاها وأصلبها .. عشان كده بلدنا باقية .. وهفضل باقية .. طول ما فيه حياة على الأرض .. ونيلها هيفضل ليها .. هيفضل فيها .. طول ما فيه فى الأرض بذور بتندبت وشجر بيخضر وطير بيرفرف .. (وهو يشير إلى أعينهم مرة أخرى) من الآخر .. النيل فى عنكم .. فاختاروا .. بين انكم تضيعوه فى بكاء ونهضة وتفضلوا جعانين ومحرومين .. أو .. تعملوا هنا .. (وهو يشير نحو حمدي إشارة تائيب) زى ما كنتو تعملوا فى البلاد الغربية ..

حمدي : (مذهولاً) يعنى ...

(يقترب متظاهر (٨) من حازم وهو يقول مقاطعا حمدي)

متظاهر (٨) : طيب ليه يا استاذ عينا أنا من دون الناس .. بتنزل دمع معكر وريحته غريبة شوية

(وهو يزيح متظاهر (٨) بيده ويقترب من حازم أكثر)

حمدي : لان الرشّة بتاعتك انت كانت من بحر البقر .. (يصرخ فيه) غور .. غور دلوقت .. وسيبي أستوعب اللى بيقوله (وهو يشير نحو حازم) المجنون ده

حازم : أنا مش مجنون .. (مخاطبا المجموعة) انا قولت الحقيقة .. ومستعد أثبت لكل واحد فيكم صدق كلامي

حمدي وأصوات متعددة : ازاي

حازم : تشـتغلوا .. تزرعوا .. انتوا مش كده كده بتعيطوا طول النهار

المجموعة : اه

حازم : جربوا كل واحد يعيط ساعة او ساعتين فى اليوم على شوية زرع يزرعهم

(نسمع أصوات ضحك .. يصبح بعضها بعد برهة همهمات ثم ترتفع أصوات)

صوت (١) : ده ببستعبط

صوت (٢) : وفيها ايه لما نجرب

صوت (٣) : قال النيل فى عنىكم قال

صوت (٤) : يعنى احنا خسرانين ايه

صوت (٥) : طيب مية النيل وعرفناها .. راح فى السمك

صوت (٦) : أقول لك ومنتزعلش

صوت (٧) : يا سلام لو كان كلامه صح

صوت (٢) : مهو عشان نعرف اذا كان صح ولا غلط لازم نجرب

صوت (٤) : أيوه نجرب

باقى الأصوات : نجرب .. نجرب .. نجرب

حمدى : (وهو يمكن متفكرا) وأيـه المانع .. هو التنقيط المحلى عيب ..

علي : (مخاطبا حازم) بس يا ابني احنا كده محيلتناش غير المية ..
يعنى يلزمننا تقاوى .. هنجيب تقاوى منين

حمدي : (لعلي .. بحماس) يا راجلانت مش فالح الا فى السأسة ..
هو بلدنا فيها غير البذر والقشر

حازم : حتى لو مفيهاش بذرة واحدة .. ربنا هيبعت لنا البذر مع
الريح .. بس احنا نبتدى ونقول يا رب

حمدي : يا رب (يلتفت نحو متظاهر (٨) ينأمله متفكرا) أبو
دموع عكرة زى وشه ده .. تنقيطه هيجيب أعلى انتاج ..
مية وسباخ عضوى فى نفس الوقت .. (يشير نحوه) أنت
يا راجل يا أبو شكل وحش أنت

متظاهر (٨) : بتنده لى أنا

حمدي : أيوه .. تعالا

متظاهر (٨) : (وهو يهرول نحو حمدي) نعم

حمدي : تشتغل معايا

متظاهر (٨) : هتشغلنى أيه

حمدي : هشغلك مطرب مثلا .. (بغضب) هتتنيل تنقط

متظاهر (٨) : ولما أنا انقط انت هتعمل أيه

حمدي : انا كمان هنقط

متظاهر (٨) : يعنى احنا الاتنين هنقط على بعض

حمدي : (مصعوقا) ننقط على بعض .. (وهو يدفعه دفعة قوية)
غور .. غور .. أنا دلوقت عرفت انت مفلحتش ليه في
البلد اللي روحتها .. اكيد اتعقدوا من سحنتك الوحشة
الغبية دى وخافوا ان الزرع بتاعهم يصطبج بيه

متظاهر (٨) : (وهو يتراجع نحو حقيبته) والنعمة ابدأ .. دول
استقبلوني هناك استقبال مهند لما راح لبنان .. والأفغانية
بنت صاحب المزرعة وقعت فى دباديبى وكانت عايز
تتجوز...

حمدي : (مشدوها) بتقول الأفغانية ؟!!

متظاهر (٨) : اه وربنا .. حتى

حمدي : (وهو يهرول ناحيته) بس .. متكلش .. (وهو يتلفت
حوله كاللص) ورد عليا بصوت واطى (وهو يشير نحو
حقيبة متظاهر (٨)) والتقاوى اللي فى شنطتك دى من
هناك

متظاهر (٨) : اه ...

حمدي : (يرفع حقيبة متظاهر (٨) على كتفه ويسحبه من يده
ويهرول نحو الكالوس) طيب اسكت .. مصدقك .. يلا
بيننا

حازم : (وهو يشير نحو حمدي) واخذ الاخ ورايح فين يا حمدي
حمدي : على سينا .. أنا والاخ (وهو يشير نحو متظاهر (٨))
مهند .. هنعمر لك سينا كلها

**(يخرج حمدي مع متظاهر (٨) من الكالوس ، بينما تهرول هند
من خلفه)**

هند : خدنى معاك يا حمدى .. ده أنا من زمان نفسى أنقط فى شرم

(ينظر حازم نحو حمدى بسعادة .. ينظر نحو المجموعة ويرى حماسها وسعادتها فتدمع عيناه أكثر ، يقترب منه على ويقول له بنبرة عرفان وشكر)

علي : أنا دلوقت بس عرفت ليه ربنا استتناك من شوطة العياط اللى ملت البلد

حازم : تقصد أيه يا عم على

على : اقصد ان ربنا حرم على عينيك غشاوة الدمع ووجعه عشان تبقى عيننا اللى نشوف بيها الحقيقة

حازم : (بنبرة بالغة التأثير) متقولش كده يا عم على .. دا أنا أقل واحد فيكم

(تقترب منه منال ، تتأمله بنظرات زهو وافتخار وهي تقول)

منال : متقولش كده على نفسك .. انت أعظم راجل فى الدنيا .. صدقنى .. (وهي تقترب منه وتمسك بيده) صدقنى يا حازم .. أنا فخورة بيك .. وفخورة أكثر بانك حبيبى

(تدمع عينا حازم أكثر وهو يسحب يده من بين يدي منال)

حازم : بس يا منال .. بس .. ارجوكى كفاية

منال : لا مش كفابة .. أنا فعلا فخورة بيك و..

عزى : (رافعا صوته) لا مش كفاية .. لان منال ليها حق تفتخر بيك وأنا كمان

(تسقط دمعاً من عين حازم وهو يصرخ في عزمي)

حازم : يا عمى بس .. ارجوك كفاية

عزمي : (بحماس) لا مش كفاية .. (مؤكداً) أيوه انا كمان فخور
بيك .. فخور بانى عمك .. فخور بانك ابن اخويا

(ترتفع أصوات المجموعة تباعاً بعبارات المدح
والتبجيل لحازم ويرتفع أيضاً صراخه مطالباً إياهم
بالتوقف ، حتى يتشنج باكياً ، ويسقط على الأرض وهو
يبكي بشدة .. فيظلم المسرح بينما نسمع صوته)

حازم : قولت لكم كفاية .. حرام عليكم .. كفاية .. كفاية

المجموعة : ليه

حازم : لأنكم خليتوني أعيط .. خليتوني أعيط يا ولاد ال.....

نهاية

الفهرس

٦	الفصل الأول
٧	المشهد الأول: شقة رجل (١)
١٠	المشهد الثاني: القهوخانة
٢٧	المشهد الثالث: صالة منزل عزمى
٣٤	الفصل الثاني
٣٥	المشهد الأول: شقة والد حمدى
٥٣	المشهد الثاني: القهوخانة
٧٧	الفصل الثالث
٧٨	المشهد الأول: مكتب التحقيق والحجز
١١١	المشهد الثاني: شقة والد حمدى
١٢٦	المشهد الثالث: القهوخانة
١٤٨	الفهرس